

WANTOK

NIUSPEPA BILONG YUMI OL PAPUA NIUGINI STRET! 30 YIA NAU

32 pes

Namba 1,387

Wik stat long Fonde Janueri 25, 2001

70t

Asua
bilong
olpela
Sandaun
PEC
- pes 2

Ol skul
fi bilong
yia
2001
- pes 3

Ol nius
bilong
Hailans
- pes 7

Ol nius
long
ovasis
- pes 15-16

Plis na NIO kamautim ol hevi long Foren Afeas opis

VERONICA HATUTASI i raitim

PLIS i holim pasim pinis namba tu wokman bilong Foren Afeas long ol wok nogut i kamap long paspot seksen bilong Imigresen Divisen insait long Foren Afeas Dipatmen.

Ol ripot i tok John Dau husat i gat 43 krismas bilong ples Tubuseria, Sentrel provins i stap long K200 plis beil na wetim kot i stap.

Namba wan man we plis i bin holim em Dino Mas husat i gat 28

krismas. Em i wanpela sinia imigresen opisa bilong ples Angrimas long Angoram insait long Is Sepik provins.

Plis Frod Skwat i bin holim em long Desemba 28 long Mosbi bihain long ol ripot long wok nogut na tu larim sampela Saina sitisen i go fri long Krismas wik i kamap long ples klia.

Bipo long dispela i kamap na bihain long en las yia, ol ripot i bin kamap long ples klia long ol pasin i no stret i kamap we sampela Foren Afeas opisa yet i stap insait long ol paol wok i kamap long wokim ol

paspot bilong ol man bilong ol arapela kantri.

Ripot i tok Plis Frod Skwat i sasim tupela opisa long wokim ol giaman paspot long ol man bilong ol arapela kantri.

Mista Daua bai kamap long kot bihain long 14-pela de.

Ol ripot we *Wantok* i kisim i tok ol wok painimaut bilong Nesenel Intelijens Ogenaisesen i go het nau na samting olsem foapela o faipela opisa moa em ol i stap insait long rong. Tupela man em ol i holim ol pinis.

Ripot i tok nupela manesmen i tok sapos lo i painim olsem sampela Foren Afeas opis i rong long dispela na ol arapela samting insait long dipatmen, ol bai kamap long kot na kisim sas long en.

Ripot i tok Ekting Seketeri bilong Foren Afeas Leonard Louma i kamapim senis insait long dipatmen bilong traim stretim ol hevi we i wok long kamap nau long dipatmen.

Long ol ripot we i bin kamap long ples klia ol wok nogut i kamap long Maigresen Divisen na paspot seksen.

Rausim pawa long provins em bikpela hevi, Kapi i tok

JOE KANEKANE i raitim

MEMBA bilong Wabeg Daniel Kapi i tok lukaut long Praim Minista Sir Mekere Morauta long pasin bilong rausim pawa long ol provinsal gavman olsem dispela em piksa nogut we i abrusim tru ol rifom bilong provinsal na lokol level gavman.

Mista Kapi i tok Westen na Sauten Hailans provinsal gavman i lusim pawa bilong ol pinis na mipela i mas glasim tupela klostu nau bikos taim disisen bilong mekim dispela em samting bilong Praim Minista yet, wanem senis o samting i kamap long tupela provins ya em mipela i mas luksave gut.

Gavman i mas lukaut gut bikos rifom i wok tripela krismas tasol na ol eksen olsem i ken kamapim bikpela bagarap, Mista Kapi i tok. Em i tok maski long rausim pawa long provins tasol husat man o lida i gat toktok i sut egensim ol i ken kisim sas na gavman bilong pipel i mas stap yet long sevim pipel.

Mista Kapi i tokaut olsem i gutpela long ol kaunsil na ol nesenel lida bilong provins yet i mas makim provinsal edministreta long provins bilong ol. Noken rausim gavman bilong ol pipel bikos long dispela rot tasol bai ol pipel i ken kisim ol sevis we i mas go long ol. I nogat klia luksave sapos edministreta bai mekim wok bilong bringim sevis i go long ol pipel sapos em i no bilong dispela provins, Mista Kapi i tok.

Em i tok planti Gavana i no laik pilaim politiks bikos ol i laik givim sevis long ol pipel bilong ol. Olsem na Praim Minista i mas gat bilip long ol. Mista Kapi i tok ol Gavana em ol man bilong bungim provins na ol pipel olsem na sapos gavman i tingting long karimaut ol polisi bilong em, em i mas gat gutpela wok bung wantaim ol Gavana long provins.

"Lo bilong rifom i bilong traim stapim nesenel gavman long noken go insait nabaut long wok bilong provinsal gavman. Tasol nau mipela i lukim olsem nesenel gavman i ken go insait nabaut long wok bilong ol, Mista Kapi i tok.

Em i tok pasin bilong gavman long makim ol edministreta tu i mas gat aninit long wok glasim na luksave nau bikos sampela kendidet i save kam ausait long pablik sevis.


Mista Kapi i tok ol pablik sevans husat i wok longpela taim i kam i mas kisim ol dis-

pela wok bilong edministreta bikos ol i ken yusim save na eksperiens bilong ol long helpim provins long kamapim plen na rot bilong em long bringim developmen.

I mas gat narapela rot. Rausim pawa long provins em las samting bilong mekim. Saspenim ol Gavana

sapos ol i asua na noken rausim olgta provins bikos long rong bilong wanpela man tasol, Mista Kapi i tok.

Em i tok ol sampela lejislisen bilong strongim wok bilong rifom i no kamap yet long palamen na dispela em wanpela bikpela asua long sait bilong gavman.



Pas i go long Praim Minista • (l-r) Koni Sane, Robin Eka, Nelson Auwo, Papa Arekaizo na Lesley Hoffman i sanap holim pas bilong Praim Minista. Ol papa graun i tokim gavman bai ol i no inap pasim yunivesiti.
Foto: FRANCIS BENNY

Nestlé
MILO

IKEN WOKIM GUTPELA SAMTING LONG YU

PLIS RIPOT

Nesanel Kapitel:

Tripela man i bin dai long Mosbi siti bihainim wanpela sutaut wantaim plis long dispela wik Mande.

Bos bilong ol plis long NCD Tom Kulunga i tok foapela man i bin holim wanpela famili i gat mama na foapela pikinini bilong em long ka long Hohola long Mande apinun.

Mista Kulunga i tok ol raskol ya i bin gat tupela gan ol i wokim long ples long en. Wanpela i bin gat katres long en na narapela i nogat.

Em i tok ol raskol ya i bin kisim ka na ron i go olsem long Tokarara tasol plis i bin bihainim ol na ronim ol. Na ka i bam na plis na ol raskol i wokim sutaut na tripela raskol i dai.

Wewak, Is Sepik:

Plis long Wewak i holim pasim tupela kalabus man we i bin ronawe wantaim narapela 18 kalabus lain long Boram las wik.

Ol arapela i ronawe hait yet i stap na ol plis i wok long painim ol yet.

Plis ripot i tok nogat man i wok long putim was long ol kalabus lain long taim ol i bin ronawe.

Provinsal plis Komanda Leo Kabilo i tok wanpela long ol ronawe lain i bin stap long laip kalabus.

Mista Kabilo husat i bin kisim ripot wanpela de bihain long samting ya i kamap i sutim tok long ol woda bilong ol i no karimaut gut wok bilong ol na dispela samting i kamap long en.

Em i tok ol atoriti long kalabus i bin save long dispela plen bilong ronawe tasol ol i no bin wokim samting long stapim ol o strongim sekyuriti.

Ol kalabus lain ya i bin ronawe bihain long ol i bin katim banis waia long en.

Em i putim toksave long pablik long givim ripot i go long plis sapos ol i lukim o save long ples we ol ronawe kalabuslain i stap long en.

Mosbi:

Meya bilong Tari insait long Sauten Hailans Kopi Yape i wetim kot long wokim pasin bilong bagarapim liklik meri we krismas bilong em i stap daun-bilo long 10-pela krismas.

Em bai kamap long ai bilong Nesanel Kot.

Mosbi plis i bin holim pasim na sasim Mista Yape long Mosbi yet long wokim pasin nogut long wanpela liklik meri husat i gat eipela krismas.

Waigani Komitel kot i bin harim olsem long mun Oktoba de namba 7 las yia, liklik meri i bin slip i stap na Meya Yape husat i gat 33 krismas i bin bagarapim em.

Tari distrik kot i bin tok ol bai stretim samting ya ausait long kot tasol papa bilong pikinini i bin putim ol nupela komplek gen long Mosbi na olsem ol Mosbi plis i bin holim pasim na sasim em.

Nesanel Kapitel:

Plis i holim pasim bek 14 ronawe kalabus lain husat i bin ronawe long Bomana haus kalabus long las Krismas bilong las yia.

Twenti eit (28) kalabus lain i bin ronawe lusim kalabus long Krismas Sarere.

Bos bilong ol plis long NCD Tom Kulunga i tok ol bin holim pasim bek foapela ronawe kalabus lain long ol setelmen long Taikone, Tete, Braun Riva na Sabama.

Olpela Sandaun PEC i as Maran i lusim wok edministreta Kumbakor i tok

OLPELA Provinsal Eksekutiv Kaunsil o PEC aninit long Gavana bilong bipo John Tekwie i as bilong Maran Nataleo i pinis olsem Edministreta bilong Sandaun provins memba bilong Nuku na Minista bilong Fainens Andrew Kumbakor i mekim dispela toktok long Vanimo Trinde las wik.

Em i bekim ol toktok bilong ol lain insait i no amamas long tingting na pasin Nesanel Gavman i kisim long pinisim Ekting Edministreta Mista Nataleo long wok bilong em.

Moa long 200 manmeri na ol pablik sevan husat i bung i stap long ai bilong ol opis bilong Sandaun edministresen i harim olsem asua i stap long Mista Tekwie na PEC long westim tupela yia olgeta. Na i no bihain long 6-pela mun olsem lo i tok, long makim Mista Nataleo olsem Sandaun Edministreta. Bikos ol lain husat i stap insait long PEC i gat tingting long makim man bilong ol yet long kamap olsem edministreta.

"Pawa bilong makim man i stap long Nesanel Gavman na pawa bilong givim nem i stap wantaim Provinsal Eksekutiv Kaunsil. Tasol yupela ol lain

husat i bin stap long PEC long hia i westim taim bilong yupela long tupela yia olgeta. Ol lain bilong Vanimo i sapotim Mista Playa long kamap edministreta, narapela em lonas Litiki. Ol lain bilong Lumi i sapotim Lincoln Taru", Mista Kumbakor i tokaut.

Andrew Kumbakor i go het na i tokaut olsem em i no inap kisim petisen bikos dispela bai i no inap senisim disisen we Nesanel Eksekutiv Kaunsil i mekim pinis. Em i tromoi tok olsem ol protests na tu Mista Nataleo yet i ken kisim belhevi bilong ol i go long kot sapos ol i laikim.

Long dispela taim planti lain i ripot olsem eksen bilong Fainens Minista na memba bilong Nuku Mista Kumbakor long i no kisim petisen bilong ol protes ya i mekim em yet i kamap olsem wanpela liklik pikinini. Ol i tok, olsem wanpela nesanel lida na memba bilong kabinet bilong PNG Gavman, Mista Kumbakor i nogat bilip long Mama Lo bilong kantri we i givim "rait long wanwan man" long tokaut egensim o sapotim eksen o tingting bilong gavman na ol lida bilong kantri.

Strongpela dispela ripot,

man husat i pinis wok olsem edministreta bilong Sandaun Maran Nataleo i tokaut olsem i gat bikpela sapot tru i mas long 4-pela kona bilong Sandaun na tu ol Sandaun i stap ausait. Ol i egensim tru rot Nesanel Gavman i kisim long rausim long en olsem Edministreta bilong provins. Mista Nataleo i tokaut olsem i gutpela long Mista Kumbakor na ol opisa bilong em i wok-abaut i go long ol ausait distrik na painim aut ol yet.

Sapos pipel i sapotim eksen bilong bikpela gavman o nogat bipo long en i ken tok olsem protes ya i kam long ol "wanpela liklik lain" tasol.

Maran Nataleo i tokaut olsem i no gutpela piksa tru long wanpela lida olsem Andrew Kumbakor long mekim ol kain toktok olsem. Taim olgeta pipel bilong PNG aninit long Mama Lo i gat rait long mas na tokaut long belhevi bilong ol.

Wantaim tu long salim ol Petisen Pas i go long Nesanel Gavman wantaim as tingting bilong ol.

"Mi tu i laik tok olsem toktok Minista Kumbakor i bin mekim (long noken kisim petisen) i no soim gutpela piksa long wan-

pela lida long makim kain tok olsem.

I gat ol lain bilong Vanimo Grin, ol lain bilong Aitape i bin soim strong long wokabaut i kam long Vanimo, ol lain bilong Telefomin i bin ring i kam na sapotim petisen na ol grup bilong Nuku yet tu i bin toktok egensim eksen bilong NEC. Olsem na mi laik tok olsem dispela protes i no kam long wanpela liklik lain tasol.

"Sapos Minista Kumbakor i laik, em i ken go long ol distrik na stap wantaim pipel na askim wanem tingting ol i gat long dispela senta gavman i mekim. Mi mekim disepla tok bikos i gat trupela bilong en i stap long ol pipel i tokaut long belhevi bilong ol. Ol i soim wari bilong ol bikos ol i luskave long wok bilong mi na wok edministresen bilong mi we mi yet i gat bilip long en," Maran Nataleo i tokaut.

Tasol Fainens Minista Andrew Kumbakor i sanap strong long toktok bilong em olsem em i no inap kisim petisen. Na sapos ol i laik, em i salensim ol protesta wantaim Mista Nataleo long kisim dispeal belhevi bilong ol i go long kot.

Olpela Telikom bos i no amamas long tok tok bilong PNGTUC

LYNNE MINIRU i raitim

OLPELA Menesing Dairekta bilong Telikom PNG, Lindsay Lailai i tok kain toktok Jenerel Seketri bilong PNG Tred Union Kongres (TUC), John Paska i bin mekim long niuspepa long em i no gutpela na stret.

Mista Lailai i tok taim em i stap olsem Menesing Dairekta bilong Telikom, em i bin mekim sampela gutpela samting long sotpela taim em i stap wantaim kampani.

Em i tok taim em i kisim opis bilong MD, em i lukim planti samting i no bin stret olsem ol mani bilong kampani na tu ol arapela samting bilong kampani na em i bin traim hat tru long bringim ol hevi bilong Telikom i go daun liklik.

"Kampani i no bin mekim gut mani aninit long olpela menesmen na taim mi go insait, mi bin toktok strong long ol wokman na bos mas no ken wetim mani nating," Mista Lailai i tok.

Em i tok bikpela samting em i bin mekim long Telikom em long redim olgeta komputa bilong kampani long abrusim dispela sik bilong komputa ol i save kolim Y2K bag.

Mista Lailai i tok Telikom i bin gat tupela mun tasol na kampani i bin stap bihain tru long redim ol komputa bilong en na taim em i go insait long Telikom, em i hariapim ol wokman long wok hariap na ol i pinisim wok bilong 12-pela mun insait long tupela mun tasol.

"Mi amamas olsem mi bin wokim dispela samting long Telikom na mi no amamas tumas taim mi harim Mista Paska i bagarapim nem bilong mi long pablik," em i tok.

"Mi bin kamapim tu dispela wok painaut i go insait long Telikom taim mi stap olsem menesing dairekta na

lukim olsem planti bilong ol bikpela bos insait long kampani i wok long kaikaim mani bilong kampani nating na ol i no mekim wanpela gutpela wok long apim nem bilong kampani."

Dispela ripot bilong wok painaut i go insait long ol wok bilong Telikom i wok long kam aut long ol niuspepa na radio.

Bipo Telikom bos i tok ol union yet i bin toktok strong long dispela wok painaut na em yet olsem Telikom MD i bin go pas long statim dispela wok painaut na nau bos bilong ol i traim long sutim tok long em.

Mista Lailai i tok Mista Paska i nogat rait long kam aut long pablik na tok em (Lailai) i nogat gutpela kwalifikesen o save long holim ol bikpela wok.

TUC bos i bin askim sapos dispela toktok bilong Ekting Praim Minista, Michael Ogio long putim Mista Lailai i go bek long olpela wok bilong em i wanpela plen tingting long prave-taisim o salim Telikom i go long ol narapela lain long baim na ronim.

Tasol Mista Lailai i tok sapos Gavman i laik prave-taisim Telikom, em i laik bilong Gavman bikos em (Lailai) i nogat pawa long stapim Gavman.

Mista Lailai i tok em i nogat tingting long go bek gen long Telikom na Mista Paska i mas yusim het bilong em taim em i mekim kain-giaman tok-tok.

Em i askim wai na Mista Paska i no bin mekim wanpela samting long helpim ol wokmanmeri taim em i stap olsem wanpela dairekta bilong Nesanel Providen Fand.

Mista Lailai i tok TUC bos i wok long paulim tingting bilong ol wokmanmeri long kantri na ol wokmanmeri i mas traim na askim em sapos em i save tok pait strong long rait bilong ol o bilong em yet.

Ol Sevings na lons sosaiti peim moa mani long skul fi

OL Sevings na Lon Sosaiti insait long Papua Niugini bai peim bikpela mani tru i go long ol memba bilong ol long wok bilong baim skul fi tasol.

PNG Teachers Savings and Loans Society Jenerel Menesa Andrew Imaroto i tokaut long krismas na nu yia taim olsem sosaiti i baim samting olsem K3.5 milien long skul fi pinis.

Mista Imaroto itok dispela yia mak bilong skul fi lon o dinau bai i go inap olsem K4 milien.

Em i tok sosaiti i gat 18,000 memba olgeta. Sosaiti i save raitim sek mani i go long nem bilong skul na ol membas i save kisim na karim i go long skul na baim skul fi bilong ol pikinini bilong ol.

Ol arapela sevings na lon sosaiti tu i bai mekim wankain long ol membas bilong ol na mak ol inap rausim long skul fi bilong ol membas i stap olsem K30 milien olgeta.

Sauten rijen long kamapim ol boda developmen agrimen

OL PROVINSAL Gavman bilong Sentrel na Milen Be long dispela wik i sainim wanpela agrimen bilong kamapim ol wok long boda eria.

Sentrel provins Gavana Opa Taureka na Milen Be Gavana Titus Philemon i bin sainim agrimen ya long las Sande. Narapela tupela bikman husat i bin sainim agrimen tu em long Labui Bua husat i presiden bilong Amazon be Lokol Level Gavman na Gelio Tupago'o bilong Suau LLG.

Ekting Kabinet Seketeri bilong Sentrel Provinsal Gavman Butler Hibo i wanpela long ol lain husat i bin go wantaim Gavana Taureka long ples Baibara bilong sainim boda developmen agrimen ya.

Aninit long dispela MOA Agrimen ya em ol samting olsem rot na ol arapela wok long kamapim developmen namel long tupela boda eria, ol sosel sevis olsem helt na edukesen na ol ikonmik ektiviti.

Mist Hibo i tok tupela gavman wantaim i bin tok ol i laikim bai Sauten Rijinel gavanoas konprens bai lukluk long dispela samting insait long miting bilong ol long bihain taim. Bikpela tingting bilong ol em long kamapim ol komon boda agrimen wantaim ol neiba provins.

Gavana taureka i laik skruim toktok tu wantaim gavana bilong Galp em Riddler Kimave long kamapim narapela moa boda developmen agrimen.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea



Publishing Weekly, Thursday, for
Word Publishing Company Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Company Ltd.

General Manager and Group Editor in Chief: Anna Solomon.	Papers distributed by air throughout PNG.
Advertising Manager: Jocko Obeleuter.	Available by air mail subscription within Papua New Guinea and overseas
Editor of Wantok: Yakam Kelo.	Email address: word@global.net.pg

Advertising deadlines: Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd. and are set out in full on the reverse side of its official display Advertising Bookings form.

Nesenel Gavman tingting long helpim ol rurel skul

LYNNE MINIRU i raitim

OL provinsel edukesen bod long ol wanwan provins i mas bihainim stret ol disisen bilong Nesenel Edukesen Bod (NEB) long sait bilong skul fi na ol narapela ol fi ol i save sasim ol papamama long peim.

Minista bilong Edukesen, Dokta John Waiko i mekim dispela toktok taim em i tokaut long ol skul fi bilong 2001.

Nesenel Gavman i katim K61 milien long baset bilong 2001 olsem sabsidi mani i go long edukesen long kantri. K40 milien i stap long baset bilong Nesenel Gavman we Dipatmen bilong Edukesen bai yusim na narapela K21 milien em Gavman i bin givim long ol provinsel gavman long ronim ol edukesen pgrgem bilong

ol long provins.

Dokta Waiko i tok ol skul i mas gat mani long operet gut olsem na ol papamama i mas peim yet ol skul fi. Ol komyuniti i mas gat helpim bilong ol insait long edukesen bilong ol pikinini olsem lukautim ol bilding na eria bilong skul na sapatim ol tisa.

NEB i makim pinis ol skul fi bilong 2001 we i bihainim ol toktok i stap long nupela Edukesen Ekt na ol dispela ol fi bai ol provinsel edukesen atoriti na ol skul bod bai bihainim. Ol Provinsel Edukesen Bod (PEB) bai wok wantaim ol bod bilong skul long makim ol fi we i wankain olsem NEB i makim o daunbilo long mak NEB i bin makim. Dispela toktok i karamapim olgeta fi.

Tupela kain fi NEB i makim pinis em wanpela i bilong ol rurel skul na arapela i bilong ol skul i stap long taun na siti.

Ol skul i stap long taun na siti bai fi bilong ol i stap olsem:

Elementri Prep-Gret 2 bai peim K40, K5 bai kam long Nesenel Gavman na Provinsel Gavman bai putim K5.

Praimeri Gret 3-5 bai peim K70, K10 bai kam long Nesenel Gavman na K10 long Provinsel Gavman.

Praimeri Gret 6-8 bai peim K180, Nesenel Gavman bai putim K20 na Provinsel Gavman bai putim K20.

Sek/Vok Gret 7-10 (Dei) bai peim K600, K150 bai kam long Nesenel Gavman na Provinsel Gavman bai putim K150.

Sek/Vok Gret 7-10 (Boding) bai peim K700, K150 bai kam long Nesenel Gavman na Provinsel Gavman bai putim K150.

Sekonderi Gret 11-12 (Dei) bai peim K700, Nesenel Gavman bai putim K150 na Provinsel Gavman

bai putim K150.

Sekonderi Gret 11-12 (Boding) bai peim K800, K150 bai kam long Nesenel Gavman na narapela K150 bai kam long Provinsel Gavman.

Kolis bilong Distens Edukesen bai peim K70. K40 bai Nesenel Gavman i putim long wanwan sabjek.

Ol skul i stan long rurel o long ples bai fi bilong ol i stap olsem:

Elementri-Prep- Gret 2 -K30, K5 bai kam long Nesenel Gavman na K5 long Provinsel Gavman.

Praimeri Gret 3-5-K60, K10 long Nesenel Gavman na K10 long Provinsel Gavman.

Praimeri Gret 6-8-K140, Nesenel Gavman bai putim K20 na Provinsel Gavman-K20.

Sek/Vok Gret 7-10 (Dei) bai peim K500, K150 bai kam long Nesenel Gavman na K150 long Provinsel

Gavman.

Sek/Vok Gret 7-10 (Boding) bai peim K600, K150 bai kam long Nesenel Gavman na K150 long Provinsel Gavman.

Sekonderi Gret 11-12 (Dei) bai peim K600, Nesenel Gavman bai putim K150 na Provinsel Gavman bai givim K150.

Sekonderi Gret 11-12 (Boding) bai peim K800, K150 bai kam long Nesenel Gavman na K150 bai kam long Provinsel Gavman.

Kolis bilong Distens Edukesen-K70 long wanwan sabjek na Nesenel Gavman bai givim K40 long wanwan sabjek.

Ol Bod bilong Gavmana na Bod bilong Menesmen bai sasim ol papamama long peim fi bihain long Provinsel Edukesen Bod i makim ol fi. Dispela i karamapim ol rurel o ples skul na ol skul i stap long taun na siti.

Ol papagraun long Goroka i amamas long bungim Praim Minista

Tenpela papa bilong graun we Yunivesiti bilong Goroka i stap nau i bin bung wantaim Praim Minista Sir Mekere Morauta long Mosbi long Tunde long stretim ol toktok bilong graun.

Ol tenpela man ya i bilong tupela ples, Okiufa na Asariufa we graun bilong ol em ol i bildim yunivesiti long en.

Sir Mekere i bin givim wanpela pas long ol long tokim ol olsem em bai toktok wantaim Minista bilong Lens, John Pundari long lukuk gen long dispela askim bilong ol papagraun we Nesenel Lens Kornisin i bin givim ol K2.7 milien.

Dispela i bin kamap las yia na Gavman i bin tok olsem em bai i no inap baim ol papagraun husat i askim long kompensesen long ol graun bilong ol Gavman i save yusim.

Man husat i makim maus bilong ol papagraun, Nelson Auwa i tok ol i amamas long bung wantaim Praim Minista na toktok wantaim em long stretim dispela toktok bilong graun.

Ol papagraun i tok orait pinis olsem ol i amamas long toktok bilong Gavman na ol bai i no inap mekim wanpela samting nau long stapim Yunivesiti long ol dispela nupela skul yia.

Em i tok ol i no bagarapim ol samting bilong Yunivesiti na olgeta samting i stap gut bai ol tisa na sumatin i ken yusim.

Ol man husat i go long dispela

miting em Vais Sensela bilong Goroka Yunivesiti wantaim pro vais sensela na ol arapela opisa bilong Yunivesiti, Edukesen Minista, Dokta John Waiko, Minista bilong Fisar, Ron Ganarafa, Korektiv Institusen Minista, Henry Smith, Minista bilong Lens, John Pundari na Minista bilong Jastis, Puri Ruing.

Dairekta Jenerel bilong Opis ov Haia Edukesen, Dokta Phillip Kereme wantaim Dokta John Waiko i tok tupela i amamas olsem ol papagraun bai i no inap pasim yunivesiti moa na tupela i tok orait pinis long ol wanwan provinsel opis bilong Air Niugini long stretim ol tiket bilong ol sumatin na givim long ol.

Dokta Kereme i tok em i laik bai ol sumatin i go long univesiti long neks wik bikos ol papagraun i harim tok na bai ol i no inap pasim Yunivesiti bilong Goroka moa.

Dokta Waiko i tok em yet wantaim ol minista husat i bin go long dispela miting i bin pasim tok pinis na kamapim wanpela tas fos long lukluk i go insait long dispela K2.7 milien na kamapim sampela kain plen we bihain bai kain samting bai i no inap kamap.

Faipwela man husat i makim maus bilong Okiufa em, Nelson Auwo olsem mausman bilong ol, Leslie Hoffman, Robin Eka, Papa Arekaizo na Koni Sare.

Narapela faipwela makim Asariufa em Toni Yogyo, Tom Munemune, Charles Akunai, Benson Otiye na Namane Omaneh.

Namba tu raun bilong Bogenvil toktok i kamap nau long Bogenvil

VERONICA HATUTASI i raitim

NAMBA tu raun bilong Bogenvil toktok long dispela yia i bin stat long Kokopo Is Nu Briten long dispela Mande Janueri 23 na bai pinis long tumora Fraide. Ol teknikel opisa i makim Bogenvil na Nesenel Gavman i wok long bung stat yet long Mande na long tude, ol lida bilong tupela sait wantaim bai go insait long skruim bung i go inap long tumora.

Niusman long opis bilong praim minista Kora Nou i tok bung bilong ol opisel we ol i holim long Ralum Golp Klub long Kokopo i wok long go gut tasol na nogat belkros o meknais i kam ap.

Mista Nou i tok ol samting we ol grup i wok long toktok long en em long gavman i gat moa pawa we Bogenvil i laik kisim, iBogenvil i kisim ndipenden

na rot bilong rausim ol gan.

Em i tok ol opisel i wok long bung long ol taim we ol i makim olsem long moning na long apinun na nait, ol i skruim ol toktok i go yet tu.

Ol gavman dipatmaen we i gat ol bikman bilong ol i stap long dispela bung em long Plening, Pliis na Difens, Treseri, Foren Afeas, Pesenel Manesmen, Ateni Jenerel, Dipatmen bilong Praim Minista Na Nesenel Eksekutyutiv Kaunsil.

Gavana John Momis na Bogenvil Pipels Kongres iida Joseph Kabui bai go pas long Bogenvil grup taim Bogenvil Afeas Minista Moi Avei i go pas long gavman grup.

Ripot we Wantok i kisim long Buka i tok ol Bogenvil lida i lukim olsem dispela bung long Kokopo em bai laspela na tupela sait wantaim bai kamap wantaim agrimen long gavman i gat moa pawa na indipendens long dispela bung yet.

Yunaitet Pati bai holim bung long Kainantu

JOE KANEKANE i raitim

KAINANTU taun bai pulap kap-sait long ol sapota, ol palamen memba, na ol

arapela pati sapota taim Yunaitet Pati i kirapim ol wok redi long nesenel jenerel ileksen bilong neks yia 2002.

Taun ya bai lukautim bung bilong Yunaitet pati we bai kamap long mun Mas na stat long 24 inap long 26.

Pati Presiden Chris Kopyoto husat i stap long Kainantu i tok ol i bilip olsem planti pipel bai kamap long dispela bung.

Em i tok Kainantu olsem ol sampela arapela taun i gat nem nogut tasol ol i amamas long holim mini konvensen long hap.

Em i tok i no gutpela long ol pipel i givim ol kain nem bikos

nius i givim dispela kain piksa long en.

Em i tok Yunaitet Pati i laik holim ol mini konvensen raun long kantri bikos i gutpela long ol pipel long lukim na toktok long ol bikman husat i stap insait long bung ya.

Mista Kopyoto i tok em i hat long holim wanpela bikpela konvensen bikos planti wok redi i stap long en na i gutpela long holim ol liklik konvensen.

Em i bilip olsem planti sapota na lida bai kamap long dispela long Kainantu bikos ol Hailans lida olsem Sir Matiabe Yuwi, Anton Parao na leit Sir Tei Abal i bin kirapim pati ya.

Yunaitet Pati em wanpela olpela pati tasol ol i kamapim sampela senis na em i gat ol sampela gutpela lida husat i ken givim ol wok developmen long


kantri sapos ol i givim sans long ol.

Nem bilong pati ya i wok long kamap strongpe. J bihain tasol long Pipels Demokretik Muvmen (PDM).


Ol Hailans palamen memba husat i stap long Yunaitet Pati long dispela taim em long Envaironmen na Konvesesen Minista Herowa Agiwa husat i memba bilong Koroba-Kopiago, Vais Minista bilong Envaironmen Bevan Tambi bilong Jimi. Vais Minista bilong Edukesen na memba bilong Kainantu Baki Reipa na Robert Nagle em memba bilong Mul Baiyer.

I gat bilip olsem Midel Ramu memba Tommy Tomscoll bai kisim posisen olsem pati lida. Praim Minista i bin rausim em olsem Petrolium na Eneji minista long las yia.





NIUGINI AILAN NIUS



Baset bilong Nu Ailan Gavman katim moa mani bilong LLG

BASET bilong Nu Ailan long dispela yia bai givim bikipela hap mani i go long ol Lokol Level Gavman (LLG) na ol eria we i nogat planti wok developen i kamap long en.

Long dispela yia, dispela provinsel gavman i katim daun ol ol spending bilong em long ol ovahet o mani em i save tromoim long lukautim edministresen long yusim ol risos long karimaut ol wok we bai helpim ol pipel long en.

Gavana na siaman bilong Fainens na Plening long Nu Ailan Provinsel Gavman Paul Tohian i tok em i givim dispela daireksen long ol LLG insait long provins long givim sampela strong na wok i go long ol bilong mekim ol disisen long ol progrem na ol wok projek long ol wan wan eria bilong ol.

Gavana Tohian i wokim dispela daireksen bihain long gavman bilong em i tok oraitim moa long K39 milien baset bilong provins long

dispela yia.

Long dispela yia, ol i givim aut developmen grent inap long K1.12 milien i go long nainpela LLG bilong kari-maut ol rotwok projek, ol biling bilong helt, edukesen na ol arapela pablik institusen we i save sevim ol pipel long en insait long ol rurel eria.

Pastaim provinsel hetkoto i save holim mani i stap na em yet i save skelim i go long ol LLG taim ol i askim long mani bilong ol projek samting.

Mista Tohian i tok ol i katim mani i go long wan wan LLG bihainim ol level bilong ol wok developmen long eria.

Konoagil LLG we i nogat developmen tumas i kisim bikipela mak long mani we gavman bilong Mista Tohian i katim i go long ol LLG wantaim maimak inap long K224,800. Ol arapela em Murat LLG we i kisim K160,000, Tanir LLG i kisim K135,000, Lavongai LLG i

kisim K130,000 na narapela foapela LLG tu i kisim ol alokesen bilong ol.

Em i tok tu olsem ol LLG i kisim 10 pesen go antap long edministresen gren bilong ol. Go antap i kisim manimak i go long K796,600.

Tupela bikipela rot projek we gavman bilong Mista Tohian i lukluk long ol na katim fanding i go long ol em ol wok long pinisim Namatanai-Karu rot na Lavongai ring rot long Nu Hanova Ailan.

Mista Tohian i bin tok em i givim luksave na fanding i go stret long ol LLG bikos ol i save gut long samting we ol pipel i laikim long wanem ol i wok klostu wantaim ol pipel.

Tasol em i tok samting i stap nau long han bilong ol LLG long soim olsem ol i ken yusim mani ya long karimaut ol wok na projek long helpim gut ol pipel na kisim sevis i go long ol rurel eria.

Totok bilong graun i pasim wok long Hoskins ples balus

FRED RAKA i raitim

I BIN gat singaut i go long Provinsel Edministresen bilong Wes Nu Briten long mekim sampela bikipela senis long stretim ol problem bilong graun we i bin kamap long ples balus bilong Hoskin bipo long ol i mekim wok.

Toktok i kam long dairekta bilong opis bilong Sivil Eviesen, Miria Ume i tok Hoskin ples balus i wanpela bilong ol eitpela ples balus insait long kantri we ol i bin makim pinis long stretim na wokim bikipela ol ranwe bilong ol na tu ol antap bilong rot we balus i save ron.

Mista Ume i tok mani long mekim dispela wok i bin kam long AusAID insait long wanpela progrem ol i kolim Epot Mentenens Projek (AMP).

Long 1998 nambawan wok long stretim rot bilong balus long Hoskins epot i bin

kamap we ol i bin stretim teminel biling tu.

Em i tok ol i laik mekim mentenens wok long Hoskis epot na ol arapela sevenpela insait long kantri bikos long ol hevi i stap long septi bilong operesen bilong ol balus we nogat mentenens wok long ol ranwe taksiwe, apron na ol narapela ol prolem ol balus i save kisim taim ol i laik len o tekov.

AusAID i tok orait gen long fandim namba tu hap bilong mentenens wok we ol i bin kolim olsem AMP.

Long wankain taim ol i no stretim yet wanem taim bai ol i statim wok long Hoskins epot.

Olgeta projek aninit long dispela progrem i mas pinis long yia 2002.

Mista Umi i tok ol toktok bilong graun long ol wanwan bilong ol dispela eitpela epot i ken kamap stret sapos ol i rausim ol mani.

WANTOK
NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
PNG	K 68.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

Ol nupela komiti memba bilong Is Nu Briten gavman

IS NU Briten Provinsel edministreta Hosea Turbarat taim em i tok amamas long ol nupela kabinet memba i tok olsem bos bilong pablik sevis long provins, em bai lukim olsem ol wok manmeri i karimaut wok long sevim gavman bilong de wantaim nogat sistem pasin na pret pasin long en.

"Mipela bai go het long sevim gut gavman na karimaut ol wok olsem long ol yia bipo. Bai mipela i go het long karimaut wok wantaim nogat pret na wantok sistem pasin. Tasol em i wok bilong wan wan ol nupela memba long wok bung wantaim olsem grup long lukautim dispela gutpela politikel wok kamap we dispela provins i gat long bipo yet," Mista Turbarat i tok.

"Gutpela wok kamap em i ki long provins i go gut na stat long tude, yupela olsem ol lain i wokim ol disisen bai lukim

olsem dispela i stap," Mist Turbarat i tok.

Mista Turbarat i luksave tu long man husat i bin holim sia bilong gavana, Francis Koimanrea na ol lain bilong em long ol wok we ol i bin mekim taim ol i go aps long provinsel gavman.

Lista bilong sevenpela nupela komiti na ol memba wantaim ol wan wan siaman em:

- 1- Interim Gavana na siaman bilong Fainens, Plening na Edministresen, Laipstok, Fores, Fiseris Kōmiti em Ephraim Jubilee. Ol arapela komiti memba em Henry Saminga, Daniel Towaai na Leo Dion.
- 2- Helt na Edukesen Komiti em John Topeono i siaman na ol arapela komiti memba em Henry Saminga, Lwsley Maneo na Frank Pamulke.
- 3- Trenspot na Woks siaman em Philip

Kameng. Ol arapela memba em Leo Orong, Daniel Towaai na wanpela moa bai makim sios.

4- Humen Risos Developmen Komiti siaman em Joseph Barau taim ol arapela memba em Benson Tarara, Henry saminga na wanpela moa i makim ol meri.

5- Komyuniti Developmen, LLG na Jastis siaman em Onias Tomano na ol arapela memba em James Agi, Leslie Maneo na wanpela moa bai makim ol yut.

Long Komes, Tred na Turisim komiti Ereman Yareng em siaman na ol arapela em Daniel Towaai, Leslie Maneo na narapela moa bai makim ol yut.

Dominic Konanailu em siamn bilong Infomesen na Komyunikesen komiti na ol arapela memba em long Otto Solong, Levi Sorong na narapela moa i makim sios.



IS Niu Briten makim ol nupela opisa

INTERIM Gavana bilong Is Nu Briten Ephraim Jubilee i makim ol nupela eksekutiv long provinsel gavman bilong em.

Insait long nupela senis, ol i rausim Siaman bilong Lokol Level Gavman na Pablik Sevis Siaman James Agi, foma Woks na Trenspot siaman Henry Ningo na foma Infomesen na Komyunikesen Siaman Otto Solong.

Mista Jubilee i tok em i toktok wantaim nupela gavana Leo Dion bipo long en i kamapim ol senis.

Em i tokim ol nupela siaman olsem bikos long gutpela wok ol i mekim insait long wan wan LLG bilong ol, ol i kisim ol dispela wok.

Tasol em i tokim ol olsem bikipela hatwok moa i stap na ol i mas skruim gutpela na hatwok bilong ol.

Em i tokim ol olsem pablik na ol pipel insait long eria we ol i makim bai lukluk long ol i no olsem tasol ol ilektet lida tasol ol bai lukluk long pasin na praitvet laip bilong ol.


"Mi tokim yupela pinis insait long

wanpela toktok bilong mi olsem pablik i wok long glasim gut yumi ol ilektet lida. Wanem samting yumi wokim em yumi mas tingting gut pastaim long posisen we yumi holim olsem ol lida," Mista Jubilee i tok bihain long em i tokaut long nupela kabinet.

Mista Jubilee i holim siaman bilong Fainens, Plening na Edministresen, Laipstok, Fiseris na Fores.

Presiden bilong Balanataman John Topeno i kisim bek sia olsem Helt na Edukesen siaman taim Philip Kameng bilong Sentrel LLG presiden i kisim Trenspot na Woks. Kokopo taun bos Onias Tomani i kisim Komyuniti Developmen, LLG na Jastis siaman.

Is Pomio LLG Presiden Ereman Yareng i kisim Komes, Tred na Turisim na Dominic Konanailu i kisim Isia bilong bosim nfomesen na Komyunikesen, James Tapele i kisim Lens na Fisikel Plening na Joseph Barau i kisim Humen Risos Developmen we pastaim ol i save kolim long Pablik Sevis long en.



SEPIK NIUS



Ol marasin i no go long Nuku

24 BOKIS marasin ol i bin makim long go long wanpela Gavman ed pos long Nuku long Sandaun Provins i bin stap nating olsem tripela mun long Aitape.

Ol bokis ya i gat ol marasin na samting bilong yusim long ed pos olsem ol antibiotik, ol marasin bilong sua na marasin bilong stapim malaria.

Nogat ol planti medikel saplai na ol ed pos i bin pas na ol sik manmeri long ples i no bin kisim marasin.

Helt ekstensen opisa long Nuku helt senta, Bojo Masube i tok nogat wanpela samting i kamap bikos

nogat mani long baim balus long kisim ol marasin i kam long Nuku.

Dipatmen bilong Helt long Pot Mosbi i bin salim ol marasin i go long Sandaun Provins we ol marasin i mas go hariap long Nuku.

Ol dokta long Raihu rurel hospitel i bin toktok wantaim provinsel helt edvaise long Vanimo na ol i tokim em olsem sapos ol i no salim marasin i go hariap long Nuku helt senta, bai ol i salim i go bek long Vanimo.

12-pela ed pos insait long rurel eria bilong Sandaun Provins i bin kisim taim tru taim marasin i bin sot.

Pipel mas lukaut long ol bisnis lain

BIKPELA tok lukaut i go long ol papagraun bilong Is Sepik long sait bilong solwara long ol i mas lukaut long ol man bilong narapela hap husat i laik kam na kisim ol pis na ol narapela ol samting long solwara insait long provins.

Dispela tok lukaut i kam long wanpela praivet konsalten long Kairiru ailañ, John Samar.

John i tok ol lain i save stap long nambis bilong Wewak na ol kostel vilis olsem Turubu, Wewak, Boiken na dagua i mas lukaut gut taim ol i mekim bisnis wantaim ol nupela investa.

Mista Samar i tok ol pipel long nambis bilong Is Sepik i mas luk-save long ol problem i kamap long bipo olsem dispela Tuna Keneri ol i tok bai ol i kamapim

long Yawasoro we ol papagraun i bin nogat sea long dispela multi milien kina jon vensa agrimen namel long ol FCF bilong Taiwan, Starkist bilong USA na ANGCO bilong PNG.

Mista Samar i singautim olgeta papagraun long Is Sepik long wok bung wantaim long helpim ol yet na ol bisnis kampani bilong ol Bismak Fising Kampani (BFC) long painim wanpela jon vensa patna long kisim ol risos bilong solwara long helpim ol yet.

Em i tok ol ris risos bilong solwara i olsem gol i kam long han bilong God na i go long ol kostel na ol pipel bilong ailan na ol wantaim ol ailan pipel i mas traim long lukautim gut.

Em i tok taim olgeta gol na oil

i pinis long PNG bai ol samting long solwara bai stap yet inap long God antap i draim olgeta wara long solwara.

Wanpela Gavman Minista bilong bipo, Sir Hugo Bergusher i statim wanpela jon vensa kampani long kisim ol pis na kampani ya ol i kolim Sepik Si Prodaks (SSP) Limitet wantaim Is Sepik Provinsel Gavman na dispela kampani bai statim operesen bilong em long liklik taim tasol long kisim ol marin risos bilong ol wara bilong Is Sepik Provins.

I gat bilip olsem SSP i no bin askim BFC husat i bosim olgeta papagraun long nambis na ailan distrik bilong Is Sepik na ol arapela papagraun long baim sea insait long SSP Limitet.

Wutung papagraun askim gavman long rausim ol OPM paitman

FELIX RAMRAM i raitim

OL papagraun bilong pels Wutung, Wes long Vanimo taun i gat bikpela wari long bungim hevi long bodi bilong ol. Na i singautim PNG Gavman long mekim sampela samting hariap na rausim ol OPM paitman husat i wokim pes bilong ol i stap long het bilong wanpela liklik wara klostu long ples Wutung.

Ol pipel bilong Wutung i tokaut olsem planti taim ol i save bungim ol OPM paitman antap long het bilong dispela wara.

Na pipel i no amamas long pasin na sindaun bilong dispela ol lain, bikos ol i pret bai ol Wutung asples i bungim planti kain sik taim ol i yusim wara.

Wanpela papagraun husat i no laikim wantok i kutim nem bilong em i tok, Wutung pipel i save yusim dispela wara long dring, kukim kaikai, wasim ol kolos na tu long waswas.

Na pasin ol dispela lain i sindaun antap long het bilong wara i kamapim pinis belkros pasin namel long ol Wutung pipel na dispela lain OPM paitman.

"Mipela tu i no klia, watpo na gavman i salim ol dispela rait Skwat Plis i kam sindaun klostu 3-pela wok lida long Wutung.

Sapos Gavman i salim ol long kam mekim wok, orait Gavman i mas givim ol oda long mekim wok. I nogut long ol i kam stap nating na wetim ken Gavman long givim ol toksave long wanem sam-

ing ol bai i mekim.

"Ol hevi i stap, na dispela liklik lain OPM paitman i sindaun insait long Papua Niugini na olsem tasol Gavman i mas yusim rait Skwat Plis long go insait na holim pasim ol, Wutung papagraun i tokim Wantok.

em i go het na i tokaut tu olsem, ol narapela lain wantaim tu ol pipel bilong Wutung i gat save long husat PNG man na ol lain i save yusim ka bilong ol long helpim wok bilong ol dispela OPM paitman i go kam long ol rot bilong Vanimo wes kos na Vanimo Bewani rot.

"Sapos ol samting i no go gut wantaim tingting bilong mipela Wutung pipel, bai mipela i helpim Gavman long holim pasin ol papa bilong ol dispela ka.

Mipela i bilip bikos i gat ol dispela kain fri helpim ol raskol ami ya i save kisim. Olsem na ol i go hetim moa moa pait bilong ol egensim Indonesia. I gutpela ol i ken go bek long graun bilong ol yet na pait wantaim birua bilong ol", papagraun bilong Wutung ya i tokaut.

Ol narapela sait ripot, 400 ronawe manmeri na pikinini husat i bin kam insait long Vanimo klostu 5-pela wik i go pinis i bin muv aut long Holi Cros Komyunti Skul i go long nupela graun bihain long ol i bin samapim 41 haus sel.

Las wik tasol Gavman i bin givim K17,000 i go long Katolik Misin long Vanimo long lukautim ol dispela ronawe manmeri.

Ovasis helpim long ol sunami lain i stap long hevi

ADAM ELLIOTT i raitim

FUTJA o bihain taim bilong ol projek insait long ol sunami eria long Sandaun provins we ol intenesenel ejensi i fandim bai bungim hevi bihainim wanpela miting we i bin kamap long Aitape long dispela Mande.

Foti komyuniti lida bilong Malol i stap long Amu i bin bung wantaim Aitape/Lumi distrik etministreta Martin Salmartin na distrik edukesen opisa Robert Miroi.

Malol komyuniti ya i no bin laik long givim bek wanpela dingi na autbot moto we ol bin kisim long Aitape Rihabilitesen na yusim long ol restoren wok.

Komyuniti long Amu i bin tok ol i no kisim bikpela helpim na tu ol i no lukluk gut long ol wari bilong ol.

Mista Salmartin i bin tokim ol lain long miting olsem gavman i no inap long helpim ol pipel na olsem em ino nap long stretim singaut bilong ol long wanpela ka na bot long en.

Bilong makim maus bilong ol Amu lain, Otto Klami na Jack Taingo i bin tok ol i laikim wanpela bot na ka bilong kisim i go na i kam ol sik man-

meri na ol lain i kisim birua i go long Raihu Haus sik long en. Amu i stap 40 kilomita longwe long Aitape.

Distrik edukesen opisa Mista Miroi i bin tok dispela samting bai kamapim moa hevi bikos long nau, plen i stap pinis long ol intenesenel dona ejensi i givim K1 milien bilong helpim ol wes kos Aitape eria long en.

Mista Miroi i bin tok em i traim hat long kisim dispela fanding bikos nesenel, provinsel na distrik gavman i no inap long givim helpim.

Em i tok em i luksave long nits bilong ol pipel tasol sapos ol pipel i laikim helpim i kam long ol intenesenel ejensi, pasin bilong ol tu i mas stretpela.

Aninit long namba wan hap bilong rihabilitesen progrem, ol Amu pipel i kisim pinis tupela dabel klasrum, wanpela etpos na sevenpela haus bilong ol woklain.

Em i tok aninit long namba tu hap, ol inap long kisim narapela tupela dabel klasrum na foapela moa haus tisa.

Bikos mak long ol pipel i bin go antap stat yet long Julai 17,1998 sunami birua, ol i nitim ol dispela ekstra klasrum na haus tisa long en.

TOYOTA

4X2 SINGOL KAB

2.4 Lita Diesel • 4 Silinda engin • 5 Spid Manuel Transmisin, na planti moa.

SPESOL OFA !

K500 KAS SKUL FI

LONG KISIM MOA TOKSAVE LUKIM
MIPELA LONG ELA MOTORS
BRENS KLOSTU LONG YU

PORT MORESBY PH 3229400
LAE PH 4722322
KOKOPO PH 9829100
MADANG PH 8522188
GOROKA PH 7321844
MT HAGEN PH 5421888
WEWAK PH 8562255
KAVIENG PH 9842788
KIMBE PH 9835155
TABUBIL PH 5489060
VANIMO PH 8571254
PORGERA PH 5479367
BUKA PH 9739915
LIHIR PH 9864099
ALOTAU PH 6410100

Ela Motors
TOYOTA

WHEELS FOR THE NATION
VISIT OUR WEBSITE - <http://www.ela-motors.com.pg>

HARIAP! NOGUT OFA PINIS!

AGC APPROVED FINANCE AVAILABLE

BITIM PRAIS I GO ANTAP!


EM7025



SAUTEN



RIJON



Not Flai plis bai sekim ol Wes Papua lain

IAN KAKARERE i raitim

NOT Flai plis bai sekim ripot we i tok ol Wes Papua lain i wok long pulim pis long Flai riva insait long hap bilong Westen provins. Na tu ol bai sekim ol samting long Wes Papua boda lain husat i wok long kam stap long sait bilong Papua Niugini.

Not Flai Provinsal Plis Komanda, Sief Inspekta Saibu Ako i tok ol asples lain i wok long boda i wok long komplem olsem ol Wes Papua lain i wok long kam pulim saratoga pis long ol wara long hap bilong Flai riva.

Mista Ako i tok ol kaunsil lida long Boset ples i raitim pas i go long Kiunga plis na autim ol dispela komplem.

Em i tok kaunsil long Manda ples i bin oraitim ol Wes Papua lain long kam pulim pis long ol wara klostu long Mandā ples tasol ol ples lain long Manda i no amamas long dispela disisen bilong kaunsil bilong ol long oraitim ol Wes Papua lain i kam kisim pis bilong ol long kaikai.

Mista Ako i tok tupela ples lain wantaim i brukim lo bilong tredisenel boda krosa (lo we ol asples i gat famili na graun long tupela sait bilong boda i ken raun i go kam).

Ol i brukim dispela lo long pulim ol pis na salim long ol bikpela fektori na maket long Wes Papua we ol i save kisim bikpela mani long en.

Em i tok i gat wok bilong sekim tu 300 lain manmeri bilong Wes Papua husat i kam stap long lain saksak bilong ol Komovai ples lain.

Mista Ako i tok ol plisman bai i go lukluk insait long ol dispela hevi nau bikos Sauten Divisenel hetkota i givm mani bilong baim ol fiul na baim ol arapela kos bilong go het long mekim ol dispela wok.

Long Fraide tumoro bai Mista Ako i welkamim nupela Not Flai Provinsal Plis Komanda Eugene Uga. Mista Ako bai trensfea i go long Oro provins we em bai kamap Oro Provinsal Plis Komanda.

Long dispela taim tu Saut Flai Provinsal Plis Komanda Suprintenden Norman Kambo i stap nau long Mohed distrik long sekim ol ripot we it ok ol Wes Papua lain i kalapim boda i kam insait long ol eria bilong Bula na Bensbek wara.

Plis holim 14 kalabus lain

PLIS long Mosbi i holim pinis 14 kalabus lain husat i bin ronawe long Bomana haus kalabus long krismas taim. 18 kalabus lain i bin ronawe long dispela taim.

Long las wiken plis i bin holim tripela. Tupela bilong ol dispela lain we plis i holim ol em plis i tokaut olsem ol i gat nem long ol bikpela trabel na ol inapo kamapim ol bikpela trabel long komyuniti.

NCD Sentrel Plis Komanda Asisten Komisina Tom Kulunga i tokaut olsem reid ol plisman i bin karimaut long wiken i bin gutpela tru na ol plisman bai mekim reid yet long traime daunim ol raskol pasin na trabel insait long siti.

Mista Kulunga i tok Jimmy Russel Ava husat i gat 25 krismas bilong Maroa ples long Galp provins i bin sevim 5-pela krismas long kalabus long trabel bilong holim na bagarap meri. Plis i holim em long Sarere.

Mista Kulunga i tok ol dog yunit skwat bilong plis fos wantaim tupela woda i bin go long Sabama long Sarere bikmoning na holim Ava taim em i bin slip i stap.

Komanda i tok narapela kalabus

man em John Laika Hetau, krismas bilong em 18 bilong Barakau ples long Sentrel provins tu em plis i holim em long Sarere long Malaoro supamakem taim em bin raun long hap i stap we ol plis dok yunit i holim em. Hetau i bin ronawe long Boroko plis sel long Desemba we plis i bin holim em long kilim man i dai.

Mista Kulunga i tokaut tu olsem plis i holim Paul James Maia krismas bilong em 30 bilong ples Sopa long Tapini Sentrel provins. Ol woda husat i helpim long karimaut dispela opere-sen bilong painim na holim bek ol lain i bin ronawe long Bomana haus kalabus Desemba i luksave long em olsem wanpela bilong ol lain i bin ronawe long banis kalabus.

Mista Kulunga i tokaut olsem ol i holim pinis 14 kalabus lain olgeta husat i bin ronawe long Bomana haus kalabus long mun Desemba.

Mista Kulunga i tok ol plisman bai wok strong long holim ol raskol long traime daunim ol bikhet na raskol pasin insait long siti tasol bikpela helpim na sapot tu i mas kam long ol pablik manmeri.

Wailas bilong helpim turis na Koiari pipel

REDIO netwok long Kokoda Treil em ol apim nau i go antap olsem 10-pela bes Redio Stesin nau.

Dispela em 3-pela viles bes redio long Kagi, Efogi na Manari olgeta insait long Koiari eria insait long Sentrel provins.

Siaman bilong Koiari Developmen Atoriti (KDA) Mista Garry Imiri husat em kam bek bihain long em sekim ol redio stesin i tokaut long dispela.

Dispela ol redio komunikesen long trek em i wanpela program we KDA save go pas long en.

Dispela program em sem olsem ol arapela developmen program we Australia save putim long Edpos, klasrum na ol arapela sevis projek long ol Aid program.

Em wanpela wok bilong KDA long strongim gavman sevis i go long ol Koiari pipel.

Mista Imiri tok, em i amamas tru long Australia i gat bikpela laik long ol Koiari pipel long dispela sapot na we

bai strongim prensip bilong ol.

Koiari Lokol Levol Gavman presiden Vovo Selu em i tok tenkyu tu long Australia Gavman long wanem wok ol wokim na mekim long ol pipel bilong em olsem long ol pipel insait long bikmaus olsem long Mt Koiari eria.

Em i tok, KLLG i nogat inap mani bilong ol bikpela projek olsem na Aid mani em gutpela tru long ol ples lain na ruel eria.

Tasol em laik ol pipel mas lukautim ol dispela samting gut na yusim gut. Dispela projek em Australia gavman i fandim tru long Australia Difens Fos Staf long Pot Mosbi na em kos olsem K60,000.

Dispela bes Redio Stesin bai givim planti help long ol pipel long ol ples na ol pipel husat ol save wokabout long trek. Ol bai yusim long mekim wok sekim wantaim ol bos lain bilong ol long olgeta poin na long ol ples.

Em bai minim olsem olgeta bikpela ples long treil bai i gat redio stesin.,

Gavman skelim wari bilong Koiari pipel

KENNEDY EDENE i raitim

DEPUTI Gavana bilong Sentrel provins Aih Ikupe tokaut long ol Koiari pipel bai gavman bilong em bai givim helpim long stretim wari bilong ol long wok bilong Koiari Developmen Atoriti (KDA).

Mista Ikupe bin mekim dispela tok las wik taim ol Koiari pipel na ol lain opisa bilong em bin holim wanpela miting long opis bilong em long Konedobu.

Em tok, gavman bilong em nau redi long helpim ol. Ol mas statim kontrak wantaim Provinsel Afeas na viles sevis dipatmen long painim aut rot long stretim wari bilong ol pipel.

Em i tok dispela em laik bilong ol pipel, Sentrel Provinsel Gavman bai stretim long gutpela we em bai painim. Tasol em i tokim ol pipel, ol mas givim wanem gutpela infomesin long opis bilong em, long ol opisas bilong em bai wok long en.

Na tu em tokim ol Koiari olsem, opis bilong em bai i no inap hariap long saspensim ol KDA bod kwik taim na makim nupela.

Em tok dispela bai kisim taim, ol bai traime na painim gut long as bilong trabel bipo ol saspensim ol bod.

Mista Ikupe tok raitpela we o lo bai ol i bihainim long stretim wari bilong ol pipel. Ol pipel bin autim sampela wari long i wok bilong ol bod we Ikupe tok bai ol i lukluk long em tu.

Mista Ikupe i givim ful oda long ol opisa bilong em long glasim gut ol hevi na stretim wari bilong ol pipel.

Bai ol i setim ol long bung wantaim minista bilong Provinsel na Lokol Levol Gavman. Em bai olsem 7 de taim long dispela wik.

Koiari Developmen Atoriti em ol kamapim long 1992 taim ol Koiari pipel i wokim wanpela bikpela protes mas na Provinsel Afeas na Viles Sevis Dipatmen bin givim ol.

KDA em ol gavman putim long helpim ol Koiari pipel long givim gutpela gavman sevis long ol.

3-pela Koiari deligeits husat i bin kamap long dispela miting em. Grasruts Koiari Pawa Muvmen we Peter Inara em go pas, NCD Koiari Yuts em Paul Noa i go pas na Koiari Afeas dispela grup em Geoffrey Meia i makim.

Koiari Lokol Levol Gavman em presiden Vovo Selu na vais bilong em Kidu Toina bin makim.

Tasol tupela i no toktok, ol stap tasol long ol taim bilong toktok. Long dispela miting tu, ol dispela 3-pela grup nau ol bung wantaim na wok wantaim long wanpela tingting long stretim ol wari bilong ol pipel. Neks miting bilong ol em long dispela wik long Fonde o Fraide wantaim Provinsel Afeas na Viles Sevis.

Bai ol i konfemim long Provinsel Gavman tru long Koiari LLG.

Niu Yia

BOROKO
FOODWORLD
AT GORDONS

Spesols!

Three Cooks Oil 500ml	K1.68
Bushells Tea 125gr	K0.89
Weet Bix 375gr	K4.06
Hiway Beef Biscuits 130gr	K0.60
Nambawan Cordial 2ltr	K3.75
B29 Detergent Powder 200gr	K1.30

Supa
Spesol
Prais!

Globe Curry Chicken 300gr	K2.30
Bluebird Sardines 425gr	K1.98
Roots Rice 1kg	K1.55
Fabulous Pork Luncheon 340gr	K2.34
Steelo Steel Wool 5's	K1.28
Maggi Noodles 85gr	K0.50

EXTENDED TRADING HOURS

Monday to Wednesday	- 8.00am to 7.30pm
Thursday / Friday	- 8.00am to 8.00pm
Saturday / Sunday	- 8.00am to 7.00pm

Selebretim Niu Yia long Boroko
Foodworld Supa Krismas Spesol!

Planti moa kaikai prais i go daun long en!

Ph: 325 7566, 325 0863 Fax: 325 7096


HAILANS NUIS

Nupela kalenda bilong grisim bisnis na turis i go long Westen Hailans provins

PEKU PILIMBO i raitim

Gavana bilong Westen Hailans, Pater Robert Lak givim aut pinis kalenda bilong Westen Hailans provisel gavman. Kalenda i bilong dispela yia na i makim ol kainkain wok developmen we i wok long kamap nau insait long provins.

Dispela em i nambawan taim provinsel gavman i bin kamap wantaim wanpela kalenda. Dispela kalenda i traim long bringim ol kainkain nupela wok bisnis i kam insait long provins. Dispela kalenda bai tu traim long kisim ol turis bilong narapela kantri long i go lukluk raun long provins nqa wanem narapela kain kastom na pasin em Westen Hailans i gat insait long ol distrik.

Dispela kalenda i soim ol kainkain pasin, pipel na wei bilong bilas insait long Westen Hailans provins na dispela kalenda bai kamap olsem wanpela rot we provins i ken pulim bisnis na turis long i go insait na Pater Lak i bin tok olsem dis-

pela kalenda bai ol i givim aut i go long wanwan skul, gavamn stesen na narapela pipel bai olgeta manmeri i ken lukim na surikim tok olsem Westen Hailans em i wanpela naispela provins.

"Olgeta pipel bilong Westen Hailans i lukim na save long wanem samting gavman bilong mi i mekim. Mi save olsem i gat planti arapela samting mipela bai mekim tasol sampela samting mipela putim pinis i soim wanem kain gavman mi i go pas long en," Gavana Lak i tok.

Em i tok long 2020 Lukluk bilong em, em laik lukim olgeta manmeri insait long provins i kisim gutplea kaikai na sevis. Em i tok long kisim dispela kain sevis, gavamn bilong em bai traim bes long kamapim ol samting olsem helt sevis, edukesen, stretim rot na bris na putim ol yangpela na meri i kam insait long wok bilong developim provins.

Em i tok ol bikipela projek we i go het insait long provins bilong em, em long ruel elektrifikesen projek, ruel wara saplai projek na putim planti mani i go insait bilong stretim ol haus sik na helt

senta i stap insait long provins.

Gavana Lak i tok ol dispela projek na narapela liklik samting bai inap helpim long kisim provins na ol bai lukluk long dispela 2020 visen bilong provins na stretim sindaun bilong olgeta manmeri husat i stap insait long Westen Hailans provins.

Em i tok ol niuspepa na redio na televisen i save givim nem nogut i go long Westen hailans provins na tu long olgeta kantri hap bilong PNG tu.

Em i askim olgeta nius manmeri insait long kantri long lukluk long olgeta gupela sait bilong kantri na traim kamapim sampela toktok bilong kisim bisnis na turis i kam insait long kantri. Sapos nius manmeri na gavana i wok bung long dispela, ating bai inap i gat sampela senis i kamap long kantri.

Gavana Lak i tok dispela kalenda bai traim long poinim aut ol gupela sait bilong Westen Hailans provins na traim long grisim ol manmeri long ovasis na insait long PNG tu long i kam insait long provins bilong lukluk raun olsem turis o bilong kamapim wok bisnis.

Kot bai stretim Goroka taun wara saplai kros

GOROKA Eben Lokol Level Gavman i tok i moabeta long kot i stretim dispela kros we ol sikspela viles i stap klostu long taun long wara saplai we Goroka taun i kisim long en.

Bos bilong Goroka taun Michael Gotaha i tok bikos tupela sait wantaim i no kamap wantaim wanpela gupela rot long pinisim hevi, samting i stap nau long kot bilong stretim.

Em i tok em laikim dispela samting i mas stret hariap na olsem kot yet i mas wokim dispela.

Em i tok wara em wanpela sevis we kaunsil i save givim i go long ol pablik i stap long Goroka taun. Na Kaunsil i gat sampela ol arapela samting we em i wok long lukluk tu long en bilong stretim.

Zuakave Developmen Asosiesen i makim maus bilong ol ples lain long singaut bilong ol long kisim moa kompensesen peimen long K10,000 mak we ol i wok long kisim long nau. Ol i laikim kompensesen peimen mak i go antap long K50,000 insait long wanpela yia.

Ol ples we i wok long singaut long moa kompensesen peimen em long Kaveve, Nupaha, Samagoni, Aratiyufa, Kameyufa na Komiufa.

"Mi tokorait long givim ol 100 pesen i go antap long singaut bilong ol bikos em inap long ol i kisim dispela mak i go antap. Na kot i no rausim dispela tok orait bilong mi," Mista Gotaha i tok.

Em i tok wanpela ples i tok orait long dispela mak i go antap na olsem em i askim ol narapela long bihainim ol.

Ples ya em Aratiyufa we i stap klostu tasol long wara saplai eria.

Mista Gotaha i tok ol i no laik brukim nabaut ol ples na mekim ol i pait namel long ol yet.

Em i tok taim ples Aratiyufa i sanap strong long tok yesa long mak i go antap, em i soim olsem ol ples ya i no sanap wantaim wanpela tingting long dispela samting.

Em i tok singaut long K50,000 kompensesen mak i antap tumas tasol bihainim lo long wara we i stap long graun bilong stet o gavmantasol peimen ya em i bilong givim luksave long ol pipel i no bagarapim wara long en.

Tasol em i tok dispela ol samting em ol i bilong gavman na sapos ol ples lain i bagarapim, ol bai kisim mekim save long han bilong lo.

Rui bris pasim sevis long Mul Baiyer ilektoret

JOE KANEKANE i raitim

Ol pipel bilong Mul-Baiyer ilektoret long Westen hailans i kisim taim ihain long wara i karim Rui bris na topim rot bilong ka.

Gavman Sevis long Baiyer stesen, i kopi na ti plentesen i wok long isim bikipela mani stat long dispela evi i kamap.

Ol ripot i ken long Mt Hagen i tok lsem woks dispela i traim long streim dispela hevi tasol ol pipel long ap i wokim long kompensesen.

Ol Moge lain wanpisin i askim long K50,000 kompensesen pasim long wok i ken kamap long

dispela hap.


Planti ol lain i save yusim rot long Kwip eria, na tu long Dei Kaunsil we, em i save kisim ol longpela taim long go long Hagen.

Prodaksen long Minjikina ti plentesen tu i luk olsem i go daun, long wanem fuel ka i hat long go long dispela hap.

Kampani i yusim ol arapela rot tu em i yusim ol wokim long karim ol ti bek i go i kam long arapela sait bilong bris.

Tupela Hai Skul, Notre Dame na Kombolopa bai pas inap long taim nupela bris i kamap gen.

Woks opis long Mt Hagen i laik piksin bris tasol ol len ona i laikim kompensesen pastaim.



Stap outsait!
 • Ol papagraun i stap outsait long banis. Ol sekuriti i pasim dispela ol woklain long wanem planti trabel i kamap long dispela hap. Foto: JOE KANEKANE.

WINIM K500

with

HI-WAY



Strongpela Bisket!




Paradise BEEF THE BIGGEST! 140g NET

Back to School with Hi-WAY Biscuits.
 Your chance to win K500 towards 2001 school fee
 There will be one (1) lucky winner in each province.

To enter, send in 3 empty wrappers of Hi-Way Beef or Hi-Way Hardman biscuits to:
 Hi-Way Back to School Locked Mail Bag,
 Boroko, NCD, or drop your entry in box at participating stores.





MADANG NUIS



Olgeta elementri tisa bilong Madang i kisim trening

MADANG Provinsel elementri seksen bai holim gen wanpela trening woksop long trening ol elementri tisa long sikspela distrik bilong Madang.

AusAID i fandim dispela woksop long K200,000 na ol yet bai ronim dispela woksop long Baitabag stesin we i stap outsait long Madang taun.

Trening bai kamap long Gut Seped Hai Skul long Not Kos rot bilong Madang.

Provinsel Elementri Kodineta, Clement Awan i tok trening i kamap long Januəri 8 na bai pinis long Februəri 27 we bai lukim ol tisa long Midel Ramu, Bogia, Usino-Bundi, Sumkar, Saidor na Madang distrik yet.

Mista Awan i tok ol tisa husat i bin mekim yia tu long 2000 em bai ol i mekim yia tri trening long dispela yia na yia wan tisa long 2000 bai mekim yia tu long dispela yia. Tasol em i askim ol nupela tisa long wet na putim yau tasol long Redio Madang long harim ol nem bilong ol long mekim yia wan trening.

Ol tisa husat i kam long trening i kam wantaim ol samting bilong katkai na silip.

Mista Awan i tok strong olsem ol famili memba o wantok bai i no inap long go stap wantaim ol tisa long taim bilong trening.

Em i askim tu ol komyuniti we ol tisa bai kam

long en long sapatim ol tisa long mani na samting bikos ol tisa bai kisim save na go bek long komyuniti long tism ol pikinini bilong ol.

AusAID i save givim planti helpim long ol wok bilong elementri skul long provins na Mista Awan i tok ol lokal level gavman na ol nesanel memba bilong Palamen i mas helpim ol elemtri skul long ol distrik bilong ol.

Ol sikspela distrik insait long Madang inap long kisim 400 ol elementri tisa tasol ol bikman long Nesanel Elementri Dipatmen long Mosbi i tok ol i no inap long kisim moa olsem na ol i gat 250 tasol ol elemtri tisa.

Woksop bai lukim olsem 235 ol tisa i go long dispela trening na Mista Awan i tok ol komyuniti i mas makim ol tisa gut long kam na kisim ol trening bilong ol.

Em i tok i save gat hevi taim ol komyuniti i no save makim gut ol tisa na ol tisa i lusim skul bilong ol.

Kain hevi bin kamap long Saidor distrik na Mista Awan i tok em i no laik bai wankain pasin i kamap gen.

I bai gat 12-pela teknikel trena long dispela woksop.

Pasto singautim ol sios memba

PASTA Francis Ambuk bilong Evajelikel Lutren Sios long Madang i bin askim ol memba bilong Sios bilong em long wok bung gen long dispela yia long strongim bilip bilong ol.

Em i tok las yia em i bin wanpela hatpela yia na Sios i bin painim planti hevi.

Pasta Ambuk i singautim olgeta eitpela ol seket na ol lida bilong ol long wok wantaim em long ronim Sios gut.

Pasta Ambuk i presiden tu bilong Lutren Sios long Madang na em i askim olgeta pasta, hetmanmeri na ol yut lida long wok strong long helpim Sios bilong ol bai Sios bilong ol i go het moa.

Em i tok ol kongregesen long wanwan seket i mas lukautim gut ol baset mani bilong ol we ol i ken yusim gut insait long ol distrik bilong ol.

WVI helpim ol ples lain

HORIRI Lumi em i wanpela laki mangi bikos ol Wol Visen Intanesenel husat i kamapim wanpela projek long ples Uya we em i stap long en i bin helpim papa bilong en long baim skul fi bilong en long go mekim gred tu long Erima long Bugati.

Projek bilong Wol Visen ol i kolim Ogea Eria Developmen Projek (ADP) i kamapim ol projek olsem wara na ol narapela ol liklik samting bilong helpim ol pipel long ples.

Liklik Horiri i gat 12-pela krismas tasol na em i hap Raikos na Bugati tasol mama bilong em i bin dai pinis na papa tasol i stap na i wok hat long helpim em.

Wanpela projek opisa bilong Ogea, Dodi Mokson i tok i gat tripela projek long han bilong ol nau we ol i kolim olsem Ogea, Bogajim na Finstrate Begesin.

xtripela eria olgeta long bringim ol savis long ol pipel long ples.

Ogea ADP i bin stat pastaim long Uya long 1997 i kam inap las yia na bihain wok i go long Dogia, Garim, Naru, Diduala, Bauri na Saiba.

Mista Mokson i tok Ogea ADP bai pinis long Jun long dispela yia na bai ol i lukluk long narapela eria long ronim narapela program.

Mista Mokson i wok wantaim Ogea ADP olsem faivpela yia na kontrak bilong em bai pinis long dispela yia.

Nogat tok pait long 2001 baset bilong Madang

LYNNE MINIRU i raitim

NOGAT wanpela man o meri insait long Madang Provinsel Asembli i bin kirap na tok egen-sim baset bilong 2001 taim ekt-ing siaman bilong Fainens na Plening na memba bilong Raikos, Stahl Musa i givim baset toktok long Madang Asembli.

Dispela em i nambawan taim tru long histori bilong provins long kain samting long kamap long Madang Asembli long sait bilong pasim bikpela baset bilong provins.

Wanpela opisa long opis bilong Gavana husat i bin stap insait long miting bilong pasim baset i tok olgeta lain husat i bin stap insait long miting i bin putim wanpela tingting na pasim baset na dispela i mekim miting bilong baset i sotpela stret.

Madang Provinsel Asembli i bin pasim 2001 baset bilong em we mak bilong mani i stap olsem K43.7 milien.

Nesanel Gavman i bin givim 79.3 pesen bilong baset olsem nesanel gren na 20.7 pesen olsem mani provins yet i bin kamapim.

Madang Provinsel Gavman i mekim promis pinis olsem em bai givim moa long K2.9 milien

olsem gren mani i go long wanwan bilong ol lokal level gavman na eben LLG long bihainim toktok i stap long Ogenik Lo.

Long nambawan taim bai Madang Provinsel Gavman i helpim ol dispela LLG husat i no inap long givim dispela K200 long ol wod memba bilong ol long wanwan mun olsem ol alowens bilong ol na bungim wantaim bai provinsel gavman i givim K99,800.

I gat tupela nupela lokal gavman kaunsel ol i kolim olsem Nayudoand Kovon na Gama na Nayudoand bai kisim sampela mani long 2001 baset tasol Gama bai nogat bikos i nogat graun na ol narapela samting olsem rot na bris.

Provinsel gavman i save givim mani long ol vilis kot long wanwan yia na baset bilong 2001 i bai fandim tupela nupela vilis kot long Usino-Bundi na Midel Ramu.

2001 baset bai lukluk tu long ol elementri na komyuniti skul we dispela i save givim bikpela hevi long ol lokal level gavman.


Long rausim sampela hevi long han bilong ol lokal level gavman, provinsel gavman bai fandim ol sab helt senta na ol ed pos na pe bilong ol komyuniti helt woka.

Siaman Musa i bin tokim provinsel asembli olsem Madang Provins i bin sainim wanpela "Sata ov Agrimen" wantaim Nesanel Gavman long sait bilong developmen na dispela sata bai mekim stret ol rot we wanem ol developmen i kamap long provins bai stap namel long Nesanel Gavman na Provinsel Gavman.

Em i tok nambawan yia bilong faivpela yia plen bai ol i putim i go insait long ol projek na ol program we ol i bai kisim mani long rurel developmen fand, rurel eksen program na sata developmen program.

Mista Musa i askim olgeta Nesanel Memba bilong Palamen insait long Provins wantaim ol presiden na ol distrik administreta long wok bung wantaim long kisim mani long kamapim stret-pela developmen insait long ol distrik.

Ol bikpela eria we Provinsel Gavman bai lukluk long en em infrastraksa developmen olsem ol bris, rot na ples balus, ekonomik developmen olsem givim mani long ol olupela bisnis na kamapim nupela bisnis long bringim mani i kam insait long provins, sosel developmen olsem edukesen na helt na lukluk long sait bilong to na oda.



• Yangpela Horiri i stap long ples bilong em taim dispela man bilong kisim poto i go raun long hap. Dispela yangpela manki i no inap peim skul fi bilong em bikos Wol Visen Intanesenel bai helpim em. Poto:na stori: PAULIS TALI.

trukai.
RICE



**SAPOS NAMBA BILONG YU ISTAP LONG HIA.
YU WINEM K200**

A00800869 C00164659 B00014243 A00777298
E00861823 E00723617 C01413590
F00872755 D00189310 F00301307

LONG KISIM PRAIS BILONG YU. GO LONG TRUKAI DISTRIBUTION CENTRE.

Lae Nius

Ol Saina long Lae bai putim laion danis long Sande

ELLEN TIAMU i raitim

OL Saina husat i stap longpela taim pinis long Lae bai kirapim bek wampela pasin tumbuna bilong ol we ol tumbuna bilong ol long Saina i save mekim long planti yia i go pinis.

Dispela em laion danis we ol i save holim long olgeta Niu Yia bilong ol. Niu Yia bilong ol i narakain long Niu Yia bilong yumi na dispela de bai ol i makim long Lae taun long

Sande.

Wampela man husat i go pas long stretim dispela laion danis, Tim Wong, i tok olsem nupela yia bilong ol we bai stat long Sande em ol i kolim yia bilong sinek. Ol yia ol i save kolim bihainim kainkain enimal o abus.

Wong i tok Lae i bin holim dispela kain danis long 1981 na long dispela taim i kam inap nau ol i no bin bihainim dispela pasin.

Dispela danis we ol bai karim traipela longpela bodi bilong laion na danis wantaim

planti smok puada na simuk em bilong makim pinis bilong olupela yia na stat bilong nupela yia.

Tim Wong i tok olsem dispela danis tu ol tumbuna bilong ol i bilip olsem i save bringim gut lak na planti kaikai na bisnis bai ron gut olsem na ol i save mekim kamap long olgeta yia.

Em i tok pilai tu olsem Lae siti i bin gat planti hevi long sait bilong bisnis na gutpela sindaun long ol yia i go pinis na sapos ol i

danis nau bai dispela i senis na ol gutpela samting bai kamap gen long siti.

Ol Saina i lukautim samting olsem 37 bisnis long Lae taun.

Danis we bai kamap long dispela Sande bai stat long Chinese Club long Saina Taun, i go daun long Saina Taun, i go long Seeto & Chan long Honter o Busu, i go long Griku, bihain i go long Toptaun, i go long bikpela bris o wof, i go long Voko Poin na i go pinis gen long Chinese Club.

Redio Dokta bai stat long Morobe provins

WANPELA redio program long tok pisin bilong toktok long ol kainkain sik na ol wei bilong abrusim na pinisim bai stat long NBC Redio Morobe long namba 7 de bilong mun Februari.

Dokta husat i go pas long dispela program long Angau Haus Sik Morey Sau, " i tok ol i stat long rekodim o stretim dispela program long dispela wik na komiti husat bai lukautim dispela program bai bung long dispela wik tas long stretim sampela liklik toktok bihain long program bai go long ol manmeri long Morobe provins long mun antap.

Em i tok long namba 6 de bilong Feruari bai ol i bung long amasim dispela Redio Dokta program na long namba 7 de em nam-

bawan brodkas bilong dispela program.

Dispela program em Gavman bilong Australia o AusAid i bin givim K100,000 bilong kamapim na bai ol i ronim long 52 wik o wan yia olgeta long Morobe provins tasol.

Dokta Sau i tok sapos wok i kamap gut, ol bai lukluk long statim tu long ol narapela hap bilong Momase.

Tingting bilong kamapim dispela program em long wanem planti ol lain long ples i save sik na painim hat long kam kisim marasin long taun olsem na ol i ken stap long ples bilong ol na harim dokta i toktok long ol wanwan sik.

Ol program ya bai ron long 30 minit na bai kamap long wanwan wik.

Hevi bilong ka long rot i bikpela long Lae

OL i statim pinis wampela komiti long Lae long lukluk long hevi bilong rot o ka i bam na man i dai o ka i bam tasol.

Las wik wampela miting we i bungim ol saveman na meri long ol kainkain gavman dipatmen, bisnis na ol narapela wok tu i bin kamap long lukluk long ol rot we i ken daunim dispela hevi.

Wampela man i go pas long dispela miting, Wilson Miroi, i tok Papua Niugini em i wampela kantri we namba bilong ka i bam na ol man i dai em i antap tru.

Em i tok Lae, long wanem i lukautim Hailans na Momase i save painim bikpela namba bilong birua tu long rot.

Dispela namba wan miting bilong ol manmeri we ol i laik helpim long daunim dispela hevi i kamap long Yunitek las wik na ol i makim foapela grup long mekim wan wan wok bilong ol yet na bihain bai ol i toksave long bung bilong ol long mun antap.

Dispela foapela komiti em bai lukautim pasin bilong toksave long ol pablik, we bilong stopim o daunim ol dispela birua, kisim namba na wok skelim na lukluk long ol rot na bris.

Plis long Lae husat i bin stap long dispela bung nau i go pas long dispela komiti.

Miroi i tok ol i bin ting olsem liklik lain tasol bai kamap long dispela bung tasol ol i kirap nogut olsem planti lain i bin gat interes long dispela toktok.



STAP ISI LONG FESTIV SISEN

Papua Niugini Benking Koperesen i putim moa long 1000 EFTPOS masin long ol stua insait long kantri long mekim Krismas Shopping bilong yu i moa isi, sef na gutpela long dispela taim bilong hamamas.

Wantaim PNGBC SaveCard, yu ken kisim mani long wanem taim yu laik, long ol PNGBC EFTPOS masin.

Papua Niugini Benking Koperesen i tok Meri Krismas na Hepi Niu Ya long olgeta man, meri na pikinini long PNG.



Odinesen bilong Yunaitet Sios Eben rijen

HELEN REI i raitim

YUNAITIT Sios Eben rijen long dispela wiken bai karimaut ol odinesen bilong ol minista bilong em.

Em bai stat long Laurabada Kongriksen pastaim long dispela wiken.

Elevala Yunaitet Sios long 10 kilok Sande Januari 28 bai holim odinesen sevis bilong em. Dikon Jacob Harry, Morea Sisia na Hevaere Robert bai kisim blesing long odinesen bilong ol long sios sevis.

Koki Yunaitet Sios bai holim odinesen sevis bilong foapela diken Pasto Mea Kinibo,

Benson Hui, John Frank na Udu Kwalahu.

Long Februari 4, Baruni Yunaitet Sios bai wokim odinesen bilong Misi Aiviri.

Ol dispela man i bin wok olsem ol probesen minista na ol i wok long trense long ol kongriksen na seket bilong ol uet i go long ol narapela.

Ol Eben minista bai kirapim bek ol wok bilong ol bihain long Krismas na Nu Yia malolo long Januari 21 na 28.

Ol superintenden na sinia minista bilong wan wan kongriksen bai karimaut ol odinesen long ol wan wan seket bilong ol.

Ol Katolik yut kisim salens long bihainim wokabaut bilong Jisas



• Antap: Wanpela Katolik Yut Grup long Mosbi insait long selebren bilong pinisim yia 2000, jubili yia.

Daunbilo: OJ Yut bilong St Peter Channel Katolik sios husat i bin go pas long holim lotu long selebretim feast de bilong Santu Peter.



SALENS i go aut long ol Kristen yut long bihainim wokabaut bilong Jisas long 2001 na ol yia i kam bihain long en.

Dispela i bihainim het tok bilong Kstolik Sios kalenda long dispela yia we i givim bikpela tingting long ol yut.

Nesanel Katolik Yut Seketeri Lazarus Sopalei i tokaut long ol yut lida olsem ol bisop yet i makim het tok "Ol yut i wokabaut olsem em olsem salens i go long ol yut long Melanesia long 2001."

Tude long wol i gat planti ol supasta i kamap.

Na Mista Sopalei i singaut long ol yut lida olsem Jisas Kraism em wanpela Supasta tasol long bihainim.

Katolik yut muvmen long PNG na Solomon Ailan i wok long lukluk long ol nupela rot long daunim ol hevi we ol yut i bungim long tude.

Na Mista Sopalei i tok em i gutpela long wokim samting nau long stat bilong nupela milenium bikos long longpela taim yet, ol i wok long lukluk long dispela samting.

Dispela singaut tu i kamap long taim planti yangpela pipel i nogat wok, planti i bungim hevi long smokim spakbrus, kisim nogut ol strongpela dringna wokim ol trabel bilong brukim haus na karimaut ol stil-pasin.

Olsem na Katolik Yut Muvmeni wok long autim salens bilong ol Bisop long olgeta ol rijinel grup.

Insait long bung we ol bin holim long Goroka, ol yut lida i bin toktok long ol rot bilong kamapim ol gutpela program na ol stiatok long dispela samting insait long dispela nupela milenium

Taim ol i glasim na skelim ol program, ol yut lida i bin kisim salens long yut seketeri long askim ol yet sapos ol i wok long bihainim dispela het tok insait long ol wok na ektiviti bilong ol.

Ol yut lida bilong 16 long 18-pela Daiosis insait long kantri i bin stap insait long dispela bung.

Mista Sopalei i tok taim ol bisop i bung long anuel jenerel miting bilong ol long mun Epril, ol bai lukluk gen long yut olsem mein agenda bilong ol toktok bilong ol.

Katolik Sios long Bogenvil bai makim 100 yias

KATOLIK Daiosis long Bogenvil bai selebretim 100 yias bilong em long mun Ogas long dispela yia.

Selebren bai stat long Ogas 7 inap long de namba 10.

Bilong redim ol wok na ektiviti bilong dispela bikpela samting, Katolik Daiosis opis bilong Bogenvil i kirapim wanpela wok komiti pinis long en.

Ol i kolim dispela long Daiosis bilong Bogenvil Senteneri komiti.

Wanpela long ol komiti memba em Vika Jenerel Pater Bernard Unabali.

Em i 100 krismas nau stat yet long ol namba wan misinari i bin go kamap na planim Tok bilong Bikpela long Bogenvil long yia 1901.

Ol bin lonsim senteni selebren long Januari 7 long tupela ples. Em long Hahela Katolik misin long Buka na Tunuru long Sentrel Bogenvil. Pater Bernard i bin go pas long Hahela misa lotu.

Ol misinari bilong Maris Oda i bin go kamap pastaim long Bogenvil long 1901 i kam olsem long Solomon Ailan.

Long Januari 6, Bogenvil Daiosis i bin pasim ol selebren bilong 2000 Jubili yia wantaim bikpela misa lotu gen long Hahela peris sios.

Bisop Henk Kronenberg bilong Bogenvil Katolik daiosis i bin go pas long dispela lotu.

Ol bin distributim wanpela buk we i gat histri bilong sios long Bogenvil long en long dispela taim tu.

I bin gat prosesio i go insait long sios na ol preia wantaim. Ol pipel bilong Tinputz i bin kamapim wanpela jubili singsing we ol i bin singim long Hahela long pasim jubili 2000.

Faipela Katolik Sista long Aitape Daiosis go skul long Sanel Kolis

ADAM ELLIOT i raitim

FAIVPELA Katolik Sista bilong Aitape Daiosis i lusim Sandaun provins bilong skruim skul bilong ol long Maina Sanel Seminari Kolis long Kokopo, Is Nu Briten provins.

Tripela long ol Sister ya i bilong Prisentesen Oda na tupela em ol i bilong Roseri Oda.

Ol bin lusim Aitape long ka i go long Wewak we ol bin kisim sip i go long Rabaul long dispela wik.

Faipela Sister ya bai wokim Gret 11 na 12 long Sanel Kolis long Utapia we i Maina Seminari skul tasol nau em i opim dua bilong em long ol rilijes komyuniti i ken go insait tu long en.

Sister Fran Heargraves bilong Aitape Prisentesen Sistas i tok bai i gat 15-pela Rilijes Sister i kam long ol arapela provins long kantri husat bai wokim Gret 11 na 12

long Sanel Kolis long dispela yia.

Sister Fran i tok sans we tripela Sister long Oda bilong em i kisim long skruim skul long Sanel Kolis em i bikpela samting long komyuniti bilong ol.

"Bikos sapos ol i laik kamap olsem ol tisa, ol nes na go long ol arapela teseri skul ol i mas gat Gret 12 setifiket. Long dispela nau em bai mipela i givim bikpela komitmen long edukesen," Sister Fran i tok.

Ol Sister i tok ol i amamas long kisim dispela sans bikos long planti ol arapela Hai skul i no save kisim ol bikpela manmeri husat i pinisim Gret 10 long CODE skul long skruim Gret 11 na 12 bilong ol.

Ol Sister ya bai stap wantaim ol Misinari bilong Sekret Hat long Rabaul. Sister Fran i amamas long ol MSC Sister long kisim faivpela Sister bilong Aitape Daiosis i stap wantaim ol taim ol wokim skul bilong ol long is Nu Briten.

Ples lain pret long ol OPM

IAN KAKARERE i raitim

OL ples lain bilong Komovai long Flai Riva, Westen provins distrik i pret tru bikos ol i ting ol i lukim ol paitman bilong Operasi Papua Merdeka (OPM) i wok long raun insait long ol lain saksak klostu long ples bilong ol.

Ol ples lain i pret na ol i no moa go long kisim saksak bilong ol long kaikai long haus olsem na ol i givim dispela ripot bilong ol i go pinis long plis long Kiunga.

Not Flai Provinsal Plis Komanda Sief Inspekta Saibu Ako i tok ol i kisim ripot olsem i gat namba olsem 300 wes Papua i kalapim boda na i stap nabaut raun long ol lain saksak klostu long Komovai ples.

Mista Ako i tok ol ples lain i tingting strong yet olsem dispela em ol lain OPM paitman husat i wok long pait wantaim Indonesia ami long kisim independens.

Em i tok em i salim pinis 5-pela plisman i go long bot long mekim patrol long ol boda eria arere long Flai Riva. Tasol em i tok ol dispela 5-pela plisman i no inap go olgeta long Komovai bikos fiul bai i sot long bot na ol i no inap long tokaut klia sapos ol dispela lain ol ples lain i lukim em ol i kalapim boda i kam insait long PNG.

Long dispela taim tu wanpela bikpela straik we ol pipel bilong Wes Ningerum eria i bin laik kamapim i no inap kamap.

Mista Ako i tok ol pipel bilong Wes Ningerum i bin laik holim straik egensim Ok Tedi maining kampani long bagarap kampani i mekim long ol wara long eria bilong ol. Tasol ol i stapim dispela straik nau.

Em i tok ol lida bilong Wes Ningerum na OTML i wanbel long bung wantaim na stretim toktok long dispela samting.

Mista Ako i tok tu olsem ol Niu Yia selebresen long Kiunga na Tabubil i save gutpela na isi long olgeta taim we i nogat hevi na trabel.

Sogeri Nesanel Hai Skul i gat nupela bosmeri

KENNEDY EDENE i raitim

SOGERI Nesanel Hai Skul insait long Sentrel provins i gat nupela hatmeri o prinsipel bilong skul.

Dispela nupela prinsipal em wanpela meri tisa nem bilong em Mis Lillian Ahai krismas bilong em 44 na em kam long liklik ples ol kolim Morokaimoro long Bougenvil insait long Not Solomons provins.

Mis Ahai em tekova long prinsipel husat bai go Mista Arnold Lakson lakamanga husat em kam long is Sepik.

Mista Lakamanga bai go long ovasis long kisim sampela save moa olsem long Mastas Digri.

Dispela seremoni em ol liklik lon bilong ol skul tisa na skul wok man bin witnessim long las wik Fonde long skul yet.

Long givim dispela posisen, Mista Lason tok em gat bikpela bilip olsem Mis Ahai bai kisim dispela salens na givim ol stafs bilong Sogeri bai givim bikpela sapat na help we em nidim long ronim skul.

Bipo long kisim dispela wok meri ya bin holim wok olsem namba tu deputi prinsipel long skul olsem 3-pela yia long Sogeri.

Em i gat bikpela save long tis na em i bin tis long Provinsal Hai na Nesanel Hai Skul long yia klostu olsem 20 yias.

Mis Ahai's kamap olsem prinsipal bin namba wan meri tisa long holim dispela kain posisen.

Bikos wok na posisen olsem em ol mas save holim olgeta taim na long taim tru.

Dispela em pes taim wanpela meri i holim dispela prinsipal wok long kantri nau. Ms Ahai tok, em lukluk long stretim skul we Mista Lakson bain lusim.

Em tok bikpela wok bilong em, em long stretim ol klasrum na ol bilding ol bin paia. em bai putim nem bilong Sogeri Nesanel Hai Skul kamap gut.

Em i tok tu, ya i gat sampela meri tisa husat o holim deputi prinsipal long ol arapela skuls tu tasol long Provinsal Hai Skuls na save kamap long deputi prinsipel tasol.

Ms Ahai tok em bai wok strong na laikim sapat na helpim long ol tisa na staf bilong en.

Ol Sandaun lida i no stap long harim wari na hevi bilong ol pipel bilong ol

FELIX RAMRAM i raitim

SANDAUN pipel i no amamas long pasin ol lida bilong provins i soim taim ol i no kamap na soim pes long Vanimo long las wik long stap harim ol wari na tu long kisim petisen bilong pipel we ol i bin holim wanpela protes.

Long soim belhevi bilong ol long pasin Nesanel Gavman i kisim long pinisim Eking Sandaun Edministreta Karan Nataleo.

Ol ripot Wantok i kisim i tokaut olsem maski i bin gat ol

askim pas i go long ol palamem mamba long kamap long Vanimo. Na harim ol toktok na wari bilong pipel bihain kisim petisen bilong pipel, i nogat wanpela lida i soim pes maski Fainens Minista na mamba bilong Nuku Andrew Kumbakor tasol i bin kamap.


Wantok i kisim tok olsem komiti i bin salim ol dispela pas i go long olgeta Sandaun lida wanpela wik bipo long mas bilong Vanimo i bin kamap. Komiti i askim Sandaun Gavana wantaim deputi bilong em tu long stap long dispela taim, tasol ol i no bin stap.

"Ol lain husat i save stap long Pot Mosbi, mipela i no save wanem as na ol i no kam. Bikpela belhevi bilong mipela na Sandaun Gavana i bin stap long provins long dispela taim askim i bin go long opis bilong em. Na mipela i gat as long bilip olsem em i no go long Pot Mosbi, tasol em wantaim Deputi Gavana i ronawe i go hait i stap long Telefomin.

Olsem na mipela i rausim dispela giaman ripot bilong Gavana Robert Sakias long nius we em i tok em i stap long Pot Mosbi long dispela taim, dispela ripot i no tru, ol pipe i tok.

Ol i tokim Wantok olsem pipel nau i klia long trupela kain bilong ol Sandaun lida. Na i singautim olgeta Sandaun pipel long noken votim ol kain lida olsem husat i tingim ol yet long 2002 Nesanel Ileksen.

Ol i askim Andrew Kumbakor long tokaut stret olsem nupela Sandaun Edministreta Conficious Ikoireke bai i holim wok bilong em winim 5-pela krismas insait long Sandaun o em bai i stap sotpela taim tasol olsem ol narapela Sandaun Edministreta.



SANDAUN & EAST SEPIK COMMUNITIES

Long sanap makim ol meri, pikinini, brata, susa na ol famili bilong **MARTIN SERKAI ESI**, Sandaun na East Sepik komyuniti long Tabubil na Kiunga i laik salim bikpela **TOK TENKYU** i go long ol dispela man, meri, grup na kampani husat i helpim mipela long taim sori:

- *OK Tedi Mining Limited*
- *North Fly District Council*
- *President & Councils*
- *PNG Provincial Groups and individuals of Tabubil, Kiunga and Port Moresby*

- *W & R Parer, Aitape*
- *Alois Mambol, Aitape*
- *Groups from Warapu, Arop and Malol*
- *OTML Personnel & Transport Departments*

Dispela tok tenkyu i go tu long planti arapela lain husat mipela i no raitim nem bilong ol long hia.

Helpim bilong yupela long taim sori bilong mipela wantaim bodi bilong lapun tumbuna, papa, kandere, wanwok, brata na pren - **MARTIN SERKAI ESI** - i bringim bel isi long mipela long hia na long ples Malol long Aitape.

TENKYU TRU

OSCAR TAWI, JOHN PISE, BRIAN SIMBEL
Tabubil

Binandere pipel lukim moa kopi divelopmen

JAMES KILA i raitim

MOA long 2,000 pipel i bin bung long Ainsiviles long Binandere eria bilong Oro provins i no long taim i go pinis long lukim wanpela nupela sentral trening poin (CTP) i open long eria bilong ol.


Wanpela dairekta bilong Kopi Industri Koporesin na kopi groa bilong Oro provins yet, Wellington Jire yet i bin mekim opisal opening.

Dispela nupela CTP bai givim bikpela helpim tru long ol rurel kopi famas insait long ol ples i stp arere tasol long bikpela Mamba, Eia na Gir riva. Mani long helpim long kirapim dispela projek i bin kam long wanpela K24,000 em lokol memba bilong Sohe na Edukesen Minista, Dokta John Waiko i bin givim.

Kopi divelopmen wok i bin go strong tupela yia i go pinis taim Extensim Sevises Divisen bilong CIC i helpim ol pipel na kirapim dispela CTP long Ainsiviles.

Ol pipel i putim kamap wanpela kain spesel tumbuna danis ol i kolim "Ario" long dispela taim long makim dispela nupela divelopmen i kamap long eria bilong ol.

Dispela CTP ol i em ol launsim long Ainsiviles em wanpela kain liklik extension menesmen yunit em Kopi Industri Koporesin (CIC) i save operet long en na karimaut ol kopi extensin program bilong en. Ol dispela program i save lukluk long ol eria we i stap longwe tru long taun na eria we i save lukim liklik mani i raun long hap.



• Wanpela mama bilong Binandere husat i go pas long ol meri long planim kopi. Em i sanap wantaim tupela pikinini long fran long haus bilong em. Dispela kain hatwok i save mekim na kantri save kisim planti mani long kopi.


Ol pipel bilong ol wan pasin insait long Binandere i mekim bikpela singsing Ario, kilim pik na mekim bikpela kaikai long amamasim dispela seremoni.

Planti ol bikman i bin go stap insait long dispela seremoni. Wanpela opisa husat i makim memba bilong Sohe na Edukesen Minista, Dokta John Waiko, ol opisa bilong provinsel gavman na ol sampela opisa i kam long CIC.

Dispela CTP long Ainsiviles i makim wanpela spe-

sel taim tru insait long laip bilong planti ol manmeri long dispela eria we i stap arere long bikpela Mamba, Eia na Gira riva bilong Oro provins. Projek ya bai helpim ol long kisim skul long kamapim moa gutpela kopi bilong salim na kisim moni na helpim sindaun bilong femili na komyuniti bilong ol.

Dispela CTP long Ainsiviles long Oro em wankain olsem 40-pela arapela wankain projek em Extensim Sevises Divisen bilong CIC i



• Planti ol Binandere pipel i yusim bikpela kanu na dingi long go long ples bikos nogat rot i go long ples bilong ol. Taim nogat rot, planti manmeri i save painim hat long kisim kopi bilong ol i kam aut na salim long maket. Dispela i save mekim planti manmeri i les liklik long stretim na lukautim kopi long dispela ples.

kamapim insait long ol provins we i save groim kopi insait long PNG.

Dispela helpim bilong mani i kam long MP bilong Sohe i helpim tu CIC Extensim Sevises long kirapim pinis 15-pela kopi neseri. Wan wan bilong ol dispela neseri i ken holim 10,500 sidlings o nupela kuru kopi. Ol neseri ya i stap arere long Gira, Eia na Mamba riva long Tamata lokol level gavman eria.

Extensim Sevises Divisen

bilong CIC i bin karimaut wok bilong dispela kopi divelopmen yusim mani MP i putim. CIC tu i bin putim kamap wanpeal plen long karimaut divelopment insait long ol eria long dispela hap.

Nau yet moa long 412 kopi fama i go insait pinis long planim moa long 116,000 liklik kopi diwai long gaden bilong ol.

Ripot i soim tu olsem insait long 1999/2000 kopi sisen ol pipel long dispela

Binandere eria bilong Oro i kamapim samting olsem 1.2 tan pasmen kopi na salim long Angco Kopi kampani long Lae. Ol i bin yusim ol liklik balus long karim ol kopi bilong ol i go salim.

Narapela samting tu em olsem ol dispela pipel insait long rurel eria tru bilong PNG i bin namba wan taim tru i helpim lokol ikononi bilong kantri taim ol i kamapim 0.900 tan grin-bin kopi em ol i salim long kopi expot i-go ovasis.

Pis faming gat sans

FISERIS Minista Ron Ganarafa i bilip strong olsem Hailans rijen i ken saplaim pis long salim na putim long tin i go aut long ol narapela kantri.

Na em i tok amamas long ol fama husat i go insait long dispela pis faming bisnis.

Mista Ganarafa i tok em i kirap nogut long lainim save olsem insait long tripela krismas, pis faming i kamap na i wok long go bikpela long hailans rijen na ol pipel i gat bikpela laik long stap insait long dispela bisnis.

"IMI gat bilip olsem wantaim laik we ol fama i soim long en, ol i ken saplaim pis na helpim ol pipel long kisim mani long en. Ol pipel i save olsem i nogat planti hatwok i go long dispela wok bilong lukautim ol pis," Mista Ganarafa i tok.

Em i tok dispela projek long Aiyura Veli i wok long go gut na narapela i stap pinis long Maun Wilhem i helpim gut ol fama husat nau i wok long kisim gutpela winmani long en.

Em i tok bihainim ol pis fam we ol bin kirapim long Simbu provins long 1999 na 2000, em i soim olsem ol fama i karimaut gut wok we Fising indastri i laikim ol long karimaut long en.

"Ol fama i no wet, ol i karimaut ol wok ol yet na mipela i laikim dispela pasin. Wanpela hatwok tasol long dispela bisnis em long digim hul bilong pulumapim wara na putim ol pis long en," Mista Ganarafa i tok.

Em i tok planti fama i wok long ol kopi bisnis na ol arapela krop tasol sampela i go insait long pis faming bisnis.

Em i tok mani we Yuropien Yunien i katim long helpim pis faming long hailans na nambis eria em ol i holim bek gen long en.

Tasol em i tok dispela K40 milien we ol i laik givim long helpim strongim fising bisnis bai kamap bihain long ol i stretim na sainim ol pepa. Na Plening Minista i sainim pinis agrimen pepa wantaim ol dona ejensi long em.

Bogenvil grasrut kirapim Maikro Fainens skim

MAIKRO Fainens Invesmen (MFI) skim i wok long kirap bek na kamap strong long sampela hap bilong Bogenvil.

Dispela i bihainim ol woksop long Buka long dispela samting we i bin stat yet long yia 1997 i kam inap long Mas 2000.

Siwai distrik insait long sautwes Bogenvil em wanpela hap we MFI i wok long kirap strong long en.

Insait long foapela yia Siwai distrik i holim 80-pela aweanes woksop long MFI.

AusAID i save helpim long fandum ol dispela woksop.

Ol ripot i kam long Siwai distrik insait long Saut wes Bogenvil i tok dispela distrik i gat bikpela intres long joinim MFI long en.

Ripot i tok bikpela as tingting long ol pipel i joinim MFI em bikos ol i laik wokim ol liklik seving bilong helpim ol wantaim skul fi, baim ol samting long helpim skruim gut sindaun bilong ol bihain long Bogenvil hevi i bagarapim ol, baim haus sik fi na ol arapela samting moa olsem.

Narapela em ol komesel beng i save les long helpim ol grasrut na ol pipel long Bogenvil i painim ol arapela rot long sevim liklik toea na ol i lukim olsem MFI i wanpela gutpela rot

Ripot i tok tu olsem distrik ya i gat bikpela man long ol MFI i operet i kam inap nau. Na pablik long distrik ya i gat save long dispela skim.

Ol ripot i tok moa pipel i wok long joinim skim na 22 nupela grup i givim nem i go long distrik MFI kodineting opis pinis.

Long Siwai distrik yet, ol i gat 12-pela MFI we i stap long ful operesen. Tupela i bin kirapim wok bipo yet long PNG i kisim independens, sampela i bin stat yet bipo long hevi na ol bin kirapim ol arapela bihainim ol aweanes woksop long 1997.

I gat tupela yut MFI na wanpela meri MFI long distrik.

Wanpela MFI ol i kolim long Ramopohu em i gat bikpela mak bilong ol memba wantaim 2,297 na em i gat moa long K10,000

long seving diposit bilong en.

Olgeta nainpela Kaunsil ov Siefs eria long Siwai em ol i karimaut ol aweanes program pinis long ol na ol pipel i soim bikpela laik long joinim. Ol siefs insait long ol eria ya i soim bikpela sapot na ol i singautim ol aweanes komiti long go insait long wan wan eria bilong ol long toktok moa long dispela seving skim.


Sampela long ol samting we ol i save toktok long ol insait long ol aweanes miting em, fanding bilong distrik MFI, givim trening long skruim save long ol lain bai lukautim ol MFI, givim mani long helpim ol MFI we i kirap na wok pinis i stap, karimaut ol woksop long ol distrik, statim ol pasbuk na kirapim Bogenvil Haus Mani kwiktaim.

Taim ol aweanes i go gut, tupela hevi em aweanes grup i bin bungim long en em, nogat trenspot na sot long ol prin posta na ol arapela metiriel moa olsem.



"PRAIVETAISESEN TOKTOK"

Praivetaisesen Komisn bilong Papua Niugini



... i kam long tebol bilong Siaman

TOKAUT LONG MENESMEN TIM BILONG PRAIVETAIS ESEN PROJEK

Praivetaisesen Komisn i redim pinis projek menesmen konsaltensi tim long praivetaisim Elkom, Invesmen Koporesen bilong PNG na kirapim wanpela Yunit Tras, Wata Bod olsem Eda Ranu, PNG Habas Bod na ol arapela liklik bisnis.

Siaman bilong Komisn, Mista Ben Micah i bin tokaut long ol dispela na tok em na Ekting Menesing Dairekta, Mista Joe Tauvasa i gat bikpela bilip olsem ol dispela tim ol i makim pinis i gat gutpela ekspiens na save long mekim ol wok bilong ol we pipel bilong Papua Niugini bai kisim bikpela prais tru taim ol i salim ol bisnis ol ogenaisesen bilong Gavman.

Mista Micah i tok ol man husat i winim aplikesen bilong wok olsem ol projek menesa i bin bung wantaim ol memba bilong Komisn long nambawan miting bilong ol long 2001 we i bin kamap long Trinde, Januari 17, 2001.

"Mipela i bungim wanpela tim bilong ol bikpela saveman tasol husat i ken wok wantaim Komisn long kisim ol dispela gol o mak Gavman i bin askim mipela long kamapim," em i tok.

Mista Micah i tok projek menesa bilong givim tok edvais long praivetaisesen bilong Telikom i redi pinis na bai ol i tokaut long man ol i makim long liklik taim tasol.

Em i tok Komisn i bin sekim gut tru olgeta kantri long wol long kisim ol ekspet konsalten o ol save lain stret long givim tok edvais long praivetaisesen program.

"I tru olsem ol rot bilong mipela long putim tenda o toksave bilong askim ol man long karim aut ol wok i bin lukim planti handret ol man i bin aplai long mekim ol kainkain ol wok we mipela i bin tokaut long en na mipela i save olsem mipela i kisim ol gutpela ol saveman stret long mekim ol wok." Mista Micah i tokaut tu olsem Komisn i makim wanpela probiti edvaisa o man husat bai lukluk long sait bilong mekim ol samting stret na bihainim lo, Mista Zoran Radosevic husat em i wanpela dairekta bilong ol satad akaunten ol i kolim Howat Pty Ltd, husat i save stap long Kwinslen.

Em i tok Radosevic i gat bikpela ekspiens long kain wok na em i bin wok olsem probiti edavaisa bilong planti ol bikpela projek bilong Kwinslen Gavman na ol praivet sekta tu.

Mista Micah i tok ol man i makim olsem ol projek menesa em:

- **ELCOM - Austrelie Pawa na Wara Pty Ltd**
- Project Menesa, Mista Mike Maurer
- **WATA BOD wantaim EDA RANU**
- Burns Bridge Pty Ltd na Katalyst 21,
- Projek Menesa, Mista Allan Walker;

- **PNG HABAS BOD D.C.**
- Davis Pty Ltd,
- Projek Menesa, Dokta Derrin Davis;
- **INVESTMENT KOPROSEN BILONG PNG/YUNIT TRAS**
- DFC Project Manager, Mr Lawrence Hibbert; and
- **OL LIKLIK ENTAITIS O BISNIS**
- David Drake,
- Projek Menesa, Mista David Drake,

Mista Micah i tok Austrelie Pawa na Wara i bin wanpela intanesenel enjineriing sevis kampani husat i save wok wantaim pawa, wara, envairomen na ol arapela wok bilong infrastraksa.

Em i tok kampani ya i gat ol operesen bilong em long Austrelia na Asia/Pasifik rijon na i no long taim i go i bin kisim sampela wok bilong stet na federel gavman long Austrelia na ol ogenaisesen bilong gavman long Siapan, Kwinslen, Nu Silan na Indonesia.

"Bungim wantaim, kampani ya i gat operesenel ekspiens long moa long 30 kantri na ol memba bilong tim i bin wok pinis long Papua Niugini," Mista Micah i tok. DFC, husat bai wok olsem ol projek menesa bilong Invesmen Koporesen bilong PNG (ICPNG) na Yunit Tras i bin kamap long 1980 olsem ol stretejik edvaisa husat em wok bilong ol i gat mining tru, i save wok olsem ol advaisa bilong intanesenel fainens sekta.

Kampani i gat ol opis long Baselona, London, Wasington na Madrid na i bin kisim samting olsem 500 asainmen ol ol wok insait long moa long 110 kantri long Yurop, ol kantri long Amerika, Asia na Afrika.


Burns Bridge, husat bai givim ol edvais long praivetaisesen bilong wara industri, i gat bikpela ekspiens long infrastraksa projek olsem wara, pawa, friweis na wara na wok bilong stretim doti o pekpek wara i kamap gutpela gen.

Ol operesen bilong ol save karamapim ol wok bilong ol sentrel gavman na ol ejensi bilong ol na ol lokol atoriti.

Projek menesa bilong kampani, Mista Allan Walker i bin menesim ol pawa na wara praivetaisesen projek bipo.

Mista Micah i tok Burns Bridge i bin wok planti hap long ovasis long ol kantri olsem Jemeni, Luksembeg, Namibia, Indonesia, Pilipins na Saut Afrika.

D.C Davis Pty Ltd - edvaisa bilong Habas Bod i gat gutpela rekot bilong em long Pasifik, Saut-Is Asia na Sauten Afrika.



Lae redi long nupela s u p a - maket...

• Biknem holsel kampani Seeto Kui i redi nau long opim nupela supamaketa long 7th strit, Lae. Kampani i stap longpela taim tru long Lae, dispela stua bai pulim plan-ti lain. *Poto: JOE KANEKANE.*



Politiks i mas stap longwe long haus mani

Gavman i mas kamap wantaim strongpela lo we i mas tambuim em yet long i no ken stap insait long wanpela wok o disisen bilong ol bikpela opis we i save lukautim mani bilong pipel na kantri.

Ol bikpela opis olsem POSF we i save lukautim mani bilong ol pablik sevans wokmanmeri, PNGBC beng we ol manmeri i save putim mani bilong ol long stap gut, NPF we ol wokmanmeri bilong ol praivet kampani na bisnis i save sevim hap potnait mani bilong ol na bikpela mama beng bilong kantri, Sentrel Beng we i save bosim mani bilong kantri.

Gavman i mas stap longwe long ol dispela opis bikos ol i mas mekim wok bilong ol stret na kamapim lo bilong ol long lukautim gut mani bilong ol pipel na kantri.

Ol dispela bisnis i kamap bikos haus palamen i pasim olsem lo we dispela kain opis i mas kamap long lukautim mani bilong ol pipel. Na gavman yet i save stap insait long ol olsem bosman tru we em i save makim husat wokman bilong em long go pas long ol dispela opis. Olsem na taim gavman i tok wanem long dispela bosman, em i harim tok na tokim ol wokman long mekim ol saniting bihainim toktok bilong em. Tasol dispela i no tingting bilong em yet, em tingting bilong man i bin makim em long kisim dispela wok.

Bikpela piksa i kamap pinis long bikpela haus mani bilong NPF we planti tausien wokmanmeri bilong ol praivet kampani klostu long 255,000 olgeta i save sevim mani bilong ol long en. Wok painimaut i soim pinis olsem moa long K100 milien bilong NPF i sua long han bilong gavman long ol wok bilong en. Olsem na yumi ken lukim stret olsem gavman i tokim NPF long givim em ol dispela mani long em bai mekim wok wantaim. Tasol em i no bekim gut dispela mani na nau NPF i sot long mani.


Wankain tu long bikpela beng bilong Papua Niugini Sentrel Beng, gavman i bin kisim moa long K500 milien dinau long bipo na dispela i mekim mani bilong kantri i sot long dispela beng. Olsem na strong bilong PNG mani i no inap sanap strong wantaim mani bilong ol arapela ovasis kantri na dispela i bin pretim sampela ovasis bisnis na kampani hia long PNG long salim ol kago na saplai bilong ol long ovasis na opim pasbuk na lusim mani bilong ol long ovasis i stap. Bikos sapos ol i kisim dispela ovasis mani i kam bek long kantri, bai namba bilong dispela mani i go daun gen. Ol bisnis na kampani i pret long strong bilong mani i go daun hia long PNG. Na dispela em asua bilong PNG gavman long mekim rong muv long mani bilong kantri.

POSF opis tu i bin tromoi ol bikpela mani bilong ol wokmanmeri long pablik sevis i go long baim ol haus long Kens Australia. Tasol dispela haus i no wokim gutpela profit yet long bringim bek mani bilong ol mem-bas.

Tingting bilong gavman i mas klia olsem em i nogat rait long kisim mani bilong NPF bikos i nogat lo bilong NPF long gavman i ken kisim mani bilong em. Na tu gavman i no save givim wanpela liklik helpim long NPF long mani taim em i brukim baset bilong kantri. Tasol long POSF gavman i save brukim baset na givim liklik long helpim wok bilong POSF. Tasol em i mas save olsem dispela em wok bilong em long mekim na i no bilong paulim ol wokmanmeri bilong em gen long kisim mani bilong ol na tromoi nabaut long ol wok we i nogat gutpela kaikai long en.

Strongpela lo i mas kamap nau stapim na putim gavman na politiks bilong em i stap ausait na longwe olgeta long wok bisnis bilong ol dispela haus mani. Bikos planti krismas i go pinis politiks i bagarapim planti bikpela mani bilong ol dispela lain haus mani. Olsem na i luk olsem politiks bilong PNG i no gutpela tru long sait bilong lukautim na kontrolim mani insait long kantri. Politiks bilong PNG em i save aigris na ai op tasol long kisim mani bilong ol pipel. Na long putim dispela mani i go bek, em i save hatim ol manmeri long baim moa takis long kisim bek ol dispela mani we ol yet i westim.

Plis i sasim Minista bilong Provinsal na Lokol Level Gavman



• lairo Lasaro.

• Plis long Mosbi i bin holim na sasim Minista bilong Provinsal na Lokol Level Gavman Afeas lairo Lasaro long las wik long sas bilong yusim mani bilong Gering Bod we plis i tok em nogat rait long yusim dispela mani bikos provins bilong em i nogat ol poka masin.

Plis i holim Mista Lasaro long Boroka plis sel inap loya bilong em i go kamap na ol i baim K1,000 beil na em i kam ausait. Kot bilong em i kamap long Mande dispela wik long Waigani Distrik Kot na kot i surukim i go gen long narapela taim.

Deputi Plis Komisina Sam Inguba i tokaut olsem dispela sas Mista Lasaro i kisim bai ol bikman long Gavman na ol bikpela opis tu bai kisim. Bikos planti bikpela mani bilong kantri i bin lus long ol bikman tasol. Sampela ol bikpela mani we i lus em olsem long Woks projek long Mosbi, mani bilong Fiseris Dipatmen we ol plisman i holim na sasim ol dispela lain pinis.

Mista Inguba i tokaut olsem bai plis i karimaut ol wok painimaut i go yet na sasim planti ol bikman husat i paulim mani bilong kantri na i wok long hait i stap.

• Tupela bikpela kampani husat i go pas long skelim ol skul saplai i go long ol skul insait long Papua Niugini i statim dispela wok pinis long las wik. Tupela kampani wantaim, Spring International na PNG Stationaries and Office Supplies i tokaut long dispela wok bilong tupela long dispela wik.


Spring International i lukautim sait bilong Papua sait we i karamapim Oro provins, Milen Be, Sentrel, Galp na Westen provins. PNG Stationaries and Office Supplies i lukautim olgeta skul insait long ol Hailans, Mamose na Niugini Ailan provins.

Ol dispela skul saplai i bin kamap long han bilong tupela kampani ya long las yia bilong skelim i go long ol skul. Tasol PNG Stationaries and Office Supplies tasol i gat hevi wantaim Edukesen Dipatmen olsem na ol dispela skul saplai i stap yet inap las wik tasol ol i stat long skelim. Dispela em bihain tasol long Pablik Akauns Komiti, wanpela komiti bilong Palamen i sanapim Edukesen Dipatmen na askim ol long wanem hevi tru i kamap long dispela samting bilong skul.

• Praim Minista Sir Mekere Morauta i tokaut long pinis long lukuk insait na stretim hevi bilong ol papagraun bilong Goroka Yunivesiti long Isten Hailans provins. Praim Minista i mekim dispela luksave bilong em long Tunde dispela wik wantaim ol mausman bilong ol papagraun long wanpela bung bilong ol long Mosbi. Ol papagraun i tokaut olsem ol i bin kisim tok orait pinis i kam long Lens Komisina long ol i ken kisim moa long K2 milien long dispela graun. Tasol Lens Dipatmen i skelim olsem dispela em bikpela mani tumas na ol i kamapim kot egensim ol papagraun. Dispela kot i stap yet.

Ol papagraun i tok ol i bin holim ol yet na stap isi longpela taim i kam inap nau we ol i tokaut long dispela belhevi bilong ol. Long las wik ol i mekim bikpela toksave olsem ol bai pasim skul (Goroka Yunivesiti) sapos Gavman ino harim dispela singaut bilong ol na stretim kom-pensesen singaut bilong

OL HAP HAP nius



• Praim Minista Sir Mekere Morauta.

ol. Tasol ol i tok ol i amamas bikos nau ol i harim tok stret i kam long maus bilong bikman na het bilong kantri olsem na ol bai i no inap mekim wanpela nois moa. Skul i ken op long taim bilong statim skul. Praim Minista i tok em ba askim Minista bilong Lens, John Pundari long lukluk insait long dispela hevi na stretim gut.

• Plis long Mosbi i bin sutim na kilim tripela yangpela manki long Mande apinun taim ol i bin stilim ka na ronawe. Ol i bin stilim ka bilong wanpela meri na ol pikinini bilong em long Hohola na ronawe i go olsem long Tokarara taim ol plisman i luksave na stat ronim ol. Plis i bin ronim ol i go kamap long beksait rot i go antap long Renbo na ol i sutim ol dispela stilman long hap.

• Moa long 10 man nogut i bin laik hensapim bikpela sip we i karim ol fiul i go long Manus ailan long dispela wik. Ol man nogut ya i go antap long sip na mekim birua wantaim ol plisman antap long sip tasol i no longtaim ol i kalap long wanpela liklik spitbot bilong bikpela sip ya na ronawe. Wanpela plisman i kisim bagarap.

Gavana bilong Manus Steven Pokawin i tok ol i save long we ol dispela stilman i kam long en na em i askim pinis bos bilong plis long provins na Provinsal Edministreta long ol i mas mekim wok nau long holim ol dispela man nogut. Dispela sip wantaim ol fiul i tanim bek na i no go long Manus na i gat pret nau olsem Manus provins bai sot long ol bensin, kerosin na disel long tripela wik bihain.



GOD I SAVE MEKIM GUTPELA PASIN

Praise the LORD! Give thanks to the LORD, because he is good; his love is eternal. Who can tell all the great things he has done? Who can praise him enough? Happy are those who obey his commands, who always do what is right. Remember me, LORD, when you help your people; include me when you save them.

Psalms 106: 1-4


Mungo Man saientis i salim tingting i stap!

Ol rises wok i kamap long painimaut na long dispela wik bihainim blut tes, ol saveman long dispela samting i tok Mungo Man i bin stap long graun 60,000 krismas i go pinis.

Ol tok i wok long sut i go na i kam namel long ol intenesenel saientis, ol saientis long Australia na ol asples Aborijini pipel husat i tumbuna bilong dispela Mungo Man. Dokta Bowler husat i sindaun na lukluk, glasim na skelim ol samting we i sut long Mungo Man i tok DNA o blut tes na deit i no bikpela samting tumas. Dispela i bihainim tu ol wok painimaut we wanpela saientis bilong Amerika we ripot bilong em bihainim DNA tes long Mungo Man i tok ol Aborijini pipel i kam long India na Esia.

• **Raithan: Jim Bowler, saientis bilong Australia husat i bin painim bun bilong Mungo Man long sautwes Nu Saut Wels 26 krismas i go pinis.**

Piksa i kam long Weekend Australian niuspepa.



Nevi bilong Amerika bai skruim operesen long Guam

Guam:

I gat ol ripot we i tok nevi bilong Amerika bai transferim tripela nuklia samarin we i stap nau long Hawai'i i go long Guam long neks yia 2002. Dispela em long skruim operesen bilong em long Esia na Wes Pasifik rijen.



Ol ripot i tok ol i karimaut ol wok long putim ol dispela tripela Los Anjelis klas nuklia

samarin long Guam. Ol diuspela nuklia samarin i gat Tomahok krus misail long ol na ol bai transferim ol lonf Pel haba long Hawai'i we ol i beis nau long en.

Long las yia, US Pasifik Koman i bin kirapim wanpela skwatron opis long Guam long givim etministretiv helpim, lojistik na trening i go long ol US samarin opisa long Guam. US


eafos i wok long agpretim tu ol nevi beis bilong em long Guam long givim lojistik sapot i go long B-1 na B-2 bomas.

Long las yia, US Eafos i bin posisenim ol krus misail long Andersens eafos beis long Guam we bai glasim sapos sampela birua i laik karimaut pait long ea egensim ol taget long wes pasifik na ls Esia long en.



Tok i kamap long tumbuna man bilong ol Aborijinis pipel bilong Australia.

• **Garry Pappin em pikinini na mausman bilong Aborijini wanpisin em ol tumbuna bilong Mungo Man, Alan Thorne em wanpela saientis i wokim rises long blut tes na long hansut em bun bilong Mungo Man wanpela long ol namba wan asples Aborijini pipel i bin stap long Australia moa long 56,000 krismas i go pinis.**



Muvi piksa Cast Away kisim Oska nominesen

• **Wanpela biknem muvi ekta Tom Hanks long muvi Castaway we ol i bin wokim long wanpela ailan long Fiji. Muvi ya i kamap gut tru na nau i gat ripot olsem Hanks i wanpela long ol muvi ekta husat nem bilong em i stap long lista bilong kisim Oska Awod long dispela muvi piksa. Piksa i kam long Weekend Australian niuspepa.**

Ol Rwanda pikinini i stap long hevi

Samting olsem 65,000 haus na famili insait long kantri Rwanda long Afrika em ol pikinini i lukautim bikos papamama i dai long hevi na bikpela pait we i bin kamap long 1994. Antap long dispela tu, sik AIDS i wok long bagarapim tru kantri olsem em i wokim long planti ol arapela kantri long Afrika.

Ol ripot i tok ol pikinini i gat namel long 12 na 17 krismas i wok long lukautim ol famili, ol liklik brata na susa na tu ol pikinini bilong ol yet.

Rwanda long dispela taim i wok long bungim hevi long nogat ren insait long 10-pela mun nau na laip i hat tru bikos kaikai i sot, nogat wara tasol bikpela hevi em ol yangpela pikinini husat i kamap olsem bos bilong famili.



• **Claudine Umaphasoni na tripela brata bilong em i sanap long matmat bilong papa na anti bilong ol. Piksa i kam long Weekend Australian Review niuspepa.**

Ol i gat wok long lukautim ol liklik brata susa, painim ples bilong stap long en, ol klos, kaikai na ol arapela samting moa we

yumi save nidim long kamapim gut sindaun bilong yumi wan wan. Ol pikinini i mas go tu long skul na kisim marasin taim

ol i sik. Dispela em ol bikpela wari we ol yangpela pikinini i ekting papamama i bungim long olgeta de.

Demokresi ektivis i egensim Gavman long kisim blut test bilong ol pipel

Tonga:

Ol demokresi ektivis bilong Tonga i egensim wanpela agrimen we Gavman bilong Tonga i bin sainim wantaim wanpela baioteknoloji kampani bilong Australia long kisim ol blut tes bilong ol pipel bilong Tonga.

Ol bin kamapim dispela agriemn wantaim nogat pablik dibeit na nau dispela agriemn bai opim dua long salim DNA blut na ol arapela samting moa olsem.

Kampani bilong Australia we bai karimaut dispela samting em Autogen Limitit. Em i plen long bungim ol DNA sempel long Tonga long glasim na skelim na luksave long wanem ol blut na binatang i save kamapim obesiti o pasin bilong kaikai planti, sik daibitis na ol kain sik long lewa.

Aninit long agrimen, gavman bilong Tonga i givim Autogen rait long baim na salim ol jenetik infomesen i go long ol lain dokta na saientis husat i karimaut ol medikel stadi na rises.

Manesing dairekta bilong Autogen Joseph Gutnick em wanpela biknem maniman bilong Australia husat i gat invesmen long gol maining bisnis. Em i save sapotim Melbon Futbol Klub.

Long wanpela toksave we Autogen i bin autim long las yia Novemba, agriemn ya i tok orait long kirapim wanpela jenetik rises opis long Tonga wantaim bikpela tingting long luksave long ol binatang we i save kamapim ol kain sik. Na bilong givim ol dispela samting Autogen bai givim hap manimal i go long Ministri bilong Helt long Tonga long karimaut ol rises wok long en. Tu Autogen bai peim net royalti peimen long ol mani we em i kisim long ol samting we em i kamapim taim em i yusim ol jenetik na blut sempel em i kisim long Tonga. Ol dispela amni bai helpim ol pipel bilong Tonga, Autogen i tok.

Humen raits demokresi Muvmen bilong Tonga (THRDM) i tok ol i egensim strong dispela pasin bilong salim blut long mani i go long Australia bikos ol i harim ol ripot long ol trangu pipel long India, Saina na Brazil i salim

blut na kitni i go long ol ris-masn bilong Amerika na Yurop bilong kisim mani long baim ol kaikai long en.

Muvmen taim em i egensim dispela samting i tok dispela tingting na pasin em i nogut bikos bai nogat taim we ol pipel long Tonga i laik salim wanpela hap long bodi bilong ol long baim kaikia samting long en.

Dairekta bilong THRDM Lopeti Senituli i tok maski Helt Ministri i wokim dispela agrimen wantaim gutpela tingting, kabinet tu i no bin gat toksave na nogat pablik toktok i bin kamap long dispela samting long midia na tu long Lejisletiv Asembli bilong Tonga.


Dispela baiopairesi o pasin bilong salim blut bilong ol asples pipel i no kamap nambawan taim long Pasifik, nogat.

Long 1992, Dipatmen bilong Komes long Yunaitet Stets i bin failim patent kleim long humen T sel lain bilong wanpela meri i gat 40 krismas bilong Westen provins long Solomon Ailan na narapela man i gat 58 krismas bilong Guadalkanal long Solomon Ailan tu. Ol dispela blut we ol i karimaut ol wok painim long en i gutpela long kamapim ol vaksin o marasin long sampela sik. Long 1993, US Stet Dipatmen bilong Helt na Humen Sevis na Nesenel Institut bilong Helt i bin tokaut long paten kelim bilong humen T sel lain bilong 24 pipel long Hagahai traib long PNG. Bikos ol gavman bilong PNG na Solomon Ailan i egensim dispela samting, ol bin rausim ol dispela baiopairesi kelim. Norfolk Ailan we i gat ol asples lain long Australia long las yia i bin sainim tu DNA blut rises developmen agrimen we ol rise saietis bilong Grifit Yunivesiti bai karimaut ol rises wok long en.

Mista senituli i tok mani i noken paulim tingting bilong yumi long promis bilong kisim bikpela mani long en bikos Autogen i promis long peim bikpela hap mani.

Em i tok ol yet bai kisim moa mani winim dispela ol i epim i gfo long Tonga na i no gutpela long salim blut bilong ol pikinini bilong yumi wantaim liklik mani taim ol lain i gat bikpela mani i gismanim yumi long en.

Mama salim tupela bebi olsem samting bilong stua



• Naispela bebi, mi laikim yu ya. Piksa i kam long Weekend Australian niuspepa

Tupela bebi i no wari tasol stori bilong ol i kamapim das na kros long planti pipel long wol. Tupela bebi em Belinda na Kimberley Kilshaw.

Stori bilong ol i go olsem mama bilong ol em Tranda Wecker wantaim 28 krismas na em i kam long Sen Louis Missouri long Amerika. Em i kam long trangu famili na em i gat tripela pikinini pastaim long em i karim dispela tupela bebi twins long las yia.

Wecker na man bilong em i divos bikos em i wanpela drag bodi na olsem em bin painim hat long lukautim tupela. Olsem na em i putim etvetismen long Internet long husat marit i laik baim tupela twins bilong en.

Long Amerika em i orait long salim bebi long Internet masin tasol long Australia, em i nogat yet.

Tasol wanem samting we wol i no wanbel long en em pasin we ol i salim ol bebi long wanpela marit pinis na bihain em i kisim tupela bebi bek na salim gen long narapela man husat manim mak bilong em i antap moa.

Federal Biuro ov Investigesen (FBI) olsem ol CID plis long Amerika i karimaut ol wok painim long dispela hevi bikos em i olsem pasin bilong stilim bebi we i bin kamap pastaim.

Ol ripot i tok adoptim bebi long Internet long Amerika i kamap olsem wanpela bikpela samting.

Richard na Vikkie Allen i bin painim nem bilong tupela twins long "Caring Hearts Adopsen" websait kompyuta we wanpela meri i save ronim. Na tupela marit i peim KUS\$6,000 pastaim olsem fi long Tina Johnson husat

i mama bilong websait kompyuta i bin karim adopsen etvetismen long en. Ol promis olsem ol bai peim narapela US\$2,000 bihain taim ol i painim mani.

Orait, mama Wecker i bin kisim tupela bebi i go long Mista na Misis Allen long mun Oktoba las yia na tupela i bin lukautim ol twins long tupela mun.

Tasol taim Mis Johnson i tokim mama Wecker olsem wanpela sek bilong ol Allen i em benk i no inap givim mani, Wecker i wari olsem wanem kain lain i kisim ol twins bilong en na sapos ol bai lukautim tupela gut.

Mama Wecker i tok maski sek i bauns o nogat, em no bin kisim wanpela mani long Mis Johnson.

Bihain gen, Johnson i wokim dil wantaim narapela marit em Alan na Judit Kilshaw bilong Wales, Ingran. Em i wokim namba tri dil wantaim wanpela meri Amerika em Amy White tasol taim em i no wokim peimen kwiktaim, ol i lus tingting long en.

Tupela Kilshaw i peim US\$12,000 long Mis Johnson. Na bikos em no bin laikim ol Alen i save long dispela namba tu dil, em i salim mama Wecker long giaman olsem tupela twins ya bai stap wantaim em long tupela de na ol i wanbel long givim long en. Tasol tupela Kilshaw i kisim ol bebi na baim ol. Taim ol Alen i painaut long dispela samting, ol i kwiktaim kam long San Diego na kros wantaim ol Kilshaw husat i no bin save long dispela dil namba wan long en.

Ol loya bilong tupela famili nau i wok long dispela keis long Amerika na Ingran. Tupela twins nau i stap wantaim ol Kilshaws bilong Wales, Ingran husat i tok ol i no wokim wanpela rong long kisim ol bebi ya.

Ol niuspepa long Ingran tu i go insait The Sun i peim Mama Wecker US\$50,000 long stori bilong en. Sanday Morrow niuspepa tu i ofaim US\$25,000 long Aaron Wecker em papa bilong ol twin bebi long kisim stori bilong en long dispela samting.


Andi i no monki nating!

Em i gat nem long wanem em i kamap olsem namba wan monki long wol we ol saientis bilong Amerika i bin kamapim long traim painim ol nupela; a developmen long rot bilong tritmen long ol kain sik long man.

Dispela em Andi, nupela bebi monki we ol bai yusim long medikel rises bilong painim rot bilong daunim ol kain sik long man olsem sik HIV/AIDS, daibitis, kensa bilong susu long ol meri na ol arapela sik moa olsem. Monki ya em ol bin putim ol binatang bilong jelipis long mekim nil long finga i sain.

Andi i bin bon long Oktoba 2 long Oregon Rijnel Praimet Rises Senta Potlen, Amerika. Dispela em sem ples we long las yia ol saientis i bin kamapim Tetra, namba wan klon monki long wol.

Rises tim lida Gerard Schatten i tok ol monki olsem Andi na Tetra bai helpim ol long painim ol rot bilong daunim ol kain sik we nau i wok long kamap bikpela long wol olsem HIV/AIDS na ol kain kensa nabaut. Piksa i kam long Weekend Australian niuspepa.



• Ol saintis i putim jeli pis i go insait long dispela monki na pinga nil bilong em i save lait. Piksa i kam long Weekend Australia.

Klia long em. Man o wanem samting!

Sumo resling gren sempion Akebono i soim stail na strong bilong em long dispela pilai.

Piksa i kam long Weekend Australian niuspepa.


Intres long pablik long lukim sumo resling long Japan i wok long go daun bikos ol narapela pilai olsem beisbal na soka i wok long pulim planti ol man i go long en.

Bilong pulim gen pablik long dispela sumo rssling pilai ya, ol i bringim ol nupela rot bilong resling we ol resla bilong Mongolia i yusim long Japan.

Ol dispela lain em ol i no bikpela tasol ol i hariap long ol muv bilong resling bilong ol.

Tupela wol biknem sumo resla bilong Japan em mama i karim ol long Hawai'i em tupela traipela mama bilong man em long Akebono na Musashjmaru.

Bilong kamap ol traipela man olsem Akebono, ol i save kaikaim spesel stiu ol i kolim long "chanko nabe" olgeta de bipo long trening bilong ol.



• Lukaut, sapos dispela kain man i laik sindaun antgap long yu. Yu bai sup stret aninit. Na sapos em laik holim pasim yu, yu bai kamap olsem flet taiá bilong ka. Piksa: Weekend Australia.



Philipina i gat nupela presiden

• Soim sapot long Presiden Joseph Estrada, lida bilong Filipins inap long las Sarere husat ol i rausim na nau nupela meri presiden Gloria Arroyo i tekova.

Nestlé
MILO



Wolves winim OFC Kap

HENRY MORABANG i raitim

SEMPION tim bilong Australia, Wollongong Wolves i winim Oceania Klab sempionsip bihain long ol i nekim Tafea bilong Vanuatu 1-0 long gren fainel long Mande long Lloyd Robson oval.

Dispela win bilong Wolves i helpim ol long bukim tiket long go pilai long Wol Klab sempionsip long Spain long mun Ogas.

Wolves i winim olgeta gem bilong em long Pul A we em i salensim Laugu United (Solomon Ailan), Tonga, Napier City Rovers (Nu Silan) na YumiFM Unitech (PNG).

Ol boi Australia i bukim tiket we ol bai salensim Real Madrid (Spain) na Boca Juniors (Argentina).

Tupela tim wantaim i kamapim gutpela pilai tru tasol Wolves i strong moa long sait bilong midfil

Kosa bilong Wolves Ron Corry i mekim sampela senis na bringim ol pilaia olsem Robert Stanton na Beren Sullivan i kam insait we i kamapim gutpela pilai long helpim ensin rum bilong Wolves.

Gol bilong gem ya i kamap taim yangpela pilaia Jay Lucas husat i

kikim wanpela bal long kona kick na painim straiika Scott Chipperfield long go insait long umben.

Bihain long gem kosa Corry i givim bikipela tok tenk yu i go long ol lain Vanuatu long givim gutpela gem long ol.

"Dispela gem em wanpela strongpela stret. Gem i strongpela stret long tonament," Em i tok.

Corry i tok ol boi bilong em i pilai strong tru long bikipela san we ol i no save pilai long winim dispela gem. Long namba tu hap, klostu ol boi bilong em lus, tasol em i gutpela try long win ya.

"Mipela i mekim ol samting inap tru long winim gem ya," kosa bilong Wolves i tokim Wantok bihain long gem.

Golkipa bilong Wolves Daniel Beltrame i kamapim gutpela gem tru. Em i wok long kisim bal tasol i mekim bikipela ol kik long givim hat taim long ol pilaia bilong Tafea long kisim win na pilai.

Wanpela yangpela pilaia bilong Wolves Stuart Young i painim hat liklik long pilai long san na ol i rausim em. Arapela biknem pilaia Stanton i kisim ples bilong em long strongim midfil long win.

Koiari laik strongim wok bilong spot

KENNEDY EDENE i raitim

KOIARI Lokel Level Gavman (LLG) nau i wok long tingting long sanapim wanpela Spots edministresim bodi insait long eria bilong em.

Dispela bodi sapos ol i setim em bai strongim wok bilong ol spot ektiviti insait long eria.

Koiari LLG i tingting long statim long neks mun. Nem bilong dispela spot bodi em Koiari Spots Kaunsil (KSC) na em long pro-

HUREL SPOT
RIPOT

motim, developmen na kisim ol spots ektiviti putim wantaim na tu luksave olsem ol pablik fans we asosiesen save kolektim olsem registresim fis em ol mas yusim gut.

KSC bai tu lukautim ol mani we ol wanwan spots asosiesin save yusim. Dispela we ol bai traum lukautim gut mani.

KSC bai i gat pawa long mekim lo bilong spot na tu long mekim disisen aninit long

refom gavman o Orgenik Lo bilong Provinsel Gavman na Lokol Levul Gavman.

Long stat bilong dispela spots bodi bai i gat interim komiti. Ol komiti ya bai makim ol wanwan spot insait long eria. Siaman bilong Yut na Spots Lokel Eksekutiv Kaunsil bai kamap olsem siaman.

Lo na Oda em wanpela bikipela hevi tru olsem na kain spot bodi olsem i ken helpim tru ol yangpela insait long Koiari eria long sindaun gut.

Koiari LLG i gat bikipela tingting long go pas na bungim ol yut long pasin bilong pilai spot.

Presiden bilong Koiari LLG Vovoi Selu i tok dispela em i no projek bilong mekim mani tasol nogat em long helpim yut long stap na bihainim gutpela pasin. Miting bilong dispela spots bodi bai kamap long tupela wik bihain.

Koiari LLG i askim olgeta ol lokel spot asosiesen na ol pilai long kamap long dispela miting long Sande Februari 4.

Tafea karim nem bilong Pasifik Ailan



• Tafea tim bilong Vanuatu husat karim nem bilong Pasifik ailan long gren fainel egen-sim Australia long Osenia klap sempionsip. Ol i lus 1-0 long Australia.

Osenia klab sempionsip i kamap gut

SOKA RIPOT

SIAMAN bilong lokel ogenaising komiti bilong Osenia Klab soka sempionsip Charles Lepani i tok em i anfas tru long we dispela sempionsip i bin kamap long biksiti bilong kantri, Pot Mosbi.

Dispela rijohel soka klab sempionsip i bin stat long Januari 9 na pinis long Mande, Januari 22. Sempionsip ya i pulim ol sampion klab bilong wanwan kantri insait long Osenia rijen.

Ol klab ya i kam long Amerika Samoa, Australia, Cook Ailan, Fiji, Nu Silan, Solomon Ailan, Tahiti, Tonga, Vanuatu, Western Samoa na Papua Niugini yet.

Mista Lepani i tok dispela Osenia klab sempionsip i kisim planti mani tru long holim. Na em i amamas long wanem komiti bilong em i mekim

gutpela wok tru long holim dispela tonamen.

Em i tok "em i amamas long we dispela tonamen i bin ran na dispela em wanpela gutpela eksperiens bilong em.

Siaman i tok em i no bin kisim wanpela pas i komplem o toktok long ol hevi ol i bungim i kam long ol tim.

"Mipela i no harim tru wanpela samting o toktok long haus slip, sekyuriti o ran bilong kompetisen," Em i tok.

Em i tok wanpela hevi tasol i kamap em taim ol trenspot i no save kamap long taim long karim ol tim i go bek long taim bilong pilai. Dispela hevi i kamap bikos planti senis long ol taim i kamap.

Lepani i tok i gat 9-pela bagarap tasol i kamap. Bikipela tru em Aaron Japu bilong YumiFM Unitech i brukim lek bilong em. Boi Lae ya i brukim lek

taim em i bam wantaim wanpela pilaia bilong Foodtown Warriors bilong Fiji.

Ol arapela birua i kamap em taim ol pilai i kisim taim long sans na dring wara klostu klostu.

Em i tok em i gutpela eksperiens na PNG i ken holim sampela bikipela tonamen tu. Tasol bikipela hevi em PNG soka i nogat gutpela stadion long holim dispela ol intanesenel tonamen.

Sampela ol opisel bilong ovasis kantri i ting, em bai gutpela sapos ol lain i ken pilaii sampela gem long nait. Tasol arapela bikipela hevi gen, em bikos nogat inap lait long kik long en.

Kosa bilong Napier City Rovers Charles Howe na kosa bilong AS Venus bilong Tahiti Sore Jakobsen i tok sampela gem i kamap long nait bai gutpela tru ya.

Nestlé
MILO

IKEN WOKIM GUTPELA SAMTING LONG YU




• Kepten bilong Wolves na Kepten bilong Tafea (Vanuatu) i sekhan senisim ol liklik fleg bipo ol i stat kik.



• Fulbek bilong Vanuatu i blokim tru pilaia bilong Australia long fainel bilong Osenia Kap.



• Ol Wolves (weldok) bilong Australia i singaut amamas long win bilong ol i winim Osenia Kap.



• Raithan: Pele bilong PNG, Philip "Kauboi" Ragi i kikim-op fainel bilong Osenia klap soka sempionsip namel long Wollongong Wolves bilong Australia na Tafea bilong Vanuatu. Australia win 1-0.

• Lephon: Kepten bilong Tafea FC bilong Vanuatu, Noel Vari i apim rana-ap kap.

Ol poto: IVAN BAYAGA-U.



Jeffery Bai i winim spes insait long Sevens tim

SEMPION rana bilong Papua Niugini Jeffrey Bai em wanpela bilong ol nupela pes i resis long winim spes insait long ragbi yunion Sevens tim long go pilai long Nu Silan. Dispela sempionsip bai kamap long Februari 9-10.

Bai husat i makim Goroka long nesanel 15's tonamen na tu Satellite Sevens tonamen las yia i winim tru lewa bilong ol selekta long gutpela spit bilong em.

Bai wantaim ol 8-pela nupela pes insait long 12-man skwat we ol bai pilai long Intenesanel Ragbi Bot Sevens tonamen long Auckland, Nu Silan. Ol nupela pes em Raymond Semi (Mendi), Francis Han (Namatanai), Mapa Gera, Amos Dinaul

(Daru), Lawrence Posu (Pot Mosbi), Albert Kaupa, Moses Asimba na John Milba (Lae)

Dispela tonamen long Auckland em wanpela tonamen tasol we PNGRFL i tingting long go stap na resis.

PNGRFU i stapim tingting long go salens long Brisben Sevens long (Februari 16-17). Ol arapela tonamen long Eria em Shanghai 7's (April 9-10), Tokyo 7's (April 9-10).

Presiden bilong PNGRFU Graham Osborne i tok "Nem bilong ol nupela pilaia em long soim olsem nesanel tim i laik stat gut wantaim ol nupela pes long tim.

"Ol tim long bipo i no mekim gut wok olsem na senis i kamap.

"Satellite tonamen i kamapim gutpela stori tru bilong ragbi yunion. Nau yet i gat planti ol nupela pes i stap long tim.

"Mipela lainim planti samting na mipela bai traim long gro bikpela long ol samting i kamap bipo.

"Seleksen bilong ol pilaia long Mendi, Rabaul na Namatanai i soim tru olsem ol liklik senta bai kisim helpim i gat long IRB.

Bipo long Nu Silan 7's tonamen, Osenia Ragbi Yunion Federesen bai holim namba tu miting bilong em.

Osborne i tok olsem i gat sampela toktok i raun olsem Osenia Sevens bai kamap long PNG long sampela taim bihain long dispela yia.

Ol opisel bilong LSA wari

SOFBAL RIPOT

OL opisel bilong Lae Sofbal Asosiesen (LSA) i wari olsem planti ol klab i no soim laik moa long putim tim long pilai bihain long longpela Krismas na Niu Yia holide.

Wanpela opisel wantaim LSA Enoch Darius i autim dispela toktok bihain long planti fofit i bin kamap long sofbal resis las wiken. Em i tok em i no save gut long as watpo na ol klab i no putim tim.

Mista Darius i tokaut nau olsem ol eksekutiv bilong em nau i wok

long traim painim we long stretim dispela hevi.

LSA bai statim namba tu raun bilong em long dispela wiken.

Insait long kompetisen bilong ol meri, Bismark i go pas wantaim 20 poin, bihain Karanas na Aviat long 16 poin. Telikom i stap namba tri ples wantaim 15 poin, Marlin 14, Manalos 13 na NGI 12.

Wanpela strongpela tim long bipo, Malangan i wok long painim hat tru long putim tim insait long B gret divisen bilong ol meri. Nau yet Malangan i ran long namba 7 ples long poin lata.

Na long resis bilong ol man, Karanas i roket stret wantaim 17 poin, Aviat na Raiders long namba tu ples 16, NGI 14, Marlin 12, BHP Eagles 10.

BHP Eagles (meri) na Telikom (man) i no putim tim las wiken.

Na long ol gem i kamap las wiken, Hero Sharks autim Admiralty Marlin 7-6. Sharks i no yusim sevis bilong sempion pitsa Pauline Bulumaris tasol ol i pilai strong long winim dispela gem.

Karanas i autim Island Hawks 7-5, Aviat em tu gut long YMCA 14-3 na NGI i winim gem long fofit.

Rana bai resis long Melanesian sempionsip

ARLETIK RIPOT

PAPUA Niugini Atletik Yunion (PNGAU) i makim pinis wanpela skwat long makim kantri long namba wan Melanesian Atletik sempionsip long Fiji. Dispela sempionsip ya bai kamap semtaim wantaim Fiji Nesanel Atletik sempionsip long mun Epril (13-14).

Ol i makim 16 spotman na meri husat bai bihainim wanpela strongpela trening program bilong ol.

Insait long seleksen trials long Mas 24-31 ol bai makim fainel skwat.

Presiden bilong PNGAU Tony Green i tok ol i makim taim i

bihain krismas bilong ol spotman na meri na tu wanwan taim bilong ol long ran resis.

"Wanem rana i no bungim taim bilong em bai aut long nesanel sempionsip," Mista Green i tokaut olsem.

Em i tok olsem ol i no makim yet tim opisel long ibhainim ol dispela rana long Fiji. Aplikesen bilong wanwan ol lain long kisim wok olsem kosa na menesa em eksekutiv bai makim long miting bilong long Mas 2, 2001.

Skwat em Mae Koime, Nessie Ogisi, Lynnette Bureng, Della Mavara, Lorraine Bailey, Grace Wescot, Rachael Kapera, Miriam

Goije, Henry Ben, Joseph Kambu, Eddie Mathias, Wally Kirika, Levi Kuamin, Jimmy Jacob, Simon Benari na Sandy Katusese.

Insait long arapela stori, Peter Pulu bai makim kantri long Wol Indo Atletik sempionsip we bai kamap long Lisbon, Spain. Dispela sempionsip ya bai kamap long Mas 9-11.

Dispela em bai namba tri traim nau Pulu i stap long dispela kain resis. Bipo em i go resis long 1995 long Barcelona na long 1997 em long Paris.

Taim bilong em long 1995 em i opim tru ai bilong ol lain husat i lukim gem we em i pinis

namba 5. Taim bilong em 6.79 sekens tasol em i aut long fainel.

PNGAU i tingting long salim Pulu i go long Brisbane, Australia, taim em i go long Spain.

Ol arapela rana tu bai kisim wankain helpim long bihain taim.

Tupela rana Mowen Boino na Ann Mooney bai trening long Osenia Trening Koles bilong atletiks long Brisbane long pinis bilong mun Mas. Clement Abai i stap long Ameria na dispela ol sampela top rana bilong kantri.

Arapela tupela rana Ivan Wakit na Jeffrey Bai bai kisim tu wankain helpim long bihain taim.

Pasifik i gat nem nau long OFC salens, presiden i tok

YAKAM KELO i raitim

OSENIA Futbol Konfederesen (OFC) soka salens i no moa bilong Australia na Nu Silan tasol. Ol Pasifik kantri tu i soim olsem ol tu i ken salensim tupela bikpela kantri ya long winim OFC taitel, presiden bilong OFC Basil Scrasella i mekim dispela toktok bihain long gren fainel namel long Tafea Vanuatu na Wollongong Wolf Australia long Mande dispela wik. Wollongong Wolf i winim Tafea Vanuatu 1-0 long fultaim.

Mista Scrasella i tok OFC tonamen em nau tonamen bilong ol Pasifik kantri tu bikos ol i soim tru dispela insait long 16 de tonamen long Mosbi, Papua Niugini. Bipo Australia na Nu Silan tasol i save salens na wigim dispela taitel bilong OFC bikos soka resis i save strong long tupela kantri ya. Tasol nau ol Pasifik kantri i soim strong bilong ol tu long kik soka insait long dispela bikpela resis we ol opisel bilong OFC i ting ol Pasifik kantri inap winim dispela taitel tripela krismas bihain.

Mista Scrasella i mekim bikpela tok amamas na tenkyu i go long Charles Lepani na ol OFC oge-naising komiti bilong Papua Niugini na tu Papua Niugini Futbol Asosiesen (PNGFA) husat i go pas long lukautim dispela 16 de

soka tonamen i kamap gut tru na pinis tru long Mande dispela wik.

Em i tok amamas tu i go long ol manmeri bilong Pot Mosbi long givim gutpela sapot tru long kamap lukim na sapotim soka na mekim dispela tonamen i kamap gut tru.

Presiden bilong PNGFA Madui Andrew i tokaut olsem PNG i soim tru olsem em i ken lukautim kain bikpela soka tonamen we ol tim long ovasis i ken kam na pilai long hia. Na PNG i soim tru olsem em i ken mekim dispela bihainim dispela 16 de soka tonamen bilong OFC we i kamap gut tru na pinis gut tru long dispela wik.

Mista Andrew i tok nau Vanuatu i soim tru olsem em i ken kik insait long gren fainel egensim Australia na dispela i soim klia olsem Pasifik i ken kik insait long dispela OFC soka tonamen long bihain taim. Soka nau i kirap na strong insait long Pasifik rijon nau, em i tok.

Insait long dispela gren fainel bilong OFC soka salens namel long Tafea Vanuatu na Wollongong Wolf long Mande dispela wik, dispela i bin wanpela strongpela na hatpela gem tru.

Australia i painim hat tru long skorim gol long mak bilong Vanuatu hariap bikos Vanuatu i strongim tru banis bilong em long beklain. Tasol Australia i wok long bungim bikpela salens tu long gol-


mak bilong ol bikos Vanuatu i wok long sut i go i kam insait planti taim tasol ol bal i go wok long abrusim maus bilong golmak.

Difens i tait na tupela tim wantaim i taitim i go inap hap taim we nogat skoa i kamap.

I tru Wollongong Wolfs i painim bikpela salens tru nau bikos Vanuatu i no pilai wankain olsem ol arapela Pasifik kantri we Wolf i painim isi long skoa. Tafea i bin yusim planti slaid takel we i katim planti bal long lek bilong Australia na dispela em wanpela bikpela salens ol i bungim.

Long namba tu hap tupela tim wantaim i mekim save gen long painim spes long mak bilong narapela narapela inap namba 14 bilong Wollongong Wolf i kisim wanpela bal na ron long kona na kik i kam insait long golmak bilong Tafea we tripela fulbek bilong Tafea i resis long rausim dispela bal na bal i pas long lek bilong ol yet na i go insait long umben. Dispela gol i mekim Wollongong i yusim olgeta strong bilong em long lokim olgeta kona na spes na tu holim bal long lek bilong ol yet long kilim taim. Dispela i mekim na taim i abrusim Tafea na Wollongong Wolf i winim gren fainel 1-0 skoa long fultaim.

Dispela gren fainel tu i bin pulim planti manmeri tru i kam pulapim sit long bikpela pilai graun bilong Pot Mosbi Ragbi Lig.



• **Presiden Basil Scarsella i sindaun wantaim biknem soka Philip Ragi long statim gren fainel namel long Wollongong Wolves na Tafea. Wolves win 1-0.**

PNG bai resis long Pasifica Kap

KRIKET RIPOT

PAPUA Niugini Cricket Bot i makim pinis wanpela strongpela skwat long makim kantri insait long Pasifica Kriket sempionsip. Dispela sempionsip bai kamap long Auckland, Nu Silan long Februari 1-9.

PNG tim i kamap olsem feveret long winim dispela taitel wantaim Fiji na Nu Silan Maori i kamap namba tu na namba tri.

PNG tim i stap long sem pul (B) wantaim Samoa, Cook Ailan na Nu Silan Maori. Long Pul (A) i gat ol arapela tim olsem Fiji, Nu Kaledonia, Vanuatu na Tonga.

Dispela sempionsip em olsem long redim tim long bikpela Intanenesanel Kriket Kaunsil tonamen we bai kamao long Kanada long June na Julai.

Siaman bilong ol selekta Allen David i tokaut olsem "Dispela tim ya em ol i makim long gutpela gem bilong ol. Planti ol gutpela pilaia i stap long Pot Mosbi olsem na i gat planti pilaia.

"Pot Mosbi i gat planti ol gutpela pilaia olsem na skwat i gat planti ol pilaia bilong hia,"

"Tim i balens tru wantaim ol junia na sinia pilaia. Sampela bilong ol pilaia em ol eksperiens tru husat em ol selekta i painim hat tru long lusim," Mista David i tok.

Lapun pace bowler Tuku Raka i stap yet long tim bikos em i save skorim gutpela ran tru ya. Fom bilong em long klab level i gutpela tru olsem na ol selekta i painim hat long lusim em.

Arapela yangpela pilaia husat i gutpela tru em Ross Vagi husat i kamapim gutpela sisen tru wantaim Mobil Steamships. Boi ya i go pas long autim planti wiket long kompetisen ya.

Ol arapela pilaia long skwat em olpela kepten bilong PNG Anda 19 Wala Vala, Gimapau Keimelo' na Rarua Dikana.

Arua Uda em wanpela ol namba wan pilaia ol selekta i kisim long gutpela fom bilong em long dispela yia. Ful skwat em Navu Maha (kepten), John Ovia (vais kepten), Arua Uda, Wala Vala, Daniel Faunt, Pala Karona, Keimelo Vuivagi, Rarua Dikana, Tuku Raka, Kopi Kopi, Giampau Kemelo, Ros Vaki, Toka Gaudi, Toua Vagi (tim menesa) na kosa em Lakani Oala.



IKEN WOKIM GUTPELA SAMTING LONG YU

Kaubo i amamas long opim soka fainel

SOFBAL RIPOOT

HENRY MORABANG i raitim

BIKNEM soka pilaia bilong bipo, Philip "Kaubo" Ragi i amamas tru long opim bikipela Osenia Klab soka sempionsip long Pot Mosbi las Mande.

Kaubo em nem planti lain i save pilai soka bai tingim gut bikos Kaubo i gat kik taim em i save tasim bal. Kaubo na arapela biknem pilaia em, Willie Seph, bilong Kavieng long Nu Ailan.

Kaubo i gat nem long soka taim em i save pulim bal olsem Pele bilong Brazil na skorim gol em wanman. Na kain stail ya i winim hat bilong planti soka pilaia na tu ol sapota long taim bilong em.

Taim Kaubo i save pilai, em i save kukim stret Bisini Soka Graun na Klab Jemania ova.

Long stat bilong mun, Kaubo i kisim nius bilong soka na em i lusim Wes Nu Briten na kam long Pot Mosbi.

Em i kamap long lukim fainel namel long top 4 tim long fainel na lek bilong em i sikirap stret.


Em i tokim *Wantok* olsem em i kam long laik bilong em yet. Tasol em i amamas tru long ol ogenaizing komiti i luksave long em na makim long kikim op dispela fainel namel long Tafea FC bilong Vanuatu na Wollongong Wolves bilong Australia.

"Mi amamas tru long dispela luksave. Taim em i mekim dispela toktok na aiwara bilong amamas i pundaun long ai bilong em."

Dispela Osenia klab sempionsip em bikipela samting tru. Na em i amamas olsem ol lain OFC na ogenaizing komiti i luksave na larim em i kikim dispela bal.

Kaubo bai go bek long Wes Nu Briten na sindaun amamas bikos em i opim dispela bikipela rijonel soka sempionsip.

Soka i kisim Kaubo na Yunivesiti klab i go long olgeta hap bilong Saut Pasifik. Em i makim tu kantri long Saut



Philip "Kaubo" Ragi i sanap redi long kikim bal

Wolves bilong Australia na Tafea bilong Vanuatu.

Pasifik Gems long Guam na tu pilai long planti nesenel soka sempionsip makim Yunivesiti na tu Pot Mosbi.

Kaubo em i skul pater long Mesa Seminari long Bomana

na i save pilai long seminari tim we em i painim aut olsem em i ken pilai soka. Orait em i lusim na joinim Yunivesiti soka klab we nem bilong em i stat long kamap bikipela.

PMSA holim jeneral miting

POT Mosbi Soka Asosiesen (PMSA) bai holim jeneral miting bilong em long dispela wik Sarere long Lamana Hotel Conference rum.

Eking presiden bilong PMSA Mark Kelep i tok insait long dispela miting, ol bai makim nupela presiden na tu makim nupela kompetisen na fi na kamapim bilong ID kat long soka fil.

Mista Kelep i tok arapela ol toktok we bai kamap long miting em

- Minit bilong las miting
- Fainensal Ripot bilong 2000
- Baset bilong 2001
- Kalenda bilong 2001

Em i askim olgeta klab na tim long kamap long miting. Em i tok olsem ol lain i no kamap long miting bai

painim hat bikos ol senis ya bai i no gutpela long ol.

PMSA i tingting long statim pri-sisen long namba tri wik bilong mun Februari. Wanem tim i laik stap insait long pri-sisen i mas ringim siaman bilong PMSA Fainens Enoch Pokarup na givim nem bilong tim.

Mista Kelep i tok anuel korporet tonamen bai kamap yet long lsten wiken long April 15-16. Bikipela samting i kamap long dispela de em lig sempion bilong PMSA bai salensim primia bilong 2000 soka sisen.

Eking presiden i tok dispela Osenia klab soka sempionsip i kirapim tru nem bilong soka insait long kantri. Olsem na em i laik olgeta lain i mas kam na givim sapat long lokel soka asosiesen.

Sempion Sisters i kisim taim long Goroka

SOFBAL RIPOOT

SEMPION tim bilong Goroka wimens sofbal, United Sisters i kisim sampela skul las wik bihain long Malangan i nekim ol 6-3.

I no biknem pitsa olsem Belinda Mapua i mekim wok, nogat. Yangpela resa ya Hendrika Vainak i soim olsem em tu i gat namba long pitsa taim em i go pas long autim ol biknem beta bilong Sisters.

Mapua i stap riserv na em i salim ol yangpela olsem Cynthia Pagusen, Josep Varip, Lydia Kapinias an Patricia Paliklik long kisim fil na salensim ol top pilaia bilong United Sisters.

Ol yangpela i kisim sapos long Roslyn

Pagusen, Regina Nake, Grace Edward Nandi, Jenny Kalapi Keleeli na bihain Mapua yet i stap long outfil.

Grace Nandi na Regina Nake i skorim tupela ran taim ol lain Sisters i mekim sampela asua.

United Sisters i bekim tupela go long Jane Titus na Serah Nao. Susa ya Marylanm Greg Maul i no kamap hom em i stap tasol long namba tu bes.

Ol arapela beta olsem Andrew Lai, Cecila Drapak na Sharon Lai i no stapim olgeta pilaia long winim bes.

Malangan i traim long rekotim poin tasol nogat. Ol meri Nu Ailan i skorim tupela moa ran i kam long Kalapi Keleli na Josey Varip. Nandi na Kapinias aut na

Milred Lai i aut.

Nogat wanpela skoa i kamap long namba tu na namba tri ining. Insait long namba foa ining, ol lain Malangan na Sisters i rekotim wanpela poin tasol.

we ol lain Malangan i win 6-3.

Na long arapela ol gem, Burma Hawks putim tim bihain long planti fofit. Ol i tingting long pilai gut tasol ol lain Degi Telikom Bullets i wilwilim ol stret.

Bullets i gat ol pilaia olsem Roslyn Salatiel, Anna Sarea, Oddie Kamaniel, Linda Gamuta, Vellyn Kamaniel, Dorren Mission, Sheila Mission, Juddy Mission na Gene Mission, Martha Sakias na Freda Kamaniel i kamapim strongpela gem we ol lain Hawks ino inap stapim.

Ol spot dro

NCD PUBLIC SERVANTS OFF-SEASON SOCCER BISINI GROUNDS

Round 8 Saturday, January 27, 2001

Bisini 1		
08.00am M2	Parliament vs DCA	
09.05am W2	Parliament vs DCA	
10.10am W2	Post PNG vs POSF	
11.15am M2	Post PNG vs POSF	
12.20pm W2	UPNG vs Telikom	
01.25pm M2	UPNG vs Telikom	

Bisini 2		
08.00am M1	Police vs Fisheries	
09.05am W1	Police vs Fisheries	
10.10am M1	Harbours vs IRC	
11.15am W1	Harbours vs IRC	
12.20pm W1	A/General vs Health	
01.25pm M1	A/General vs Health	

Sunday, January 28, 2001.

Bisini 1		
08.00am M2	Works vs PNGBC	
09.05am W2	Works vs PNGBC	
10.10am M2	Teachers vs Pangtel	
11.15am W2	NCDC vs Defence	
12.20pm M2	NCDC vs Defence	
01.25pm W2	Air Niugini vs BPNG	
02.30pm M2	Air Niugini vs BPNG	

Bisini 2		
08.00am M1	Transport vs NBC	
09.05am W1	Transport vs NBC	
10.10am M1	Cellnet vs Commerce	
11.15am W1	Education vs Naqia	
12.20pm M1	Education vs Naqia	
01.20pm W1	NSO vs Elcom	
02.30pm M1	NSO vs Elcom	

Bye: Pool 1 NPF (men/women), Cellnet (Women) Pool 2 IPIR (men/women), Pangtel

OKKAINHENS RUGBY LEAGUE OFF-SEASON

Venue: Hohola Oval

Sunday, January 28, 2001.

0800am C	Raiders vs Cowboys
0930am B	Gaikase vs United
1000am B	Bears vs Raiders
1030am B	Cowboys vs Kesosa
1100am B	Paga Hills vs Harks
1130am B	Tapaya vs Falcons
1200am B	Knights vs Nami Bros
1310pm A	Gaikase vs United
1455pm A	Bears vs Raiders
1535pm A	Cowboys vs Kesosa
1610pm A	Paga Hills vs Harks
1720pm A	Tapaya vs Falcons
1760pm A	Knights vs Nami Brothers

Brothers wilwilim Gazelle long Goroka

SOFBAL RIPOOT

JOHN SUPA i raitim

LOPI Brothers i winim Gazelle 15-11 insait long bikipela A gret gem bilong Goroka mens sofbal kompetisen.

Dispela win em long bekim stret dinau taim Brown Eagles i mekim save long ol long las wiken.

Tupela tim wantaim, Brothers na Gazelle i skorim

ol poin long laik bilong ol. Tasol Brothers i strong long las ining long winim dispela gem.

Presiden bilong klab Steven Mondiai i tok olsem dispela bikipela skoa i no mekim em i amamas. Em i tok ol boi i wok long slek liklik we klostu tru ol i lus long ol lain Gazelle ya.

Em i tok olsem ol boi bilong em i laki tru long las ining we ol i skorim sampela poin long winim Gazelle.

Gazelle i pilai strong long namba foa ining we ol i sko-

rim 7-pela poin long stapim bikipela hul namel long ol na Brothers. Tasol Brothers i laki long skorim sampela moa poin bipo long ol ining long win.

"Mipela i wok long traim long pilai long fainel. Olsem na mipela bai pilai strong na i no inap isi long arapela tim. Mipela save olsem planti ol pilaiab ilong Brothers i no save pilai sofbal tasol mipela ken soim ol nambis olsem, hailens tu i gat save long pilai sofbal ya," Mondiai i tok.

"Mipela save dispela

wiken em stat bilong namba tu raun. Ol tim bai i no inap givim mipela isi gem. Mi tokim ol pilaia bilong mipela long kamapim gut long trending long winim gem," Presiden i tok.

Brothers i statim gut gem long Sande. Billy Kassman Tolopi i wokabaut i go long namba wan bes bikos pitsa bilong Gazelle Greg Maul i no pits gut.

Orait bihain long em, Gaulim Tags Kamaniel i bihainim em. Tupela i kam hom taim Mark Tovue i

paitim wanpela gutpela laindraiv bal long kisim tupela i kam hom.

Ol arapela beta bilong Brothers Martin Wilson, Dimax Kauna, Richard Tuki i kisim K2 long han bilong pitsa Maul.

Gazelle i kisim tripela ran i kam long Allan Dito, Joel Korong na Mathew Tinal. Ol arapela pilaia bilong Gazelle George Anian na Chris Tanga i no kam hom.

Luke Wairiki na Bonny Badirarina na Ray Kitumbu i aut.

Arapela hom bilong Brothers i kam long Vincent Moani husat i paitim wanpela gutpela al. Ol lain Gazelle tu i skorim wanpela i kam long Wairiki na Korong. Tupela i paitim hom ran.

Narapela las tu ining em ol lain Brothers i skorim bikipela poin stret. Ol pilaia olsem Amo Kassam, Gaius Gamuta, Kolish Oddey na Knox Paiyako.

Brothers i wok long go pas long skoa olsem 15-4 tasol Gazelle i kam long las minit na traim winim ol na taim i hariap tru long sevim nek bilong ol.





• Nambawan hotel long Pot Mosbi nem bilong em Moresby Hotel.


Mesej ikam long Jenerel Menesa bilong SP Brewery, Hein Van Dort

SP BREWERY ikam longpela wei tru long taim Joe Bourke na diriman bilong em long bildim wanpela Brewery 50-pela yia igo pinis.

Olsem wanpela ogenaiseisen, mipela i wokim planti senislóng ol dispela yia.

PNG tu wok long kamap wanpela kantri we igat moa sans long ekonom bilong em, na ol gutela na nogut sait bilong dispela wok. Mipela long SP i luksave olsem sapos, mipela laik wokim wok bai mipela bai mas wok olsem ol narapela kantri wok long wok.

Long tanim bilong dispela senturi, SP Brewery i painim ol narapela wei long wokim bisnis bilong em insait na autsait long PNG, na long wokim gut ol samting olsem SP Brewery bai mas kamapim gut ol samting



• Jenerel Menesa bilong SP Brewery Hein van Dort.

olsme kwaliti, hau wok bilong ol bai kamap, wok wantaim ol kastoma, wok gut wantaim ol narapela kampani, kamapim gutpela sosol modul na bren menesment.

Dispela olgeta wok long kamap gut long wanem ol wok man meri wok long wok hat tru, na mipela gat inap mani na long wanem mipela wok long lukautim dispel ahap mipela i wok long em.

Presenteisen bilong gavaman baset i soim olsem ino wol tasol wok long resis, hia long Papua New Guinea dispela wok long kamap tu. Impot duti bilong bia wok long go daun.

Mipela save olsem dispela resis bai kam tasol mipela laik save taim. bai e i kam. Mipela i redi na stap na sapos dispela resis i kam nau mipela save olsem mipela bai stap long lukim dispela resis.

Mipela laik tok tenk yupela long olgeta ol kastoma na konsumu. Mipela laik tenk yu long olgeta ol bisnis man meri husat save wok wantaim mipela na tu long tokave olsme mipela wokim bai yupela olgeta iken hamamas long ol yia ikam.

Na tu mipela laik tok tenk yu long ol provinsol gavaman, ol plis, dipatmen bilong helt, dipatemen bilong leiba na emploimen, Red Cross, ol sios na lika industri long sapot bilong ol.

Na laspela hap tok mi laik tok em tenk yu tru long ol man meri husat i wok long pela taim tru long SP na long hat wok bilong ol long wokim gutpela bia.

PEDDLE THORP




Architects


Congratulations

SP Brewery with achieving this Milestone in the Development of Papua New Guinea

P.O. box 599, Port Moresby, Papua New Guinea
 Telephone: (675) 321 4688 - Facsimile : (675) 321 3446
 Email: ptpng@online.net.pg - Web: www.peddlethorp.com.au



Amamasim 50 yia



Dei SP kamap

Joe Bourke i bildim wanpela haus bilong dringim bia

Long Novemba 1947 dispela man Joe Bourke aplai long kisim laisens long bildim wanpela haus bai ol pipel i ken go na dring bis long em. Long Disemba em i kisim tok orait long, tasol em bai mas pinis long bildim dispela haus long 8-pela mun. Dispela haus em laik sanapim bai stap long Wau na em laik kolim Kaindi Hotel.

Long dispela taim em i laik bildim dispela haus, em i bihain long wo na igat planti pipel wok long painim hap long stap long em. Bihain long em i bildim dispela haus em i senisim nem bilong em igo long Wau Hotel.

Joe Bourke em wanpela long ol dispela nambawan man long go kamap long Morobe golfild. Em bilong wanpela long North Queensland town em Ay. Em i kam long New Guinea long 1925 olsem boss bilong ol kokonut planteisen. Tasol em

ino laikim dispela wok tumas na long 1926 em i kamap wanpela polis man long Morobe fild. Wok bilong em long dispela hap em long patrolim Salamaua Trek na lukautim ol dispela ol man husat wok long karim ol kago igo ikam. Long 1927 em i lusim wok bilong em olsem polisman na em kamap wanpela golmaina.

Taim wo i kamap long 1942 Joe i joinim ANGAU (Australia New Guinea Administrative Unit). Taim wo i pinis long PNG Joe wantaim meir bilong em Anna i kam stap long Lae liklik taim tasol bihain ol igo bek gen long Wau.

Ol dispela hap ol istap long em ino luk olsem bipo, Wo i bagarapim dispela hap. Na tu ol dispela taim wo istat, pipel husat istap long Wau na Bulolo i kukim sampela long ol dispela samting bai ol Siapan no nap long usim ol samting ol i hat wok long bildim.

Tasol taim wo i pinis inogat wanpela hap long stap long em na dring bia olsem na Joe

Bourke i raitim wanpela tok-save olsem laik wokim haus bilong dispela wok tasol.

Taim SP Brewery i kamap

Ol dispela ol pipel husat i kam pastaim ino save isi long dring bia. Hap i hot na laipstail bilong ol pipel em i nais tru. Ol dispela ol pipel husat i kam bek gen long PNG bihain long wo i painim olsem inogat bia. Bia wanpela feivaret bilong ol pipel, na bipo long wo ol pipel bilong Australia save salim planti bia, taim igat ol narapela bia i stap bilong wol tu.

Na husat gen bai tingim long wokim dispela wok? Nogat man tasol Joe Bourke. Em wantaim narapela poroman bilong em Tom Yeomans i tingim na askim halivim long ol narapela man.

Long Disemba 23, 1950 South Pacific Brewery i kamap olsem wanpela bisnis bilong mekim bia.

I go moa long pes 23

• Joe Bourke em wanpela long ol husat i kamapim SP Brewery.

ERICSSON  Telephone Systems

CONGRATULATIONS

SP BREWERY

with achieving this

milestone in the


Development of

Papua New Guinea

TEL: 325 6566
FAX: 325 4445

ERICSSON BUSINESS COMMUNICATIONS

Port Moresby, Croton Street, Hohola
P.O. Box 5602, Boroko.
Email: sales@ericsson.com.pg



Sampela ol spot SP
i sponsarim long
dispela taim em golf,
Tae Kwon Do, na ragbi.





Amamasim 50 yia



I kam long pes 22

'Em i gutpela bia tru!'

Long Novemba 26, 1952, ol i salim South Pacific bia long nambawan taim. Dispela die em Mande. Long dispela dei Moresby na Papua hotel i salim dispela bia long 10 kilok long moning long wan siling na wan peni long wanpela 7 auns glas long ol ba na wan siling na fo pens long ol launs. Ol man meri husat i dringim dispela bia itok olsem ol i laikim. Wanpela meri husat save wok long ba nem bilong em, Paula Stitt, itok olsem dispela bia em i gutpela. Teist bilong em i klostu long bia bilong Australia. Planti lon gol dispela man meri husat i dringim dispela bia itok olsem dispel abia em gutpela tru. Na wanpela itok olsem, "Em i gutpela bia tru!"

Kompetisen

South Pacific Brewery Limited long Jenuari 1953, dispela kampani igat 7-pela waitman na 25-pela pipel bilong PNG husat i wok long dispela brewery. Long dispela taim igat planti ol kampani husat wok long salim ol kainkain bia insait long PNG. Taim SP Brewery stat long salim bia bilong ol planti long bia ol narapela kampani save salim wok long go daun. Na prais bilong

dispela ol bia wok long go daun. Sampela bia we bipo long SP salim bilong em prais bilong ol i bikpela i wok long go daun.

Long dispela taim wanpela kampani save salim bia bilong Australia tasol. Tasol dispela ino nap wok tru taim SP bia ikamap feivaret bilong ol pipel insait long PNG.

Sampela taim bai ol mas salim bia ol i kisim long Australia i bek gen long Australia.

Dispela i soim olsem bia SP wok long salim em i gutpela na ol pipel husat i wok long baim i laikim.

Wanpela niupela kampani em Guinea Brewery.

Taim igat liklik wari long salim SP

Taim Guinea Brewery stat long salim bia bilong em long 1958, dispela em taim SP wok long pilim hevi bilong kompetisen. Long dispela taim tu ol narapela ol bia wok long kam bek gen long PNG. Long ol kain peles olsem Rabaul igat ol pipel husat ino laikim SP tasol ol i laikim bia bilong Australia.

Long dispela taim tu ol i kisim planti moa pipel long wok long SP Brewery na tu ol wok long wok ples bilong wok wanpela bikpela hap tru.

Ol man meri lon dipela taim wok long halivim SP Brewery long askim bilon gol olsem ol mas karim ol bottle ol dring bia long em igo bek gen long brewery na bai ol i baim ol. Long dispela taim ol boss bilong SP Brewery wok long wari long wanem bia bilong ol narapela kantri istap yet na ol igat planti kompetisen long em. Tasol long Novemba 1962, wari bilong ol i senis long wanem ol pipel bilong Papua New Guinea i kisim rait long dringim bia.

Pait long rausim dispela tambu long dring bia

TAIM Joe Bourke na Tom Yeomans ikamapim dispela grup bilong ol long wokim bia long 1950, ol ino ting olsem long wanpela dei long bihain taim bai ol pipel bilong Papua New Guinea bai dringim bia. Long taim ol waitpipel kam stap long PNG, ol pipel bilong PNG yet i kisim bikpela tok tambu long dring bia long birua bilong ol yet, na long 1950 ol dispela waitman na ol pipel bilong PNG tu i save olsem dispela hap tok bai senis.

Nambawan lo long Britis Niu Gini, No. 1 bilong 1888, itambuim ol pipel long PNG long usim gan, dring bia na wanpela kain drag bai wokim yu silip. Taim Australia i kisim pawa long

lukautim Papua, em i strongim tok long noken larim ol pipel bilong dispela territori long dringim bia. Long 1901 igo inap 1905 igat wanpela kempeign i tok strong olsem imas gat strongpela tambu long ol pipel long Papua long dringim bia. Dispela ol bikman long ol misseneri W.E. Bromilow, Copland King and C.W. Abel, ino laikim dispela lo.

Long Niu Gini tu igat lo olsem ol pipel no nap dring tasol ol dispela lain husat igat laisens inap long baim liklik dring tasol.

Dispela em 1909. Long dispela oda i kam long ol yunion bilong ol neisen long 1920 igo long Australia, ol pipel long Niu Gini ino nap long dringim bia. Long 1949, Papua na Niu Gini, i bihainim dispela lo.

Taim South Pacific Brewery stat long wokim bia long Novemba 1952, ol pipel laikim dispela lo bai stap. Tasol taim ol yia wok long igo ol pipel wok long senisim tingting bilong ol. Long ol dispela 10-pela yia planti long ol pipel bilong Papua Niu Guinea i ting olsem dispela lo em i wan sait tasol.

Taim senis wok long kamap, igat planti bel hat tu. Long 1946 dispela lo i tok olsem i no gat wanpela man meri husat em bilong Papua na territori bilong

New Guinea inap long dringim bia. Tasol dispela lo long 1948 i larim ol hap kas long dring bia tasol long skel bilong ol. Long 1950, dispela lo bilong gan, dring bia na kisim dispela drag bai wokim yu silip, i slak liklik taim ol pipel save dring wain long taim bilong lotu. Bikos ol pipel ino nap long dring bia sampela man istat long dring metileited spirit. Tasol dispela i senis taim ol pipel bilong Papua New Guinea i kisim tok orait long dringim bia long Novemba 2, 1962

Tekova

Bihain long ol pipel bilong PNG i kisim tok orait long dringim bia igat, ol man olsem Dr John Gunther i askim ol pipel long "dring olsem ol man igat save, wokim gutpela pasin na noken hambag.

Tasol dispela taim SP i salim planti bia tru na dispela narapela kampani Guinea Brewery wok long kisim taim.

Long 1964/65 SP Brewery i baim Guinea Brewery. Na Wanpela bikpela samting i bin kamap em long June 1960 enrolmen long ol tekniol skul i soim olsem igat 576 pipel husat i stap long dispela skul na long dispela 576, 270 sumatim laik kamap ol aprentis long ol kainkain wok ol bai kisim.

Too much beer can get you into trouble.



"The money we save drinking less beer helps pay for our PMV."



• Sampela ol toksave i kam long "Operesen Modaresen".

Too much beer can make you poor.



Too much beer can make you unhappy.



The Management and Staff of FU GUI VILLAGE LTD.

would like to congratulate

SOUTH PACIFIC BREWERY LTD.

on their

50th Anniversary
of incorporation.

We will continue to maintain a close Business relationship with you throughout the years and for the years to come.

P.O. Box 7628, BOROKO, NCD.
Ph/Fax: 323 1788 - Ph: 323 0188



PARADISE INTERIORS

*Congratulates
SP Brewery for achieving
this milestone in
partnership with the
Development of PNG.*

Waigani Drive (Near PNGBC, Waigani)

Phone: 325 0088

Fax : 325 0099

Email: paradise@global.net.pg

- Carpet • Vinyls • Tiles • Curtains
- Blinds • Wall Papers • Upholstery
- Furniture • And more...

*Amamasim
50 yia*



SP HOLDINGS LIMITED



• Lephon: Long
1957 taim ol i
wokim namba
wan eksebisen.



• Namel: SP
Brewery long
1957 bipo long
ol i sanapim ol
nupela bilding.



• Lephon: Piksa i
soim SP Brewery
long Lae.

Kongretulesen

South Pacific Brewery Limited

50th Aniversari

Menesmen bilong Ela Motors i amamas long South Pacific Brewery Limited i kisim mak bilon 50 Aniversari bilong en. Ela Motors i amamas long wok wantaim en na lukluk long saplaim ol 4WD ka, bikpela trak na ol masin wantaim ol gutpela sapot long spia pats na kwaliti sevis long ol yia i kam bihain.

Ela Motors

TOYOTA TSUSHO (PNG) LTD

PORT MORESBY PH 3229400 LAE 4722322 KOKOPO 9829100
MADANG 8522188 GOROKA 7321844 KAVIENG 9842788 KIMBE 9835155
TABUBIL 5489060 VANIMO 8571254 PORGERA 5479367 BUKA 9739915
LIHIR 9864066 ALOTAU 6410100

VISIT OUR WEBSITE - <http://www.elamotors.com.pg>



Planti nupela musik grup na stail i kamap

JAMES G. KILA i raitim

LOKOL musik industri insait long kantri nau yet i lukim planti kainkain nupela ol grup na stail bilong musik i kamap.

Nau yet dispela intares long lokol musik i strong tru. Kainkain ol progem i kamap long redio tu TV long promotim lokol PNG musik. Yes, yumi mas amamas olsem dispela industri, maski em i no kisim gutpela sapot long gavman i go strong yet long givim wok na helpim long planti ol yangpela long PNG.

Bai yu guria tu nau yet long harim kainkain ol nupela musik na song i pairap long redio na tu bai yu harim planti ol kainkain nupela kain ol nem bilong ol grup tu wantaim. Ol grup i save yusim tu ol kainkain stail nem tu ya.

Tru tumas sapos yu raun long ol musik stua o ol bikpela stua insait long taun na siti bai yu guria long lukim olsem planti kain naku ol nupela grup i stap pinis insait long ol kaset na piksa bilong ol i stap long kava bilong kaset. Ating ol atis long ol studio i save putim moa taim tru long bilasim gut ol kava bilong ol kaset.

Mi bin tingting long raitim dispela stori bihain tasol long mi bungim sampela lain yangpela bilong Morobe long Goroka. Ol i tokim mi olsem ol i kisim PMV na go long Goroka long traim rekot wantaim Kumul Studio. Dispela studio long Goroka em wanpela lokol man Pat Siwi i ronim na studio ya i stap long Wes Goroka.

Taim ol yangpela man bilong Morobe ya i wok long stori wantaim mi long hatwok ol i bungim taim ol i wok long redi long rekotim kaset bilong ol, mi tingim bek gen long Mosbi taim mi sve raitim ol stori bilong ol grup na atis long putim long niuspepa. Tru tumas, mi save lukim planti man tru i bung ausait long ol studio na wet long givim ol demo-kaset bilong ol i go long ol studio lain. Hia em sampela eksampel na toksave ol atis i save bungim taim ol i redi long go insait long studio.

• Studio kisim palnti demo kaset tru



• Willie Sebas bilong Sagothorns nek bihain long ben.

Taim mi glasim dispela eria bilong demo-kaset mi save sore liklik long sampela ol grup na atis husat i save westim bikpela taim bilong ol tru long fran bilong studio long weit tasol long givim demo-kaset bilong ol.

Ol wan wan grup o ben i save sindaun na raitim ol singsing pinis

wokim demo-kaset bilong ol tu na em bai stretim na bilasim gut kaset bilong ol. Taim ol i mekim dispela pinis ol i save karim i go stret long studio na givim.

Planti i save go sanap ausait long ol studio na weit longpela taim tru. Ol i no save wari ol i save weit weit inap wanpela enjinia o man

“...planti dua bilong ol studio i wok long pulap tru nau”


na pilaim gita, kibot na rekotim ol songs bilong ol i go long wanpela kaset.

Mi save tu olsem sampela man i gat ol liklik ol studio bilong ol long ol haus we ol i save mekim bisnis long karim o rekotim ol demo-kaset. Ol dispela lain i save rekotim ol demo kaset bilong husat grup o man i gat intares long rekot wantaim ol bikpela studio.

Ol ben o grup i mas peim sampela mani i go long dispela man i

bilong rekotim musik i kam bungim ol na toktok wantaim ol pastaim na i ol save go.

Mi save long wanpela grup bilong Madang husat i bin go na givim demo-kaset bilong ol na weit samting oslem 6-pela mun bihain na ol i bin rekot. Dispela em bikos wanpela enjinia hsuat i bin kisim demo-kaset bilong ol i bin lusim na ol i traim hat gen long go bek na redim narapela demo-kaset na bringim i go long studio long rekot.



• Bongas, man husat i go pas long kisim Reks Ben.

Mi save raun i go long Pasifik Gold Studios (PGS), Chin H. Moon Supasauns na Walter Bay Studio long Mosbi na dispela samting.

• Royalti mani helpim ol yangpela

Kain kain toktok i save kamap long sait bilong royalti o mani ol musik man o grup i save kisim taim ol kastoma i baim kaset long stua.

Mi laik tok klia tu long hia olsem taim ol studio i rekotim kaset bilong yu, ol i save kisim sampela presens o hap mani na ol musik man bai kisim hap. Sampela royalti mani em i save long en em 50-toea na K1 long long olupela grup husat planti lain i save gut tru long en.

Wan wan studio i gat reit o mak bilong en yet long givim royalti long ol ben na grup hsuat i rekot.

Sampela lain mi bin toktok wantaim ol i tok olsem planti taim ol i no save wari tumas long royalti, tasol bikpela samting em musik bilong ol i pariap long wanpela kaset album. Dispela em tingting bilong wanwan.

Tasol sampela grup mi skelim i save guria stret na bihainim royalti peimen. Ol i save traim kalap i go long ol studio na rekot na kisim moa royalti peimen. PNG em i fri kantri na em laik bilong ol tasol.

• Sampela bihainim gutpela karai na kwaliti bilong studio

Sampela ol atis na grup mi save toktok long ol i save stori olsem ol i save laikim karai na kwaliti bilong ol studio tasol na ol i save suim het yet long go sanap na weit long dua bilong ol studio.

Sampela toktok mi bin kisim i tok olsem ol i sve laikim saun na musik bilong Pasifik Gold Studios (PGS) bikos saun o karai bilong musik i ples klia tru. Sampela i tok olem ol i laikim PGS bikos ol gutpela kain save man bilong musik olsem Patti Doi i stap na em bai helpim ol long putim save kain save na stail i go insait long musik bilong ol.

Sampela i tok tingting bilong ol long go rekot wantaim CHM em bikos taim ol i rekot ol bai gat sans long kisim promosen insait long ol vidio-klip o piksa.

Hia em sampela toktok bilong ol lain husat i save laikim rekot wantaim CHM.

“Mipela save laik rekot wantaim CHM bikos i gat gutpela promosen bilong ol musik long hap. Bai i sans tu long ol fens na sampota na wantok bilong mipela i ken lukim mipela long ol vidio klip. Dispela em i gutpela we tru long promotim ol kaset na musik bilong mipela,” ol i tok.

Sampela lain husat i rekot wantaim Tumbuna Trak tu i stori oslem ol i save laikim Tumbuna Trak bikos i gat gutpela promosen na tu musik bilong studio i save gat kik. Ol i tok maski studio em i liklik, karai na stail bilong musik i save pairap gut tru na dispela em gutpela tru.

Wanpela grup tu i stori wantaim Tumbuna Trak tu i stori c sem ol i save laikim Tumbuna Trak bikos i gat gutpela promosen na tu musik bilong studio i save gat kik. Ol i tok mski studio em i liklik, karai na stail bilong musik i save pairap gut tru na dispela em gutpela tru.


Wanpela grup tu i stori olsem ol i sve laikim Tumbuna Trak bikos studio i gat gutpela promosen na tu musik bilong studio i save gat kik. Ol i tok maski studio em i liklik, karai na stail bilong musik i save pairap gut tru na dispela em gutpela tru.

Wanpela grup tu i stori olsem ol i save laikim Tumbuna Trak bikos studio ya i save pilaim gut ol likol stail musik na tu ol enjinia olsem Demas Saul na Udd Banag i save bilasim gut ol musik bilong ol.


• Planti musik manmeri i wet yet

Nau yet mi raitim dispela stori mi ken tok olsem planti ol grup na tu ol wan wan atis i wet yet long kisim ansa i kam long ol studio. Tru tumas, planti i save belhat bikos ol i weit longpela taim na ol i no kisim yet ansa. Sampela i save kisim ansa na dispela ansa i save tokim ol olsem ol i mas go bek gen na taitim na taitim na stretim gut demo bilong ol na kisim i go bek gen long studio.

Ating dispela i soim olsem developmen bilong dispela industri i go strong. Yumi mas amamas long luksave bilong gavman long givim Kwins oda long George Telek Mamua bilong Is Niu Briten. Yes, bagaros ya stap strong tru long promotim na go het yet long musik bilong em.



• Singa bilong Nokondi Nama, Charles Esshyhato (namel) i kolim nek arere long studio. Long lephan em Koi Bare na raithan em Ely Meakoro. Foto: James Kila.



Man i kilim masalah man

haus na namel long rot long bus yet em i lukim wanpela welman. Dispela welman em i gat banara na supsup na spia bilong em tu. Long dispela nait i gat gutpela mun lait na wanpela samting i no pasim lait bilong mun.

Taim Gouboro i lukim dispela masalah man em i save pinis. Em masalah tasol. Olsem na em i kalap i go kwiktai tru long ples tudak. Na masalah man tu taim em i lukim Gouboro. Em i save pinis olsem na em i kalap i go long ples tudak.

Nau tupela man i was i stap. Gouboro em i was long narapela hap. Na masalah em i was long narapela hap.

Namel long dispela tupela man em mun lait tasol. Ples tupela i sanap long en em i ples tudak. Tupela wok long wet wet i stap long ples tudak. Husat man tru bai lusim ples tudak na i kam ausait long ples klia.

Tasol tupela man i wok long mekim olsem tasol i go, i go na planti aua i go pinis. Olsem na welman o masalah i ting olsem man ya em i ranawe i go pinis long narapela rot olsem na masalah i lusim ples tudak na i kam ausait long ples klia.

Taim Gouboro i lukim masalah i lusim ples tudak na i kam ausait long ples klia.

Em nau man ya i tok nau Gouboro i taitim banara bilong em strong tru na em i sutim dispela masalah man.

Taim man ya i sutim pinis na masalah i kisim nogut olgeta. Olsem na em i tromoim olgeta samting bilong em, ol spia, supsup, na banara. Em i pilim klostu em i laik dai nau. Olsem na man

i go long ples em i save i stap long en. Em i save stap long bikipela diwai tru.

Masalai i kamap pinis long dispela diwai na em i goap long dispela diwai em i go insait na em i dai pinis.

Na man ya Gouboro i sutim dispela man na Gouboro i lusim em, em i wok long bihinim em i go inap long dispela bikipela diwai. Em i kamap pinis, na em i harim krai bilong tupela meri bilong dispela masalah man.

Bihin em i lusim dispela ples na em i go bek long ples bilong em.

Na em i sindaun liklik, tasol long haus na tulait i bruk na long moning em i tokim ol manmeri olsem em i sutim pik pinis. Bai ol i go kisim.

Na tu em i stori long ol manmeri olsem wanem em i bin sutim dispela masalah man.

Bipo planti dispela kain masalah tru i stap long bus bilong mipela long hap bilong Western provins. Nau nogat wan wan tasol i stap. Sapos dispela i lukim ya long bus. Sori em bai kilim ya na kaikaim ya.

Mipela i save pret nogut tru long dispela kain masalah. Dispela masalah long bus long maus bilong Fly Riva na Bamu Riva i gat wan wan i stap. Sampela taim mipela i save lukim na mipela i save ronawe hariap.

Em tasol liklik stori tumbuna bilong mi.

Abel Naia A.
Frave/S.H.P

Mi wari long tupela lapun papa mama bilong mi

wankain taim tu, mi pilim strong olsem em i wok bilong mi long lukautim tupela lapun papamama ya.

LOYAL SON

Dia PREN,

Wari ya gat long tupela papamama bilong ya i soim olsem ya wanpela gutpela pikinini man husat i laikim tupela lapun bilong em. Bipo ya lukluk long rot we ya ken helpim tupela lapun long en, mipela i askim ya sapos i gat sampela samting we ol arapela famili memba tu i ken wokim long helpim long dispela hevi. Inap wanpela long ol arapela brata i kisim trense na wok klostu long ples we tupela lapun i stap long en na lukautim ol?

Namba tu em sampela susa bilong ya we i marit pinis i save stap klostu long tupela lapun ya? Inap ya askim ol sapos ol ken kisim sampela kaikai i go long tupela lapun long sampela taim? Na ol arapela hauslain bilong ya olsem ol kandere? Inap ya toktok wantaim ol na askim ol tu long helpim tupela lapun ya. I gutpela sapos ya helpim ol wantaim liklik

mani insait long wanpela mun long wokim dispela wok.

Yu mas kisim hatpela taim long stap longwe long tupela lapun husat ya laik helpim tumas tasol wok bilong ya i pasim ya long mekim dispela. Sapos ya trense, ya ken helpim tupela gut.

Yu wok long kampani long siks-pela krismas na mipela i ting olsem em bai isi long ya long kisim trense. Tasol noken givap. Sapos bos i no givim gutpela ansa long askim bilong ya, orait go long narapela man husat i stap antap long bos.

Long wankain taim, inap ya salim mani i go long tupela lapun long helpim ol? Sapos ya singel man i moabeta long sevim sampela potnait pe na long wan wan mun na salim sekmani o postel oda i go long papa bilong ya.

Tupela lapun i ken yusim dispela mani long baim rais na tinpis long stua na tu kaukau long ol ples lain. Dispela bai helpim ol na ol i no inap tingting long wok hat long gaden na ol arapela samting. Na tu ya no inap long wari tumas long ol.

LAIPLAIN.



Nem: Peter Urri Nera

Krismas: 23 (man)

Adres: P O Box 6607, Boroko, NCD.

Save laikim: Raun wantaim ol pren, toktok na go lotu na serim ol samting wantaim ol narapela bratasusa.

Nem: Gladys Ewusi

Krismas: 19 (meri)

Adres: Box CT 1533, Cape Coast, Ghana, WA

Save laikim: Danis na harim musik.

Nem: Philomina Mensah

Krismas: 26 (meri)

Adres: Box CT 1533, Cape Coast, Ghana, WA

Save laikim: Dancing and singsing.

Nem: Dorcas Amah

Krismas: 30 (meri)

Adres: Box CT 1533, Cape Coast, Ghana, West Africa

Save laikim: Rit na raitim pas.

Nem: Veronica Aquah

Krismas: 45 (meri)

Adres: Box CT 1533, Cape Coast, Ghana, West Africa

Save laikim: Kuk na ritim baibel.

Nem: Vida Aquah

Krismas: 20 (meri)

Adres: Box CT 1533, Cape Coast, Ghana, West Africa.

Save laikim: Kukim kaikai.

Nem: Benjeman Amoah

Krismas: 24 (man)

Adres: Box CT 1533, Cape Coast, Ghana, West Africa.

Save laikim: Lukim ol muvi.

Nem: Solomon Amoafu

Krismas: 27 (man)

Adres: Box CT 1533, Cape Coast, Ghana, West Africa

Save laikim: Rit, rait na lukim TV.

Nem: Benjeman Nkruman

Krismas: 16 (man)

Adres: Postal Box 33 Anomabu C/R, Ghana, West Africa.

Save laikim: Ron long baisikel, rit, histri na raitim ol pas.

Nem: Ben Nkrumah Joe

Krismas: 13 (man)

Adres: Anglican J.S.S, Postal Box 33, Anomabu C/R, Ghana, WA

Save laikim: Pilai futbol na raitim ol pas.

Nem: Stella Gordon

Krismas: 25 (meri)

Adres: PO Box 897, Chapel Hill, Cape Coast, Ghana, West Africa

Save laikim: prensip, travel na kisim piksa.

Nem: Elizabeth Baidoo

Krismas: 26 (meri)

Adres: PO Box CT 260, Cape Town, C/R, Ghana, WA

Save laikim: Kuk, travel, poto na musik.

Nem: Miss Lovia Koufie

Krismas: 24 (meri)

Adres: PO Box CC 1544, Cape Coast, Ghana, WA

Save laikim: Marit, raitim pas na prensip.

Nem: Miss Esi Abakah

Krismas: 25 (meri)

Adres: PO Box CC 1106, Cape Coast,

Ghana, WA

Save laikim: Prensip, raitim pas na painim man long marit.

Nem: Mercy Sacky (Miss)

Krismas: 24 (meri)

Adres: PO Box SW 375, (Key), Agona Swedru C/R, Ghana, WA

Save laikim: Kuk, muvis, musik, kantri musick, rit, visit na travel.

Nem: Philip K Arthur

Krismas: 20 (man)

Adres: PO Box SW 375, Agona Swedru C/R, Ghana, WA

Save laikim: lukiuk raun, senisim ol prensen, rit na rait.

Nem: Regina Osei Danguah

Krismas: 24 (meri)

Adres: PO Box SW 325, Agona Swedru C/A, Ghana, WA

Save laikim: Spot, muvis, kuk na musik.

Nem: Patrik Buku

Krismas: 31 (man)

Adres: Kimbe Taun Atoriti. Po Box 127, Kimbe, WNB

Save laikim: raitim pas na painim wanpela meri long maritim.

Nem: Jacob Joe

Krismas: 32 (man)

Adres: Brown Sector. C/O Kimbe Polis Station. P O Box 224, Kimbe.

Save laikim: Raitim pas, go lotu, stadi long Baibel, waswas na painim wanpela meri long marit.

Nem: Amos Andry Gola

Krismas: 19 (man)

Adres: P O Box 240, Goroka. Eastern Highlands Province.

Save laikim: Lotu long sabat, raitim pas, wokim wok bilong God na painim wanpela kristen meri long maritim.

Nem: Josephine Boateng

Krismas: 22 (meri)

Adres: P O Box 5, Awutu Bawjiase, C/R Ghana, West Africa.

Save laikim: Painim wanpela honas man long pren na maritim.

Nem: Elcy Ramenga

Krismas: 15 (meri)

Adres: c/o Catholic Mission Turubu, P O Box 107, ESP.

Save laikim: pilai volibal, go lotu na singim ol gospel song, kisim pis na tok pilai wantaim ol pren.

Nem: Fujo Enki

Krismas: 19 (meri)

Adres: c/o Vincent Asa Ambogo Somil, P O Box 246. Popondetta, Oro Province.

Save laikim: Pilai volibal, harim PNG Top 20 musik, go lotu, kukim kaikai na bai bekim olgeta pas.

Nem: Westy Jerry

Krismas: 19 (man)

Adres: P O Box 107, Wewak, ESP.

Save laikim: lukim piksa, harim ol lokel musik, draivim ka, pilai soka na raitim pas na bai bekim olgeta pas.

Nem: William Rumints

Krismas: 23 (man)

Adres: P O Box 1059, Mt Hagen.

Save laikim: Painim wanpela meri long maritim, baim seri kopi na go lotu wantaim em long Sande.

Nem: Peter Panda Mondo

Krismas: 24 (man)

Adres: Mt Hagen Police Station. P O Box 346, Mt Hagen, WHP.

Save laikim: Pilai ragbi, lukim TV, kain musik na mekim fani, singsing tumbuna, helpim ol mabmeri wantaim hevi na painim meri long maritim.

Nem: Jerry Robert

Krismas: 20 (man)

Adres: c/o Jackson International Airport, P O Box 302, 7-Mile.

Save laikim: pilalo ragbi, volibal, raun long bus na painim wanpela gutpela kristen meri long maritim.



Dia LAIPLAIN,

Tupela papamama bilong mi i lapun tru na ol i nogat strong moa long wok long gaden, planim ol kaikai, brukim paiawut o kisim kopi na salim. Tasol i nogat man i stap long helpim ol.

Mi na ol arapela brata bilong mi i lusim ples na mipela i save wok long ol arapela provins. Ol susa i marit na ol i bisi lukautim ol famili na ol man bilong ol. Ol no save lukluk moa long tupela lapun papamama.

Mi wok long siks-pela krismas pinis na nau mi laik trense i go bek long ples na lukautim tupela lapun papamama bilong mi. Tasol bos bilong mi i no luksave long askim bilong mi. Maski hamas taim mi raitim pas na putumapim aplikesen long dispela samting, em no wokim wanpela samting tasol em i tromoim ol pas samting we raitim long kisim tok orait long en. Mi no amamas long dispela kain pasin tasol mi no laik risain. Long

PNG BUSINESS - WHO'S WHO - TRADE & SERVICE

MUSIC CASSETTES

Kusai Newly Christmas
Release Cassette

KUSAI & FRIENDS-CHRISTMAS 2001
Featuring the Engineers and Friends of
Kusai Studios.

- | | |
|--------------------|-----------------|
| 1. Francis Matale | 6. John Morgan |
| 2. Melton Avoke | 7. Brian Matale |
| 3. Richard Nennek | 8. Henry Matu |
| 4. Lawrence Martin | 9. Nick Painai |
| 5. Mickeal Tali | |

Mail order K10 to:
KUSAI STUDIO
P.O. BOX 623, KAVIENG, N.I.P.

COFFEE EXPORT

ARABICAS LTD

Quality Coffee Roasters of PNG

Specialists in:

- PARADISO ORGANIC COFFEE
- BLUEMOUNTAIN COFFEE
- KOPI BILONG YUMI

Other Varieties Available
Mail orders - Welcome
P.O. Box 680, Goroka, EHP

732 1272 or 732 2496 - Fax: 732 2949
email: arabicas@global.net.pg

CHEMICALS

BELLTEK

CHEMICAL MANUFACTURER TO PNG

- | | |
|------------------------------|------------------------|
| KERN | Multi-clean |
| BLAVAC | Motan detergent |
| SCOTT | • Washing Chemicals |
| BULLMAST | • Industrial Cleaning |
| GHIBLI | ✓ SCRUBBER |
| CHITY AIR COMPRESSORS | ✓ BRUSH or PAD |
| | ✓ MOPS and BUCKETS |

BELLTEK CHEMICALS LTD.

P.O. Box 2358, Boroko, Papua New Guinea
POM: Ph: 325 7855 Fax: 325 0949 - LAE: Ph: 472 3065 Fax: 472 5829
Mt. HAGEN: Ph: 542 1303 Fax: 542 3275
RABAUL: Ph: 982 9027 Fax: 982 9141

HAIR & BEAUTY

EF-KAY PRODUCT CO LTD
Manufacturer & Supplier of
hair & beauty products.

- PERM/RELAX SYSTEM
- SHAMPOOS & CONDITIONERS
- PERM/RELAX KITS
- GEL/ACTIVATORS & MOISTURIZERS
- HAIR FOOD & COCONUT OIL
- SPRAYS, LIPSTICKS, NAIL POLISH
- HAIR PIECES/BRAIDS, ROLLERS, CAPES ETC.

We also provide specialized salon services.
Located along Waigani Drive, next to Steamships Hardware,
behind City Pharmacy.

P.O. Box 1671, Port Moresby, Papua New Guinea
Ph/Fax: 325 0519/325 3400
Email: efkayparadise@yahoo.com

INDUSTRIAL RAGS

P.N.G. RAG LTD.

PH: 323 2000 - FAX: 323 4565
Email: pngrag@datec.com.pg

QUALITY INDUSTRIAL RAGS FOR QUALITY JOBS.

Our products come out in seven different materials.
These items are available: 5kg, 10kg, 200kg. bag. PNG
Rags limited products are free of zips, free of buttons,
free of silk. We have got 30,000 kg cut rags ready for
delivery anywhere in PNG.

CHEAPEST INDUSTRIAL RAGS IN P.N.G.

Crazy brand new shoes on sale and cheapest in town:
men, ladies, children.

"HURRY BEFORE STOCK LAST"

Location: Next to Arnotts Biscuits

MINING EQUIPMENT

Alluvial mining equipment for sale

- Gold dredges, Pro 2inch, Pro 4inch, Pro 6inch & Nat 7inch
- High Banker Combo, Super Metal Detectors
- Sluice & Pans, Gold Wheel, Rock Crusher, Mercury Retort
- Field Service trip, Consultation Service.
- Equipment demonstration every Tuesday and Thursday

CONTACT GOLD PAN
PHONE: 323 6052 FAX: 3252959
P.O.Box 3980, Boroko, NCD

MOTEL

KOKODA TRAIL MOTEL (SOGERI)

16 Family Rooms self contained Bar,
Pokies, Restaurant, Conference facilities,
BBQ, Swimming Pool.

We cater for Functions, Conferences.
Just 35km from Port Moresby.
Room rate K60.00 per night.
Quote for conference or functions.

P.O. Box 374, WAIGANI NCD.
Ph: 325 4403, 325 4890.

ELECTRONICS

Re-furnished Computer Equipment & Parts

Hicom Electronics Ltd

Council Chamber Building, Hagen Drv.
P.O. Box 468, Mt Hagen, WHP
Phone/Fax: 542 1630,
E-mail: hicom@datec.com.pg

We are dealers of high quality refurbished computers, notebooks,
monitors, printers, plotters, etc direct from Australia. We stock hard
to find computer parts including main boards, notebook screens,
CPU, memory, hard drives, CD-ROM, Sound Cards and many
more... We deal with name brands including Compaq, IBM, HP,
Toshiba & Dell. We also provide the following Services. Computer
Networking (LAN/WAN), Internet Connectivity, Software Sales &
Support, AUTOCAD, Mapinfo and Total Station sales & support.
For more information please give us a call.

HOTEL

Kavieng Hotel

- Air Conditioned Rooms
- Licensed Restaurant
- Budget Accommodation
- Airport Transfers - Hire Cars
- Cable TV.

Telephone: 984 2199
Facsimile : 984 2283

MOTEL

Hanni's Inn

Experience the newest
Comfort in Buka.

- Air Conditioned Self-contained units for privacy
- Fridge & coffee making facilities
- TV equipped with multi-channels
- Restaurant & Tumola Coffee Shop available
- Within the heart of Buka Township

Visiting Buka! Book early!

PHONE: 973 9930

Facsimile: 973 9930

P.O. Box 973, Buka, North Solomons Province.

VACANT

*This space
could be
Yours!*

ADMINISTRATION

Fully nationally-owned company operating
since 1972, acquiring a considerable body
of hands-on experience and administration
management knowledge.

We provide:

- Accredited Project Research & Assessment Services
- Services to Resource Owners, Investors/Businessmen
- Business Management Services
- Full Accounting Services
- Information Gathering and Reporting
- Preparation of Management Sales Marketing and Advertising Strategies
- General Services
- Accredited Training Programmes
- Personal Escort and Security

We have successfully completed over 20 projects over a period of 4 years
for the IPA

Please feel welcome to contact our office for further information. We look
forward to being of service to you.

Hayes & Ekas Limited, P.O. Box 1113, Boroko, NCD.
Phone: 323 4376, 323 4225 - Fax: 323 4546

To advertise in this section, Please Call

WALTER D. EDWARD,

Ph: 325 2500 Fax: 325 2579

KANAGE



Wanpela taim Kanage i kamap olsem pri skul tisa na long moning taim Kanage tokim ol manki bilong em bihain em tok eskus long ol. Insait ong klasrum bilong ol na bai Mista Kanage tokim ol long kaunim wan, tu i go antap long ten na ol kaunim i go namel long faiv. Mista Kanage, nus bilong em i blok na em i bloim kus na sem taim em i kirap na i tok eskus mi. Trangu Mista Kanage i tokim ol long bihainim eskus long ol. So olgeta sumatin long klas bilong en ol i bihain em na olgeta yet i bloim kus na tok eskus. Trangu Mista Kanage i kirap nogut tru tasol bihain em i save olsem em i rong long tokim ol long bihain em long tok eskus. Trangu Mista Kanage i sem nogut tru na bihain em i no tokim ol long mekim olsem gen.

John Kiak Simbu

Kanage bilong Piambil. Em go stap longpela taim long Hagen taun na wanpela taim em laik go long singsing insait long lalibu. Yangpela Kanage em wanpela longpela man na em bin groim longpela maus gras tu. Dispela Fraide apinun mangi nogut kalap long wanpela nupela plet rif kosta bas na saitim stret long las sit kiostu long glas sait. Taim bas ya pulapim olgeta sits wantaim ol pasindia bilong Kaupena na Walume. Kanage kirap long las sit na singaut go long draiva na tokim em olsem, draiva o. Lokim ka gia bilong Orei na tromoi ka ki kam long beksait. Em askim draiva long spitim ka bikos nogut kalap bai aut pinis na em bai go nating. Taim bas ya go stap long Korea Kem na lusim sampela lain long ap na draiva laik klostu tekov, sampela yangpela meri sanap long ap ya laik lukim husat stret saitim long las sit wantaim dak speks long traipela apinun. Ol meri i no lukim gut yet na bas laik tekov. Manki nogut bilong Piambil hariap tasol pasim glas i go long sait na tromoi hat bilong em i go ausait na singaut. "Hey girls! girls!" Olgeta meri lukluk kam long em nau na em tok, you want to see me, try hard." Manki nogut taim ol meri longlong stap long ap. Em go pinisim olgeta stail bilong em long Orei.

Kole Paul Niningi Boroko Kapolo 2

Kanage em bilong Mani Tree viles insait long Yongos kantri long Simbu provins.

Kanage bilong ples Yessan long Ambunti, Is Sepik provins. Wanpela apinun pikinini meri bilong Kanage i kam bek long skul na soim papa Kanage long mak bilong naip we tisa bilong em i paitim het bilong em. Kanage i no sindaun isi nau. Em i kirap na kisim longpela bus naip bilong em wantaim fiul lain bilong motol na kalap long moto kanu. Tasol Kanage i painim olsem em i no inap draivim moto bikos lek na han bilong em i guria planti. Orait em singautim brata bilong em long i kam draivim. Taim kanu i no go sua long graun klostu long skul na Kanage aste yet i kalap long wara na i swim i go long soa. Em holim naip na ron i go antap long skul graun. Em lukm tisa ya na longwe yet em pointim naip long tisa na i signaut olsem: "Yu pinis!" Taim tisa i lukim olsem em i tekov olsem balus long klasrum na papa Kanage tu i bihainim em wantaim naip. Tupela i raunim dispela klasrum inap long 4-pela raun na bihain ol man i kam na stapim tupela. Tupela wantaim i sotwin nogut stret. Em nau Kanage i tokim tisa olsem. "I tell you next time! Yu pinis." Tisa tu i sotwin nogut tru na i painim hat long bekim.

Mista Bean Ambunti

Kanage em wanpela bisnisman long ples long Kelua No. 2 long Westen Hailans provins. Wanpela taim em i laik go raun long Cairns long sampela bisnis. Em save stap long Morata long Mosbi na mekim bisnis long siti. Taim em stap long teminol long Jacksons, em i yusim toilet na lus tingting long pasim zipa bilong em. Semtaim balus redi na ol pasindia biong Cairns kalap. Boi ros tu i no man bilong werim pens tu na em sindaun long top klas seksen sit bilong ol man. Kanage i bisi redim sefti kat i stap na hea hostes i lukim stret zipa bilong Kanage stret bikos wanpela yangpela meri tu sindaun klostu long em. Na hea hostes i kirap na tokim Kanage, bikman long moning mi lukim geit bilong yu i op i stap. Na Kanage kirap na tok, ating yu mas lukim red pela bik fut na Len Krusa bilong mi insait long banis. Na hea hostes i bekim yet mi lukim tupela fran wil i plet nogut tru. Na Kanage i tok, mi min long rausim win bikos nogut Junia na mama i paulim ka taim mi go aut. Nau hea hostes kirap na tok: "Neks taim yu laik go ovasis traim long pasim olgeta geit bilong yu nogut ol waitman tu lukim tupela bik fut VX tubo Len Krusa wil yu karim raun na i no wanbel long yu" na hea hostes i tokim Kanage long rausim sit belt bilong em na muv i go daun long ol las sit. Kanage i tingting planti long dispela liklik toktok na laik pasim sit belt bilong em na, nogat zipa bilong em i lus i stap na isi tasol pulim i kam antap.

Nau Kanage i kisim gut wanem Hea Hostes i toktok long em na taim hea hostes i kam bek, na Kanage i laik pasim sem bilong em na tokim em. "Mi ring long mobail pon na Junia i pasim geit pinis na ating olgeta raun bilong mi bai orait." Hea Hostes bekim tenk yu. Kanage smail isi tasol na sindaun gut.

Julie Wartovo Klunga


Kanage em bilong Makam. Yu save ol Makam ya em ol man bilong kaikaim buai tumas. Wanpela nait Kanage wantaim famili bilong em ol i slip. Meri long sait, man slip long sait na pikinini i slip long namel.

Kanage i slip i go na laplap bilong em i lus nating na em slip as nating. Biknait Kanage i driman olsem em sindaun kaikaim buai i stap na pekpek i kilim em stret. Baga ya ron i go klostu long wanpela bus, rausim laplap na tromoi long sait na sem taim pekpek i sut. Oloman Kanage i ting em pekpek long bus ya tasol nogat ya, em bagarapim stret junia long taunam ya. Em kirap nogut long lukim olsem na em givim hatwan stret long nus bilong junia Kanage insait long Taunam yet. Em kirap paitim pinis na singaut "yu san of a bastet, pikinini bilong ston. Yu no laik kirap na go long toilet a?" Samting tru em Kanage yet i pekpek antap long junia na sem olsem na em kirap hamarim junia gen.

Jack Guya, Lae

Misis Kanage wantaim Kanage i wokim wanpela gaden arere long wanpela liklik wara. Misis Kanage i save olsem man bilong em i save go waswas as nating long dispela wara. Wanpela taim san i hot nogut tru na Kanage i kisim tawel na i go pas long waswas. Taim em waswas i stap, pekpeke i kilim em na em givim siksti i go insait long bus. Semtaim wanpela lapun man i kamap na lukim olsem nogat mani. Em rausim set trausis na waswas i stap. Sem taim Misis Kange i bihainim Kanage i go kamap long wara. Em lukim lapun sop i karamapim em na em mekim save klinim brata bilong em i stap. Msis Kanage lukim i go na em kirap singaut: "Yu fada man o samting." Na lapun kirap singaut: "Na wanem samting, yu save san i hot na yumi mas wasim ol tu." Taim lapun tok olsem na tanim, misis Kanage luksave olsem em toktok long narapela man i stap. Em kirap na tok: "Sori, mi ting pos bilong mi ya." Na misis ronawe i go. Kanage kamap semtaim na harim lapun i tok "san i bikpela na bikpela paul i kamap namel long yumi tupela." Kanage kirap lukim meri bilong em i go na em ting lapun i paulim em. Em singaut kaikaim tit wantaim go insait long wara na lek han wokabaut long lapun. Em dai bilong lapun man. Em kilim lapun nogut tru.

Jack Guya, Lae.



Noken tromoi rabis long Pewi rabis dam

Dia Edita,

Mi laik autim wari bilong mi long pablik bai ol i ken lukim. Long nau yet mi laik askim yupela ol (LLG) long noken tromoi pipia o wasim baket pekpek moa long Pewi Rabis Dam.

Planti taim mi save wokabaut long dispela hap ples bilong tromoi rabis na wasim baket. Na taim san i hotim ol dispela pipia o rabis smel i save i go aut long ol setelmen olsem Pewi Nambis, Kona Rot na Somil.

Plis mi askim bos bilong taun kaunsel long ol i noken tromoi pipia moa long Pewi Dam. Plis yupela ol (LLG) i mas i go panim nupela ples bilong tromoi pipia.

Mi bin lukim ol pipia i pulap stret

long rot bilong wokabaut. Na taim ol manmeri na pikinini wokabaut long dispela rot ol i save kisim bikpela taim long smel nogut.

Plis yupela ol gutpela wokman bilong gavman, yupela i mas lukluk o panim wanpela gutpela ples bilong dampim ol rabis pipia.

Mobeta yupela i no inap long tromoi ol pipia moa long Pewi Rabis Dam. Yupela ol (LLG) i mas stopim dispela kain pasin bilong tromoi pipia nambaut.

Em tasol. Yu husat brata o susa i laik sapotim o egensim mi, yu i ken rait tasol long *Wantok Niuspepa* na bai mi i ken lukim.

Klapin Leo

Vanimo, West Sepik

Gavman traim daunim skul fi

Dia Edita,

Mi wanpela papa husat i gat planti pikinini tru long skul. Mi yet i no nogat save bilong mi na i no mekim wanpela gutpela wok. Mi save kisim bikpela wari taim mi tingim ol pikinini. I hat tru long mi wan peim skul fi. Mi gat tripela pikinini. Tupela i stap long hai skul na wanpela i stap long praimer skul.

Mi stap na harim olsem skul ol i makim em bikpela tru long wanwan sumatin na mi gat tripela olgeta. Mi wan na mi bai painim hat long peim skul fi bilong ol.

Gavman na skul inap lukluk long dispela na helpim. Sapos mi gat gutpela wok, ating mi inap long peim fi na mi no inap rait i go long niuspepa olsem tasol mi yet wok olsem wanpela sekuriti man na pei bilong mi save no inap stret. Mi gat ol faipela pikinini tu long lukautim.

Mi laik save sapos gavman inap helpim kain man olsem mi. Mi

nogat narapela rot long kisim mani. Mi lusim ples planti krismas na nau mi painim hat stret. I bai gat helpim long kain man olsem mi long ol skul we pikinini bilong mi i stap long en. Mi laik bai edukesen dipatmen i helpim mi long dispela sait tu. I no olgeta man inap painim mani long peim fi. Mipela sampela painim hat stret long peim ol dispela fi ya. Plis gavman mas helpim mipela olsem kain man long sampela rot.

Bihain bai ol pikinini kam antap long developim kantri. Strong bilong mani i go daun na mi save painim hat stret long baim kaikai, skul fi na ol arapela samting. Gavman i mas traim long helpim mipela long sampela rot long kain taim olsem nau.

I no mipela traim na taitim bun long peim skul fi. Mi hatwok stret na mi rait nau long niuspepa long tokaut long hevi bilong mi. Mi save olsem planti papamama long olgeta hap provins insait long kantri i

painim wan kain hevi olsem mi nau. Taim bilong skul i laik stat na mi no save yet wanem hap bai mi kisim mani olsem K2000 long peim olgeta fi bilong ol tripela pikinini bilong mi. Wanwan manki em K800 nau na taim mi bungim na lukim, dispela kain mani em hat tru long kisim tude na long wanem kain wok mi holim tude, ol i no peim gut.

Kaikai long stua i ekspensiv na mani i sot nating. Mi baim skul fi na bihain bai mi kisim mani we long baim klos na yunifom bilong ol. Mi bai kisim mani we long baim kaikai bilong haus. Baim bas fi bilong ol. Planti hap rot mani bai go na mi painim hat stret na mi askim bai gavman i ken helpim mi. Ol sampela man tu husat i laik helpim mi gutpela. Mi kisim taim stret na raitim dispela pas i go long niuspepa. Tenkyu tru.

Ate Teala

Erima Mauten. Pot Mosbi

Noken putim George Wan long Madang Provinsel Asembli

Dia Edita,

Mi laik save long wanem as tru na Madang Provinsel Asembli memba i laik makim George Wan olsem Gavana bilong Madang.

Inap ol dispela lain tok klia long wanem kain ol developmen George Wan i kisim i go long Madang taim em i stap tenpela yia long palamen olsem memba bilong Usino-Bundi?

Jacob Wama i gat nem long bringim sampela developmen i go long ol pipel long ilekret bilong em na em tasol i fit long kamap Gavana wantaim Tommy Tomscoll.

Ol sampela maski. Ol i nogat nem long Madang. Ol memba nating tasol na ol pipel long ples i kisim taim i stap. Mi laik tokim ol kaunsel presiden husat i memba long Provinsel

Asembli long makim Mista Wama olsem gavana bikos em i man bilong toktok strong long palamen na bringim developmen i go long Madang taun we em i memba long en.

Maski long votim ol man i kam long gris tasol na nogat wanpela kain han mak bilong ol long sait bilong developmen. Sampela bilong ol i stap memba longplea taim tru tasol nogat wanpela han mak yet. Nogut wan kain pasin bai kamap na yumi pipel bilong Madang i no lukim wanpela senis insait long provins bilong yumi.

Em tasol na yu husat brata o susa i laik bekim pas bilong mi em yu welkam tasol.

Negil Isa'a

Port Moresby

Makim rait man long yia 2002 ileksen

Dia Edita,

Mi wanpela mangi Pangia tasol nau mi stap long Goroka taun. Na mi laik autim bilong mi i go long ol nupela kendiet husat i resis long yia 2002 ileksen.

Sapos yu laik kempein plis yu noken i go long Wiru eria. Mak long Taguru na Maubini. Yu noken abrusim.

Yu ken kempein raun long Pangia stesen o yu ken go long Isten sait. Tasol long Wiru eria nogat. Husat man o meri yu bilong Wiru, plis yu

noken karim wanpela vot bilong yu i go long stesen o lalibu.

Yumi mas painim wanpela mangi bilong yumi yet long Wiru. Wanpela man o meri long Wiru husat yu karim wanpela vot bilong yu i go long stesen o long lalibu, yu bai wasim pens bilong meri bilong dispela man.

Em tasol na husat yu laik sapotim o egensim rait tasol long *Wantok Niuspepa* na bai mi lukim.

Undix Wiru Mari

Goroka, EHP.

Giaman promosen na nogat wanpela win bilong mi stret

Dia Edita,

DISPELA em i nambawan taim tru bilong mi long rait long dispela niuspepa olsem na inap yupela givim mi liklik hap spes insait long niuspepa bilong yupela.

Yes, mi i laik sapotim pas bilong brata Taman Paragum husat i bin kamap long *Wantok Niuspepa* long mun Novemba 30, 2000.

Brata yu tok tru olgeta. I nogat wanpela man o meri bilong Niugini Ailans i save win liklik long olgeta kain promosen olsem bilong Hi-way Beef na ol narapela kain promosen tu.

Las promosen bilong Hi-Way Beef i go pinis mi i bin westim taim na mani bilong mi long baim ol bisket bilong Hi-Way Beef, stamp, envelope na mi i no winim wanpela prais liklik.

Brata Taman Paragum Uh, ating mi i ting olsem dispela ol lain i bin putim ol peket nating bilong Hi-Way Beef i go insait long ol box long wanwan provins bilong Niugini Ailans ol lain bilong Hi-Way Beef i no bin salim i go long Mosbi.

Ol i mas tromoi o kukim long paia, na mipela ol lain i salim tru long pos opis tu i mas wankain. Ol lain bilong Hi-Way Beef i mas pasiri. tok wantaim ol lain bilong pos opis. Ol mas tromoi o kukim.

Olsem na brata Taman Paragum Uh, ating yumi ol lain bilong Niugini Ailans i mas pinis olgeta long traim pilai long olgeta kain promosen i kamap long Mosbi o Lae. Sapos ol kain promosen i kamap long winim wanpela samting long provins yet orait yumi ken traim long pilai.

Ating em tasol na yu husat brata o susa bilong Niugini Ailans i laik sapotim o egensim yu rait tasol i go long *Wantok Niuspepa* na bai yumi olgeta i ken lukim.

P.S. Patiken

Buvussi, Kimbe, WNPB

Noken stap raun nating long taun

Dia Edita,

YES mi wanpela mangi Arox na mi save stap long Kimbe taun.

Mi laik tok olsem planti long ol Hailans pipel nau i wok long raun nating nating long ol taun na tu ol stap nating long olgeta plentesen.

Ol dispela lain ating ol i nogat papamama long ples. Raun nating na kamapim kainkain trabel na hevi long provins.

Sapos yu blokman, em i orait. Yu ken stap o yu wok man long plentesen em tu, i orait. Yu tu ken stap tasol olsem wanem long ol man nating.

Na sapos yu wanpela kain mangi raun nating go bek long provins yu kam long en.

Mipela ol asples i no save go stap nating long hap bilong yupela na raun nating long taun bilong yupela. Nogat tru.

Em mipela pikinini bilong man. Yu, em mipela i save sem tru. Dispela kain pasin em bilong sem long em ya.

Em tasol pas bilong mi. Sapos yu husat i laik sapot o nogat. Em laik bilong yu.

Tomas Ulallo

Kimbe

Memba bilong Bulolo Samson Napo i no mekim gut wok long Watut

Dia Edita,

INAP yu givim mi liklik spes long raitim pas. Mi wanpela mangi Bulolo. Nau mi stap long Kimbe, Wes Niu Briten provins na mi laik autim ol wari bilong mi long memba bilong Bulolo Samson Napo.

Longpela taim tru nau na yu i stap o dai pinis long ples bilong ol meri Papua, long Pom siti. Orait yu stap yet harim gut. Mista Napo, mipela ol manmeri long ples ting yu dai pinis ya.

Mipela ting solwara kaikaim yu pinis o kokonas gris paulim het bilong yu. Long dispela 8-pela krismas i kam inap nau klostu long 2002 i nogat developmen o sevis i bin kamap long Watut-eria na tu narapela ples tu.

Long sampela hap yu bin givim wok olsem wokim ol han rot o mekim sampela kain wok. Tasol ples Watut nogat tru wanpela sevis yu save givim mipela. Olsem wanem? Mipela em lain birua bilong yu?

Yu mas save ol lain bin givim vot long yu. Mipela tu i bin givim yu olsem na mipela makim yu bilong karim hevi bilong olgeta manmeri bilong dispela ilekret olsem na bilong wanem yu mekim kain pasin olsem. Yu mas luksave long dispela manmeri husat i bin givim pinga bilong ol long makim yu.

Dispela kain wok olsem wara saplai, skul, haus sik, bris, kopi masin, sios na yu mama dispela kain wok yu inap long mekim

tasol yu stapim gen i no gutpela tru long ai bilong komyuniti.

Dispela mani nesenel gavman i putim long ol wanwan ilekret olsem Bulolo. I luk olsem nogat wanpela developmen o sevis i kamap. Ating yu save poketim mani long wokim ol bisnis long ovasis ya.

Poket mani bilong yu o bilong gavman? Olsem na Mista Samson Napo yu mas save o tingting long 2002 bai yu sanap yet o lus. Em yu yet nau.

Sapos yu husat i laik sapotim o egensim em mi stap tasol long lukim long *Wantok Niuspepa* na bai mi amamas long lukim.

Lee Phelimon

Mosa Nursary, WNPB

Ol meri Oksapmin painim wokman tasol na ol i no bisi long yumi ol grasrut

Dia Edita,

Mi wanpela mangi Oksie, na nau mi i kam i stap long Lae siti. Planti taim mi save harim olsem ol meri Oksie save sop tuma. Taim ol manmeri long arapela provins i tok olsem em mi save kisim bikpela sem tumas bikos mi mangi Oksie. O arapela manmeri save toktok olsem ol meri Oksie save putim sotpela sket, na trausis na save raun long strit bilong painim ol wokman tasol.

Em ol meri i stap long Tabubil tasol. Na tu ol manmeri i kam raun long Tabubil save stori long yupela ol meri Oksie olsem yupela ol meri Oksie i stap long Tabubil ya save painim wokman tasol na ol i no bisi long yu wanem kain pipia grasrut.

Bipo mi ting olsem ol meri long arapela provins tasol save sop. Nau ol meri Oksie brukim rekot bilong PNG na arapela kantri. Planti marit meri lusim pikinini na ol i save kamap olsem ol yangpela meri. Na tu ol yangpela meri save laikim wokman bilong kampani tasol. Ol meri Oksie, traim na sensim pasin bilong yupela. Olsem wanem? Animel kirapim yu o manhatwok na karim yu.

Ol man bilong kampani save kilim yupela wansait stret. Ol wokman noken ting em ol yangpela meri, planti em ol yusim pinis (16 x 4 pinis).

Jackson Kuti

Oksapmin

Daunim sik AIDS

Dia Edita,

Mi wanpela skul manki. Mi stap stadi na mi painim wanpela tingting olsem long Sik AIDS. Em olsem husat man yu save olsem yu gutpela man o meri na sapos yu lukim wanpela man o meri na yu gat laik long mekim prensip wantaim em.

Kisim em na go long haus sik. Yutupela sekim blut bilong yutupela na sapos em orait. Meri noken go long narapela man na wankain tu long man.

Em olsem yutupela tasol wokim pren i go kam dispela olsem mi ritim tasol.

Tingim yu yet nogat yu stap sotpela taim tasol na bai yu dai.

Tonny Weikun
Wau, Morobe Province

Rausim ol strit selas long Hagen siti

Dia Edita,

Mi wanpela manki bilong Pinja viles insait long Westen Hailans provins na mi laik autim wari bilong mi i go long ol bikman bilong MtHagen Taun Atoriti long ol i mas rausim ol strit selas.

Mi save les long lukim ol man i sanap long strit na salim ol samting na tromoi pipia nambaut. Dispela kain pasin i save bagarapim taun tru.

Bipo ol i kolim MtHagen em namba 3 siti insait long PNG tasol nau em i no luk olsem wanpela siti na mi wari tru long dispela pasin bilong ol manmeri i sanap na salim ol samting long olgeta strit kona.

Lcng stretim dispela ol i mas rausim ol strit selas. Ol dispela lain i kamapim planti pipia na bagarapim siti.

Tenkyu na em tasol.

Mannel P. Kera
Mt Hagen

Sapotim pas bilong ol meri i kamap narakain moa

Dia Edita,

YES, mi wanpela mangi Sepik i stap blok hia long Oil Palm provins Kimbe, WNB. Mi i laik sapotim pas bilong brata David Mana i bin kamap long *Wantok Niuspepa* long mun Julai 7, 2000. Na pas bilong susa ya Silnia Joshua long *Wantok Niuspepa* long mun Ogas 6, 2000 na brata Nataniel Andrew bilong Lae i bin kamap long *Wantok niuspepa* long mun Novemba 30, 2000.

Ol brata na susa dispela kain dresing i no i stap long Lae o Mosbi tasol. Nogat. Ating dispela kain dresing i stap long olgeta hap bilong PNG. Yes, sapos yumi komplem long ol kain dresing bilong ol susa ya bai ol i tok olsem yumi jeles long dresing bilong ol.

Tasol mi i laik tokim ol dispela susa ya olsem yupela tingim i go bek gen long taim mama bilong yupela i karim yupela. Mama bilong yupela i karim yupela wantaim rasta long het bilong yupela na ia ring na ring long nus na lipstik na finger na lek polis na paspas long han na lek na shavim eyebro na penim eyebro na penim chik na katim ol kainkain makmak long pes na skin na ol narape kainkain bilas moa.

Yupela i save olsem mama i no karim yupela wantaim ol dispela samting mi kolim pinis. Yupela i mas save olsem kain dresing ya em bilong devil seten.

Ol gutpela susa bilong mi, God i no wokim wantaim dispela olgeta samting insait long bel bilong mama bilong yupela. Nogat ya. God i wokim yupela gut olsem em yet.

Taim mama i karim yupela, yupela i no karim olgeta dispela samting i kam wantaim. Yupela i kam han nating na bai yupela i dai na i go bek long graun han nating. Ritim 1Timoti 6:7.

Na dispela kain dresing em pasin bilong so op, apim biknem na wokim yu yet i nais o smat moa moa yet. Ritim 2 Tomiti 3:4. God i tambu long mekim ol kainkain rasta na kainkain stail long gras tu. Ritim 1 Timoti 2:9.

Na God tu i tambu long ol meri i werim klos bilong ol man na ol man i tambu long werim klos bilong ol meri. Ritim Deutronomy 25:5. Long baibel God i tok olsem ol hambak meri bilong Jerusalem bai i bungim taim nogut, na mi yet i tok olsem ol hambak meri bilong PNG bai bungim taim nogut.

Ritim Isaiah 3:13,16,18-25. Bipo devil seten i bin gat tingting olsem em bai i abrusim ol sta o angels na i go antap tru long heven. Na em bai i putim sia king bilong em yet antap tru long ol sta o angels bilong God.

Na em bai i go antap tru long ol klaut o angels na bai em stap olsem God antap tru. Ritim Isaiah 14:13,14. Nau tingim ol

dispela kain meri bai ol i save ting olsem, mi mas wokim dispela ekstra stail bilong mi na bai mi winim ol arapela meri na bai mi luk smat moa yet na bai mi i gat planti boi prens na bai nem bilong mi yet bai i go antap moa yet na winim olgeta arapela ol meri long graun.

Olsem na God i tokim prophet Ezekiel long tok piksa long devil seten olsem king bilong Tair harim tok bilong mi God bikpela. Bipos yu wanpela gutpela man tru na yu winim olgeta man.

Na save bilong yu i bikpela tumas na yu luk nais tru. Long taim mi mekim yu i kamap long graun, pasin bilong yu i nambawan tru. Na yu nogat asua long wanpela samting.

Tasol bhain yu mekim pasin nogut na yu gat asua long ai bilong mi. Ritim Ezekiel 28:11-17. Ol susa yupela ritim dispela baibel ves na tingim yupela yet. Yumi i noken sutim tok long ol meri tasol, sampela man tu laik luk olsem ol meri tu ya na save kamapim dispela kain bilas.

I gat sampela moa toktok i stap tasol taim i sot na mi pinis long hia na husat brata, o susa i laik sapotim o egensim. Rait tasol i go long *Wantok Niuspepa* na bai mi lukim.

P.S. Patiken
Buvussi, Kimbe, WNB

Ol kristen i mas lukaut long narakain bilip

Dia Edita,

INAP yu givim mi spes liklik long mi na mi ken autim wari bilong mi? Wari bilong mi i go olsem.

Mi wanpela kristen manki. Nau mi stap long Mt Hagen na mi bin harim tokwin olsem wanpela nupela lotu o bilip i bin kamap insait long PNG na ol i wokim wanpela bikpela haus lotu bilong ol long Pot Mosbi.

Dispela lotu em i kamap pinis long Mt Hagen na mi lukim planti man i go joinim dispela lotu.

Wanpela kain bilip ol i gat long lotu bilong ol i olsem. God wanpela tasol i stap. Jisas na Holi Spirit tupela i no i stap. Dispela em i narakain bilip olgeta long olgeta kristen sios insait long kantri.

Mi laik apil i go long olgeta kris-

ten bilip manmeri insait long ol Pentikostel sios, Luteran na Katolik na arapela sios moa olsem. Dispela lotu em i no kristen lotu na yupela i no ken go klostu long ol na tu noken harim tok bilong ol tu.

Nem bilong sios bilong ol em "Ba-hai" na pasin na bilip bilong ol em i kam stret long ol, "Muslim".

Dispela ol lain Muslim i bin bagarapim planti kristen sios long olgeta hap graun na nau ol i kam kamap pinis long Papua Niugini.

Yumi ol kristen i mas save gut long dispela ol lain. Baibel bilong yumi ol kristen i save tok wanem long ol dispela kain sios. Ol dispela lain Muslim i laik rabisim wok bilong Jisas na Holi Spirit na ol i laik go stret long God.

Tasol long baibel bilong yumi ol

kristen, Jon 14:6 i tok olsem. Jisas i tokim em, mi yet mi rot, na mi as bilong tok tru, na mi as bilong laip. I nogat wanpela man inap kamap long Papa long narapela rot. Nogat. Long mi tasol.

Plis ol kristen brata na susa insait long PNG, mi askim yupela long yumi pait strong wantaim gavman bilong yumi long rausim ol dispela sios na ol i noiken kamapim na strongim bilip bilong ol insait long hia. Nogut ol i kamap strong na bhain bai ol i bagarapim yumi ol kristen.

Em tasol na husat brata o susa i sapotim o egensim rait tasol long *Wantok* na mi lukim.

Peter Bakly
E.L.C, Mt Hagen

Pawa mas go long haus lain

Dia Edita,

Mi wanpela mangi Marawaka Bus tasol nau mi i stap long Yondumo Village Kosal Kanex Siane Daulo ilektoret. Nem bilong mi James Quino na mi laik sapotim pas bilong brata Boney Aodaka i bin kamap long *Wantok niuspepa* long mun Novemba 23, 2000.

Yes, pas bilong brata Boney Aadaka i tok olsem mak long Yondumo, Magiro, Bumgate na i go olgeta long Daulo pas ol pipel singautim ol lida long pulim pawa i go long ples.

Yes brata Boney mi sapotim pas bilong yu na pas bilong yu i rait na lait olgeta. Na yu tok tu olsem Chuave pawa i kam tanim na i go bek long Simbu na Goroka i kam tanim long Gorefa na Yondumo na i kam inap long Daulo Pass mipela

i stap insait long bikpela tudak. Wanem taim bai ol lida i givim yumi helpim?

Yu tok tu mi sapotim yu brata Boney. Brata mi sapotim na ting olsem wanem samting yu tok em i rait na rait olgeta.

Tok bilong yu Boney mi sapotim. Mi ken tok olsem pasin bilong tum-buna bipo bipo i stap yet nau long wanem mi tok olsem pasin bilong laitim bomb bomb i go long haus wantok i stap yet nau na pasin bilong laitim bomb bomb i go ikam long ol anrapela ples tu stap yet.

Em tasol na God i ken blesim yumi olgeta. Sapos yu husat yu sapotim raitim tasol i kam long *Wantok niuspepa* na bai mi lukim.

James Quino
Siane, Yondumo

Tambu long ol wokman i go wantaim man nating long ples bilong wok

Dia Edita,

PLIS inap yu givim mi spes long pepa bilong yu na mi toktok long paul i save kamap long planti rurol eria long PNG bai olgeta manmeri ken lukim na tingim.

Wari na bel hevi bilong mi em olsem. Mi wanpela manki long ples Tapen insait long Madang provins tasol nau mi stap long Lae, Morobe provins.

Mi komplem na kisim maus bilong papamama na bratasusa long ples Tapen. Mi no laikim ol wokman i go wantaim man nating long ples bilong wok.

Mi save lukim long planti hap bilong PNG na kain man nating olsem i save stap olgeta na planim strongpela samting olsem kopi, kakau, buai na kokonas long wokim bisnis. Bhain ol asples i

save kirap na kamapim bikpela pait namel long ol asples na ol man nating husat kam na stap.

Mipela i les long kain pasin i kamap long ples bhain olsem na plis yu husat wokman i laik i go long ples Tapen, yu mas i go wantaim bebisita meri tasol long ples bilong wok sapos yu marit man i gat pikinini.

Olsem na mi askim memba bilong Raicos inap yu painim sampela rot we inap long stapim ol kain man olsem long ples bilong wok na i stap olgeta.

Sapos yu sapotim o egensim rait tasol long *Wantok Niuspepa* na mipela olgeta i ken lukim.

Joel Mike
Lae, Morobe Province

Aitape plis mas wok gut

Dia Edita,

Mi laik autim wari bilong mi long bikhet pasin long Aitape liklik taun bilong yumi long Sandaun i wok long bagarap tru long ol kainkain raskol pasin.

Ating Aitape i nogat wanpela plis stesen i stap o nogat olgeta.

Ating ol gavman i no putim wanpela plis stesen long Aitape ya.

Mi tok stret long yupela ol plisman, yupela i wok long tapak o wok mani.

So maski long dres ap na raun long san tasol na nait kamap olsem ol meri na slip long haus na wetim fotnai. Traim wok nait na painim wanem kainkain stil pasin i kamap long Aitape.

Yaipiom Kereri
Erlui

Giaman promosen tru

Dia Edita,

PLIS givim mi hap spes long *Wantok Niuspepa* bilong mi i ken autim wari na komplem bilong mi. Yes mi laik sapotim toktok bilong brata Taman Paragum Uh i bin kamap long *Wantok Niuspepa* long Novemba 30, 2000.

Yes mi wanpela pikinini Manus na dispela askim na komplem bai mi sutim i go long ol dispela promosen kampani we i save wokim na promotim ol kain promosen olsem Hi-Way-Beef, Ox&Palm, Coca Cola na Trukai rice na planti moa kaikai na prodak.

Olsem wanem na ol prais bai yupela luksave na putim tasol long yupela long Mosbi, Momase na Hailans rijen na mipela hia long Niugini Ailans, maski lus tingting long mipela long wanem mipela i no pat bilong kantri Papua Niugini. Mipela i westim nating mani bilong baim stem na envelop na ol dis-

pela prodak we yupela i wokim promosen long em. Mani bai wes nating na win bai stap tasol long Mosbi, Momase na Hailans rijen na olsem wanem long mipela ol foapela ailan i stap beksait long yupela ol narapela rijen?

Plis harim gut mipela tu mipela man ya na mipela tu laik winim ol dispela kain samting i no long yupela tasol. So plis mi askim ol kampani bilong wokim promosen olsem yupela i mas traim na wokim samting stret na ikwel bai yumi olgeta Papua Niugini i ken traim long pilai resis na winim ol dispela kain samting.

Yu husat bratasusa i laik sapotim o egensim yu welkam tasol long rait long *Wantok Niuspepa* bai mi i ken ritim.

John Komox
Manus Island

Wantok painim Wantok

dispela pes em bilong yupela ol man na meri husat i laik salim tok save i go long ol:-

BUBU KANDERE BRATA SUSAN MISIS PREN PIKININI NA HUSAT MOA YU GAT LAIK LONG SALIM TOK HAMAMAS TOK SORI O TOK PILAI.

Toktok nating i go long lewa. Wanpela samting tasol toktok i kam long dispela Wantok painim Wantok em i mas sotpela ino inap longpela olsem tel bilong kapul dispela toktok nogat pei long en tasol sapos igo antap long tripela lain olsem →

Brata plis kam long Port Moresby long dispela wik wantaim tambu lewa bilong yu

en nau bai i gat pei olsem

foapela Kina (K4.00) long wanpela hap olsem →

Brata plis kam long Port Moresby long dispela wik wantaim tambu lewa bilong yu na pikinini wantaim dog.

Salim dispela toktok i kam long mipela long Wantok Nius na hamamasim husat yu laik long hamamasim. Tingim dispela ino Kanage stori. Makim skin pas olsem -

Wantok Painim Wantok, PO Box 1982, Boroko, NCD

Special Features

are an integral part of news reporting. And at Word Publishing, we do our best to present reports that are fair, informative as well as educational.

If you are celebrating an anniversary, launching a new product or opening a new building, call our supplement Editor or Advertising Manager on:

PHONE: 325 2500 or FAX: 325 2579

**We can cover your
Business**

in both ENGLISH and PIDGIN!



WANTOK SPOT



PNG long kamap top soka kantri long 2005

PAPUA Niugini Futbol Asosiesen (PNGFA) i laik mekim PNG i kamap namba wan soka kantri insait long Osenia rjen long yia 2005.

Dispela em wanpela bikpela tingting bilong PNGFA bihain sampela miting namel long ol eksekutiv bilong EN na Developmen Opisa bilong FIFA Glenn Turner.

Mista Turner em hetman bilong Gol Projek we FIFA i wok long karim aut long wanwan memba kantri insait long wol.

Presiden bilong PNGFA Madiu Andrew i tok olsem sapos senis i laik kamap ol i mas makim sampela opisel long mekim wok.

Sampela ol wokman we PNGFA i tingting long makim em teknikel menesa, developmen kodineta na referi kodineta.

Mista Madiu i tok olsem sampela kain senis em long lokal kompetisen, intanesenel tim program, makim na developim ol yangpela pilaia, kosa, edministret, spot medisn na kamapim gutpela pablik rilisen.

Em i tok teknikel menesa bai lukautim ovarol developmen bilong soka long kantri. Em bai go pas long ol program olsem grasrut soka na tu developmen bilong wimen soka long kantri.

I gat bilip olsem ol bai makim sampela ol save long wok wantaim teknikel menesa long kisim wanpela developmen kodineta long wok wantaim 4-pela rjen.

Mista Madiu i tok wok bilong referi kodineta em long makim ol gutpela referi long lukautim ol intanesenel gem long kantri na tu ovasis.

Em i tok PNGFA nau bai lukluk strong long helpim ol yangpela pilaia long junia (Anda 17), yut (Anda 20) na wimen (Anda 19) nesene tim.

Nau yet PNGFA i gat wanpela intanesenel tonamen tasol bilong ol Anda 20 long Cook Allan na wimen (Anda 19) long Tonga long mun Epril. Anda 20 tonamen long Cook Allan bai kamap long Februari.

Wantaim gutpela nem i kamap long OFC klab sempionsip long Pot Mosbi, PNGFA nau bi traim long kamapim intanesenel kompetisen long developim na promotim soka insait long kantri.

Wanpela komiti nau i wok long stretim dispela lokal kompetisen long traim mekim karnap gut long stat bilong nupela sisen.

Wanpela bikpela samting tu em long lukluk long traim sanapim wanpela soka trening senta na tu heikwata bilong em long Lae. Dispela olgeta samting i stret pinis tasol ol i wetim tasol mari i kam long FIFA.

Tupela disebel spotman i stap insait long bikpela resis

TUPELA disebel spotman i stap nau long bikpela resis bilong Intanesenel Wheelchair Track Racing Series long Sidni, Australia. Dispela resis i stat long Tunde na bai pinis long neks wik, Februari 1.

Bikpela resis long kompetisen ya em OZ Day 10K Intanesenel Wheelchair Race, long makim Australian Day.

Dispela resis bilong ol disebel bai pulim moa sapota husat bai sansp long sait bilong rot long lukim ol lain i resis. Sydney Harbour Bris na

Opera Haus long Sidni bai stap long baksait bilong dispela rot we ol trangu bai bihainim.

Tidman Gegenua na Kavua Ori i stap long dispela resis. Tim menesa na physiotherapist Nelson Bokoi i bihainim dispela tupela mani.

Australian Hai Komisin i sapotim dispela PNG tim na baim wokabaut bilong ol aninit long Pablik Diplomacy Program.

Hai Komisina bilong Australia Nick Warner i tokaut long sapot bilong Australia long strongim spot

bilong disebel spot long kantri. New South Wales Wheelchair Spot Asosiesen, husat i go pas long holim dispela sempionsip i askim olgeta disebel spot long kam resis long dispela kompetisen.

"Tupela disebel spot ya bai salens wantaim ol disebel spotman bilong arapela kantri. Na stap bilong tupela long Sidni bai helpim tru nem bilong disebel spot insait long Papua Niugini," Mista Warner i tok.

Sophie Kuasi, Disebel Spot Program menesa bilong

PNG Spots Komisin i tenkim gavman bilong Australia long gutpela sapot bilong ol.

"Australian Hai Komisin i save sapotim PNG Disebel Gems long planti yia bipo na dispela sapot na i kamap gen we tupela disebel spot lain bai go pilai long wol disebel toname long Sidni.

Mis Kuasi i tokim Wantok olsem i gat senis long nem bilong ol disebel olsem Wole Tia husat i gat nem pas i kisim bagarap na Kavua Ori i kisim ples. Arapela disebel Tidman Gegenua i stap yet.



• Australian Hai Komisina Nick Warner i amamas na sekhan wantaim Disebel Spot Program menesa Sophie Kuasie long PNG Spots Komisin taim ol i mekim laspela bung wantiam ol disebel pilaia husat i stap insait long Wheelchair Track Racing Series long Sidni, Australia.

Gutpela Pis tru bilong PNG... Em DIANA!



- Tuna kam long solwara bilong Papua Niugini Stret.
- 100% tuna mit stret, nogat bun na nogat skin.
- Planti mit istap long olgeta tin.
- Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.